

# WAPAPAR AWER

## Mitai haw teko wapapar haw

**1** <sup>1</sup>Izaew izuapyapr oho Ezit ywy wi wà. Umumaw mokoz kwarahy wata pà wà. Mokoz haw zahy rehe pitai haw 'ar mehe Tupan Tuweharupi Wiko Ma'e uze'eg Moizez pe ywyxiguhu Xinaz her ma'e rehe tapuzran Tupan pe imonokatu pyrer pupe a'e kury.

**2** — Ne nehe, neryky'yr Aràw a'e nehe no, pepapar teko Izaew izuapyapr paw pe wà nehe. Pemono'og uzeànàànàm ma'e pe wà nehe. **3** Pemuapyk awa waner pape rehe nehe, aze wereko 20 kwarahy nehe, aze wereko wera'u nehe. A'e mehe upuner zauxiapekwer romo weko haw rehe wà nehe. **4** Penoz putar amo uzeànàm ma'e wanuwihiaw pitaitaigatu pe wà nehe. Pepetywà putar wemiaihu wapapar pà wà nehe. **5-16** Na'aw awa penemipytywà àràm waner xe wà. Izypy mehe amume'u putar Izaew ta'yr her nehe. A'e re amume'u putar izuapyr her nehe no. Humen: Erizur, Xeneur ta'yr. Ximeaw: Xerumiew, Zurixanaz ta'yr. Zuta: Nazom, Aminanaw ta'yr. Ixakar: Netanew, Zuar ta'yr. Zemurom: Eriaw, Erom ta'yr. Eparai: Eriàm, Amiu ta'yr. Manaxe: Kamariew, Penazur ta'yr. Mezàmi: Aminà, Zineoni ta'yr. Nà: Aiezer, Amizanaz ta'yr. Azer: Paziew, Okirà ta'yr. Kaz: Eriazap, Newew ta'yr. Napitari: Aira, Enà ta'yr. Amumaw waner wamume'u haw kwez kury. Moizez wexaexak Izaew izuapyapr wanuwihiaw pitaitaigatu wà, uzeànàànàm ma'e wanekuzaromo har romo wà.

**17-18** Na'e mokoz haw zahy rehe pitai haw 'ar mehe Moizez a'e, Aràw a'e no, a'e 12 awa a'e wà nehe no, omono'og teko paw rupi wà kury. Upapar uzeànàànàmwanetaw haw wà. Umuapyk awa zauxiapekwer romo weko haw rehe upuner ma'e waner pape rehe wà. **19** Nezewe Moizez upapar waneta haw ywyxiguhu Xinaz her ma'e rehe waneko mehe, Tupan Tuweharupi Wiko Ma'e ize'eg awer rupi katete a'e wà.

**20-21** Awa 20 henataromo kwarahy hereko har zauxiapekwer romo weko haw rehe upuner ma'e umuapyk kar uwer paw rupi

pape rehe wà, wànam wanehe we wà, wamono'ogaw rehe we wà. Uzypyrog Humen Zako ta'yr ipy izuapyapr wanehe we wà. Na'aw Zako ta'yr izuapyapr waneta haw xe. Humen izuapyapr wà: 46.500 awa wà. **22-23** Ximeaw izuapyapr wà: 59.300 awa wà. **24-25** Kaz izuapyapr wà: 45.650 awa wà. **26-27** Zuta izuapyapr wà: 74.600 awa wà. **28-29** Ixakar izuapyapr wà; 54.400 awa wà. **30-31** Zemurom izuapyapr wà: 57.400 awa wà. **32-33** Eparai izuapyapr wà: 40.500 awa wà. **34-35** Manaxe izuapyapr wà: 32.200 awa wà. **36-37** Mezàmi izuapyapr wà: 35.400 awa wà. **38-39** Nà izuapyapr wà: 62.700 awa wà. **40-41** Azer izuapyapr wà: 41.500 awa wà. **42-43** Napitari izuapyapr wà: 53.400 awa wà. **44-46** Nezewe mehe upapar awa 20 henataromo kwarahy hereko har zauxiapekwer romo weko haw rehe upuner ma'e wà. Heta 603.550 wà.

## Erewi wà

**47** Nupapar kwaw Erewi izuapyapr wà. **48** Ta'e Tupan Tuweharupi Wiko Ma'e uze'eg nezewe Moizez pe a'e xe.

**49** — Aw zauxiapekwer romo weko haw rehe upuner ma'e wapapar mehe epapar zo Erewi izuapyapr ne wà nehe. **50** Emuzekaiw kar Erewi izuapyapr tapuzran ihewe imonokatu pyrer rehe ne wà nehe. Uzekaiw putar tenaw ipupe har nànàm wà nehe, amo ma'e ipupe har nànàm no. Weraha putar tapuzran wà nehe, hehe we har paw wà nehe no. Uzapo putar hemuwete haw ipupe wà nehe. Umuapyk putar wàpuzran izywyr wà nehe no. **51** Aze weraha tapuzran ihewe imonokatu pyrer amo me wà nehe, umuàgà'yim putar wà nehe. Aze umuapyk wi amo me nehe, umuàgà'yim wi putar wà nehe no. Aze amo nuiko kwaw Erewi izuapyr romo nehe, aze uhem tapuzran ihewe imonokatu pyrer huwake nehe, pezuka nehe. **52** Amogwer Izaew izuapyapr upyta putar weko haw pe pitaitaigatu wà nehe, pànuhu ter heta haw huwake wà nehe, wànam wanuwake wà nehe. **53** Erewi izuapyapr

wiko putar tāpuzrān ihewe imonokatu pyrer izywyr wà nehe, hehe uzekaiw pà wà nehe. Nezewē mehe ni amo nūhem kwaw huwake wà nehe. Nezewē mehe naikwahy kwaw Izaew wanupe ihe nehe.

**54** Na'e tekō uzapo ma'e paw Tupàn Tuweharupi Wiko Ma'e iz'e'g Moizez pe imono pyrer rupi katete wà.

**Teko Izaew uzapo weko haw  
tāpuzrān izywyr pitāitāigatu wà**

**2** <sup>1</sup> Tupàn Tuweharupi Wiko Ma'e uze'eg Moizez pe, Àràw pe kury.

<sup>2</sup> Izaew uker haw imuágà'y'm mehe pitāitāigatu upyta putar pànuhu ter heta haw huwake wà nehe, wànàm waner hereko har huwake wà nehe. Uzapo putar weko haw tāpuzrān Tupàn pe imonokatu pyrer izywyr wà nehe. Wanàpuzrān paw ume'e putar tāpuzrān Tupàn pe imonokatu pyrer kutyr wà nehe.

**3-4** Kwarahy ihemaw kutyr zauxiapekwer pànuhu Zuta her hereko har izywyr wata ma'e uzapo putar weko haw wà nehe. Heta 74.600 awa wà. Nazom Aminanaw ta'yr wiko wanuwhiaw romo a'e. **5-6** Wanuwake pànuhu Ixakar her hereko har izywyr wata ma'e uzapo putar weko haw wà nehe. Heta 54.400 awa wà. Netanew Zuar ta'yr wiko wanuwhiaw romo a'e. **7-8** Zauxiapekwer pànuhu Zemurom her hereko har izywyr wata ma'e uzapo putar weko haw wanuwake wà nehe. Heta 57.400 awa wà. Eriaw Erom ta'yr wiko wanuwhiaw romo a'e. **9** Zuta izuapyapyr wata putar amogwer wanenataromo wà nehe. Heta 186.400 awa wà.

**10-11** Pànuhu Humen izuapyapyr waner hereko har haikweromo wata ma'e uzapo putar uker haw kwarahy ihemaw awyze har kutyr wà nehe. Heta 46.500 awa zauxiapekwer Humen izuapyapyr wainuinuromo wà. Erizur Xeneur ta'yr wiko wanuwhiaw romo. **12-13** Ximeàw izuapyapyr zauxiapekwer uzapo putar uker haw Humen wanuwake a'e wà nehe. Heta 59.300 awa zauxiapekwer Ximeàw izuapyapyr wainuinuromo wà. Xerumiew, Zurixanaz ta'yr wiko wanuwhiaw romo. **14-15** Kaz

izuapyapyr zauxiapekwer uzapo putar uker haw Ximeàw wanuwake a'e wà nehe. Heta 45.650 awa zauxiapekwer Kaz izuapyapyr wainuinuromo wà. Eriazap, Neuew ta'yr wiko wanuwhiaw romo. **16** Humen rehe we har zauxiapekwer wata putar wanaikweromo wà nehe. Heta 151.450 awa zauxiapekwer wamono'og pyrer wanupe.

**17** Erewi izuapyapyr wata putar mokoz zauxiapekwer wamono'ogaw amogwer wanenataromo wata ma'e wanehe we wà nehe no. Weraha putar tāpuzrān Tupàn pe imonokatu pyrer wà nehe. Imono'og pyrer uzapo putar uker haw uezakeake wà nehe. Wata putar uezakeake nezewegatete wà nehe no. Pitāitāigatu upyta putar wenaw rehe upyta haw rehe wà nehe, pànuhu ter hereko har huwake wà nehe.

**18-19** Pànuhu Eparai izuapyapyr waner hereko har haikweromo wata ma'e uzapo putar uker haw kwarahy heixe haw kutyr wà nehe. Heta 40.500 awa zauxiapekwer Eparai izuapyapyr wainuinuromo wà. Erizàm, Amiu ta'yr wiko wanuwhiaw romo. **20-21** Manaxe izuapyapyr zauxiapekwer uzapo putar uker haw Eparai wanuwake a'e wà nehe. Heta 32.200 awa zauxiapekwer Manaxe izuapyapyr wainuinuromo wà. Kamariel, Penazur ta'yr wiko wanuwhiaw romo.

**22-23** Mezàmi izuapyapyr zauxiapekwer uzapo putar uker haw Manaxe wanuwake a'e wà nehe. Heta 35.400 awa zauxiapekwer Mezàmi izuapyapyr wainuinuromo wà. Aminà, Zineoni ta'yr wiko wanuwhiaw romo.

**24** Eparai rehe we har zauxiapekwer wata putar Mezàmi wanaikweromo wà nehe. Heta 18.100 awa zauxiapekwer wamono'og pyrer wanupe.

**25-26** Pànuhu Nà izuapyapyr waner hereko har haikweromo wata ma'e uzapo putar uker haw kwarahy heixe haw awyze har kutyr wà nehe. Heta 62.700 awa zauxiapekwer Nà izuapyapyr wainuinuromo wà. Aiezer, Amizanaz ta'yr wiko wanuwhiaw romo.

**27-28** Azer izuapyapyr zauxiapekwer uzapo putar uker haw Nà wanuwake a'e wà nehe. Heta 41.500 awa zauxiapekwer Azer

izuapyapyr wainuinuromo wà. Paziew, Okirà ta'yr wiko wanuwihaw romo. **29-30** Napitari izuapyapyr zauxiapekwer uzapo putar uker haw Azer wanuwake a'e wà nehe. Heta 53.400 awa zauxiapekwer Napitari izuapyapyr wainuinuromo wà. Aira, Enà ta'yr wiko wanuwihaw romo. **31** Nà rehe we har zauxiapekwer wata putar iahykaw rehe wà nehe. Heta 157.600 awa zauxiapekwer wamono'og pyrer wanupe.

**32** Umuapyk awa Izaew izuapyapyr zauxiapekwer waner wà, uzehé we uzemono'og ma'e waner waiwyr paw rupi wà. Heta 63.550 awa wà. **33** Moizez nupapar kwaw Erewi izuapyapyr amogwer Izaew izuapyapyr wainuinuromo wà, ta'e Tupàn Tuweharupi Wiko Ma'e nupapar kar kwaw izupe wà xe.

**34** Nezewe teko Izaew izuapyapyr uzapo ma'e paw Tupàn Tuweharupi Wiko Ma'e ze'eg Moizez pe imono pyrer rupi katete wà. Uzapo uker haw wà. Pitàitáigatu imono'og pyrer upyta pànuhu ter hereko har iwy pe wà. Izaew izuapyapyr uzypyrog wànàm imono'og pyrer rupi wata pà pitàitáigatu wà.

### Àràw ta'yr wà

**3** **1** Tupàn Tuweharupi Wiko Ma'e uze'eg Moizez pe Xinzay wytyr rehe a'e. A'e 'ar mehe heta amo Áràw izuapyapyr wà. Heta amo Moizez izuapyapyr wà no. Amume'u putar waner xe ihe wà nehe kury. **2** Na'aw Áràw ta'yr waner xe wà: Nanaw ta'yr ipy. Amiu, Ereazar, Itamar. **3** Moizez uzakook uri kawer wanehe xaxeto romo wamuigo kar pà a'e. **4** Nanaw a'e, Amiu a'e no, umunyk tata Tupàn henataromo ize'eg heruzar 'ym pà wà. A'e rupi Tupàn uzuka a'e pe wà. Nata'yr kwaw wikuwe mehe wà. A'e rupi xo Ereazar Itamar rehe we zo wiko xaxeto romo Áràw hekuwe mehe a'e wà.

### Erewi wama'ereko haw

**5** Tupàn Tuweharupi Wiko Ma'e uze'eg Moizez pe.

**6** Enoz Erewi izuapyapyr wamuwà ne wà nehe. Epytwà kar Áraw wanupe Tupàn

imuwete haw iapo mehe ne wà nehe. **7** Uzapo putar ma'erekò haw paw tâpuzràn Tupàn pe imonokatu pyrer pupe wà nehe. Upytwà putar xaxeto wà nehe. Upytwà putar tekò paw wà nehe no. **8** Uzekaiw putar wyrapew tâpuzràn Tupàn pe imonokatu pyrer pupe har nànàn wà nehe, amogwer ma'e ipupe har nànàn wà nehe no. Uzapo putar Tupàn imuwete haw Izaew wanehe we har paw rupi wà nehe. **9** Erewi izuapyapyr uzapo putar xo pitài ma'e zo wà nehe. Upytwà putar Áràw wà nehe, upytwà putar izuapyapyr wà nehe no. **10** — Xo xaxeto wama'erekò haw rehe zo pezekaiw nehe, ere Áràw pe nehe, izuapyapyr wanupe nehe no. Aze wyzài awa uezagaw a'e ma'erekò haw iapo pà nehe, pezuka a'e awa nehe.

**11** Tupàn Tuweharupi Wiko Ma'e uze'eg wi Moizez pe.

**12-13** Erewi izuapyapyr wiko heremiruze'eg romo wà kury. Ezit wana'yr ipy wazuka mehe amonokatu Izaew wana'yr ipy hezeupe ihe wà. Amonokatu waneimaw wana'yr ipy hezeupe ihe wà no. Ko 'ar rehe napyhyk kwaw Izaew izuapyapyr wana'yr ipy ihe wà. Apyhyk Erewi izuapyapyr wana'yr ihe wà kury. Wiko heremiruze'eg romo wà. Aiko wazar romo ihe. Aiko Tupàn Tuweharupi Wiko Ma'e romo.

### Erewi wapapar haw wà

**14** Xinzay wyxyiguhi rehe Tupàn Tuweharupi Wiko Ma'e uzapo kar ma'e Moizez pe. **15** — Emuapyk Erewi izuapyapyr waner pape rehe ne wà nehe, waànàm waner wanehe we wà nehe, waànàm imono'og pyrer waner wanehe we wà nehe, aze awa romo wiko wà nehe, aze wereko pitài zahy henataromo wà nehe, i'i Tupàn Moizez pe. **16** Na'e Moizez uzapo Tupàn Tuweharupi Wiko Ma'e hemiapo kar teko wanupe. **17** Heta na'iruz Erewi ta'yr wà. Zeroxon, Koat, Merari waner romo wà. **18-20** Upurumuzàmuzàg tetea'u wà. Wazuapyapyr wereko uiyp waner wà. Zeroxon wereko mokoz wa'yr wà: Irimini. Ximez. Koat wereko 4 wa'yr wà: Ànàràw,

Izar, Emerom, Uziew. Merari wereko mokoz wa'yr wà: Mari, Muzi. Upurumuzâmuzàg wà. Wazuapyapyr wereko waner wà.

**21** Zeroxon izuapyapyr uzemuza'ak mokoz romo wà: Irimimi, Ximez waner romo wà.

**22** Pitàitâigatu upapar awa pitài zahy henataromo hereko har wà. Heta 7.500 wà.

**23** A'e imono'og pyrer uzapo uker haw tâpuzràn Tupàn pe imonokatu pyrer ikupe kutyr kwarahy heixe haw kutyr wà.

**24** Eriazap Araew ta'y wiko a'e uezanàanàm ma'e imono'og pyrer wanuwhaw romo a'e.

**25** Zeroxon izuapyapyr uzekaiw tâpuzràn Tupàn pe imonokatu pyrer rehe wà: ipykaw rehe, ipykaw iwype har rehe,

**26** pànuhu katu pe har rehe, pànuhu teixe haw pe har rehe, pànuhu tâpuzràn Tupàn pe imonokatu pyrer izywyr har katu pe har rehe, pànuhu ma'e'yr hapy haw izywyr har rehe, pànuhu katu pe har ukenaw rehe har rehe, ihàm rehe.

**27** Heta 4 uezanàanàm ma'e Koat rehe we imono'og pyrer pe wà: Áñaràw izuapyapyr wà, Izar izuapyapyr wà, Emerom izuapyapyr wà, Uziew izuapyapyr wà. **28** Upapar awa pitài zahy henataromo hereko har wà. Heta 8.600 wà. A'e awa uzekaiw tâpuzràn Tupàn pe imonokatu pyrer rehe wà. **29** A'e imono'og pyrer Koat her hereko har uzapo uker haw tâpuzràn Tupàn pe imonokatu pyrer huwake kwarahy ihemaw awyze har kutyr wà.

**30** Erizàpà Uziew ta'y wiko a'e uezanàanàm ma'e imono'og pyrer wanuwhaw romo a'e.

**31** Uzekaiw ko ma'e rehe wà: Tupàn Ze'eg Hyru rehe, ywyrapew záwenugar rehe, tataimy henaw rehe, ma'e'yr hapy haw rehe, inugwer ma'e hapy haw rehe, ma'e Tupàn henaw ikatu ma'e pupe har rehe, pànuhu Tupàn henaw ikatuahy ma'e pe teixe haw rehe har rehe. Uzekaiw a'e ma'erekò haw nànnàm wà.

**32** Ereazar xaxeto Áràw ta'y wiko Erewi izuapyapyr wanuwhaw wanuwhaw romo a'e. Wiko Tupàn henaw ikatu ma'e pupe uma'erekò ma'e wanuwhaw romo.

**33** Heta mokoz uezanàanàm ma'e Merari rehe we imono'og pyrer pe wà: Mari izuapyapyr wà, Muzi izuapyapyr wà.

**34** Upapar awa pitài zahy henataromo hereko

har wà. Heta 6.200 wà. **35** Zuriew Amiaiw ta'y wiko a'e uezanàanàm ma'e imono'og pyrer Merari rehe we har wanuwhaw romo a'e. Merari her hereko har uzapo uker haw tâpuzràn Tupàn pe imonokatu pyrer izywyr kwarahy heixe haw awyze har kutyr wà.

**36** Uzekaiw ko ma'e rehè wà: ywyrapew tâpuzràn Tupàn pe imonokatu pyrer rehe har rehe, ywyra tâpuz iappyteraromo har rehe, izyta rehe, iwype har rehe, ipupe har nànnàm. **37** Uzekaiw izyta katu pe har tâpuzràn Tupàn pe imonokatu pyrer izywyr har rehe wà, iwype har rehe wà no, izyta rehe wà no, ihàm rehe wà no.

**38** Moizez a'e, Áràw a'e no, wana'yr a'e wà no, uzapo uker haw tâpuzràn Tupàn pe imonokatu pyrer henataromo a'e wà, kwarahy ihemaw kutyr a'e wà. Uzekaiw Tupàn imuwe haw henaw ikatu ma'e pupe har rehe wà, teko Izaew izuapyapyr wanekuzaromo wà. Aze mo amo awa uezagaw a'e ma'erekò haw iapo pà, teko uzuka mo wà.

**39** — Emuapyk Erewi izuapyapyr waner pape rehe ne wà nehe, waànàm waner wanehe we wà nehe, waànàm imono'og pyrer waner wanehe we wà nehe, aze awa romo wiko wà nehe, aze wereko pitài zahy henataromo wà nehe, i'i Tupàn Tuweharupi Wiko Ma'e Moizez pe, Áràw pe. Weruzar katu ize'eg wà. Heta 22.000 awa wà.

### *Erewi upyta wana'yr ipy wanekuzaromo wà*

**40** Tupàn Tuweharupi Wiko Ma'e uze'eg Moizez pe kury. — Emuapyk Izaew wana'yr ipy waner pape rehe ne wà nehe, aze heta pitài zahy henataromo wà nehe. Ta'e paw rupi wiko hema'e romo wà xe. **41** Nezewa rehe we amono putar Erewi izuapyapyr paw wanekuzaromo ihe wà nehe, hema'e romo ihe wà nehe. Aiko Tupàn Tuweharupi Wiko Ma'e romo. Emono Erewi waneimaw amogwer Izaew waneimaw wana'yr ipy wanekuzaromo wà nehe no.

**42** A'e rupi Moizez umuapyk Izaew wana'yr ipy waner pape rehe wà, Tupàn Tuweharupi Wiko Ma'e ze'eg rupi katete wà. **43** Upapar

awa pitài zahy henataromo hereko har paw rupi wà. Heta 22.273 wà.

**44** Na'e Tupàn Tuweharupi Wiko Ma'e uze'eg Moizez pe kury.

**45** Emono Erewi izuapyapyr Izaew wana'yr ipy wanekuzaromo ne wà nehe. Emono waneimaw amogwer Izaew waneimaw wanekuzaromo ne wà nehe no. Erewi izuapyapyr wiko hemal'e romo wà. Aiko Tupàn Tuweharupi Wiko Ma'e romo.

**46** Heta tetea'u wera'u Izaew wana'yr ipy wà, Erewi wana'yr wanuwi wà. Heta we 273 wà. Emekuzar upyta we ma'e kwer ne wà nehe.

**47-48** Emur putar 5 temetarer tâtà parat iapo pyrer wanekuzaromo pitàitâigatu nehe. Eremono putar a'e temetarer Àràw pe nehe, ta'yr wanupe nehe. A'e 'ym mehe tuwihaw umuapyk temetarer tâtà hekuzar pape rehe wà. Teko paw ukwaw hekuzar wà. Pitai temetarer tâtà xikuru her ma'e nuzawy kwaw 20 temetarer zera her ma'e wà.

**49** Na'e Moizez upyhyk a'e temetarer parat kury. **50** 15 kir pitài iku'aw har rehe wà.

**51** Omono Àràw pe ta'yr wanupe Tupàn Tuweharupi Wiko Ma'e ze'eg rupi katete.

### Koat izuapyapyr wanemiapo

**4** **1** Tupàn Tuweharupi Wiko Ma'e uze'eg Moizez pe kury.

**2** Epapar Erewi izuapyr Koat her ma'e izuapyapyr ne wà nehe. Emono'og uezanàànàm ma'e ne wà nehe, imono'og pyr nààn ne wà nehe. **3** Emuapyk awa 30 kwarahy hereko har te 50 kwarahy hereko har tâpuzràñ ihewe imonokatu pyrer pupe uma'erekoh haw rehe upuner ma'e ràm waner ne wà nehe. **4** Koat izuapyapyr uzekaiw putar ma'e herenataromo ikatuahy ma'e tâpuzràñ ihewe imonokatu pyrer rehe a'e wà nehe.

**5** Waker haw imuhàz mehe Àràw a'e nehe, ta'yr a'e wà nehe no, wixe putar a'e tâpuzràñ pupe wà nehe. Wenuhem putar pànuhu heze'eg hyru henataromo har wà nehe. Upyk putar heze'eg hyru ipupe wà nehe. **6** Na'e upyk putar a'e ma'e paw ipykaw ma'e'yr pirer ikatuahy ma'e iapo pyrer pupe wà nehe. Na'e upyk putar a'e ma'e paw pànuhu huwyahy ma'e

pupe wà nehe. Na'e umuixe kar ihàm iapu'a ma'e wanupi wà nehe.

**7** Omono putar pànuhu huwyahy ma'e ywyrapew typy'ak ihewe imur pyr hereko har rehe wà nehe. Na'e omono putar tâpuzràñ rehe har hehe wà nehe: kawaw, kanekuhu yhyk zàwenugar hyru, kanekuhu ma'e imur pyr hyru, zutahky'a win imur pyr hyru. Heta putar typy'ak a'e ywyrapew rehe. **8** Na'e upyk putar a'e ma'e paw pànuhu ipiràg ma'e pupe wà nehe. I'romo omono putar ipykaw ma'e'yr ipirer pupe iapo pyrer wà nehe. Na'e umuixe kar putar ihàm iapu'a ma'e wanupi wà nehe.

**9** Upyhyk putar pànuhu huwyahy ma'e wà nehe. Upyk putar amo ma'e ipupe wà nehe: tatainy henaw, tatainy, zepinaw tatainy ihàm imonohokaw, imuwehaw, zapopo uri kawer hyru. **10** Na'e uwàuwàñ putar a'e ma'e paw ma'e'yr ipirer ikatuahy ma'e pupe wà nehe. Na'e omono putar i'yw a'e ma'e paw wanehe wà nehe. Upyhyk putar i'yw heraha mehe wà nehe. **11** Omono putar amo pànuhu huwyahy ma'e ma'e'yr hapy haw or iapo pyrer rehe wà nehe. Omono putar ipykaw ma'e'yr ipirer ikatuahy ma'e iapo pyrer hehe wà nehe. Na'e umuixe kar putar ma'e'yr hapy haw i'yw iapu'a ma'e rupi wà nehe.

**12** Na'e upyhyk putar ma'e herenaw ikatuahy ma'e pupe har paw wà nehe. Uwàuwàñ putar pànuhu huwyahy ma'e pupe wà nehe. Upyk putar ipykaw ma'e'yr ipirer ikatuahy ma'e iapo pyrer pupe wà nehe. Omono putar i'yw rehe heraha àwàm rehe wà nehe.

**13** Wenuhem putar tanimuk ma'e'yr hapy haw wi wà nehe. A'e re upyk putar ma'e'yr hapy haw pànuhu ipiràg ma'e pupe wà nehe.

**14** Omono putar ma'e ma'e'yr hapy haw rehe har paw hehe wà nehe: tâtàpyzgwer ipyhykaw, kuzeràxi aze ru'u kuzehu ywy momor haw, kawawhu. Upyk putar ipykaw ma'e'yr ipirer ikatuahy ma'e iapo pyrer pupe wà nehe. Na'e omono putar i'yw ma'e'yr hapy haw rehe iapu'a rupi wà nehe. **15** Uker haw imuhàz mehe Koat izuapyapyr ur putar ma'e Tupàn pe imonokatu pyr ipyhyk pà wà nehe. Àràw a'e, ta'yr a'e wà, upyk putar tâpuzràñ Tupàn pe imonokatu pyrer wà.

Upyk putar ma'e ipupe har paw wà nehe no. Xo a'e re Koat izuapyapyr upyhyk putar wà nehe. Koat izuapyapyr nopolok kwaw ma'e Tupàn pe imonokatu pyrer rehe wà nehe. Aze opokok amo rehe wà nehe, umàno putar wà nehe. Koat izuapyapyr weraha putar a'e ma'e tåpuzràn Tupàn pe imonokatu pyrer pupe har wà nehe, teko wata mehe wà nehe.

**16** Ereazar xaxeto Àràw ta'yra'e nehe, wiko putar ko ma'e rehe uzekaiw ma'e romo a'e nehe: tåpuzràn Tupàn pe imonokatu pyrer, uri kawer tatainy ipor, yhyk záwenugar, arozràn imur pyrer, uri kawer purehe izakook pyràm. A'e ae wiko putar tåpuzràn rehe uzekaiw ma'e romo nehe, ipupe har rehe uzekaiw ma'e romo nehe no.

**17** Na'e Tupàn Tuweharupi Wiko Ma'e uze'eg Moizez pe Àràw pe kury.

**18** Emumàno kar zo Koat iàñàm ne wà nehe. **19** Aze uhem a'e ma'e ihewe imur pyrer huwake wà nehe, umàno putar wà nehe. Àràw a'e nehe, ta'yra'e wà nehe no, wixe putar tåpuzràn Tupàn pe imonokatu pyrer pupe wà nehe. Uze'eg putar awa wanupe pítaitàigatu wà nehe. Nezewe mehe pítaitàigatu ukwaw putar wemiapo ràm wà nehe. Ukwaw putar wemiraha ràm wà nehe. Nezewe mehe numàno kwaw wà nehe. **20** Koat izuapyapyr nuixe pixik kwaw ma'e ihewe imur katu pyrer hexak pà wà nehe. Aze wexak wà nehe, umàno putar wà nehe.

### *Zeroxon wanemiano*

**21** Tupàn Tuweharupi Wiko Ma'e uze'eg Moizez pe kury.

**22** Epapar Zeroxon izuapyapyr ne wà nehe. Emono'og uzeàñàñàm ma'e ne wà nehe, imono'og pyr nàñàñ ne wà nehe. **23** Aze awa wereko 30 te 50 kwarahy nehe, emuapyk her pape rehe nehe, aze upuner tåpuzràn Tupàn pe imonokatu pyrer pupe uma'ereko haw rehe nehe. **24** Zeroxon izuapyapyr uma'ereko putar tåpuzràn Tupàn pe imonokatu pyrer pupe wà nehe, ipuhuz ma'e heraha pà wà nehe. **25** Weraha putar ko ma'e wà nehe: tåpuzràn, ipykaw ipupe har, ipykaw ikupe pe har, ipykaw ma'e'a'yr ipirer iapo pyrer,

pànuhu teixe haw pe har. **26** Weraha putar amo ma'e wà nehe no: pànuhu katu pe har, pànuhu ukenaw katu pe har rehe har tåpuzràn izywyr har ma'e'a'yr hapy haw izywyr har, ihàm, ma'e uma'ereko haw rehe har paw. **27** Uma'ereko haw paw iapo mehe Zeroxon izuapyapyr weruzar putar Àràw wà nehe, ta'yra'e wà nehe, ma'e heraha mehe wà nehe, ma'e iapo mehe wà nehe. Àràw umume'u putar wanemiraha ràm paw wanupe wà nehe. **28** Zeroxon izuapyapyr imono'og pyrer uzapo putar a'e ma'e'reko haw tåpuzràn pupe wà nehe. Itamar Àràw ta'yra'e wiko putar wanuwihiaw romo nehe.

### *Merari izuapyapyr wama'ereko haw*

**29** — Epapar Erewi ta'yra'e Merari izuapyapyr ne wà nehe, i'i Tupàn Tuweharupi Wiko Ma'e Moizez pe. Emono'og uzeàñàñàm ma'e ne wà nehe, imono'og pyr nàñàñ ne wà nehe. **30** Aze awa wereko 35 kwarahy nehe, emuapyk her pape rehe nehe, aze upuner tåpuzràn Tupàn pe imonokatu pyrer pupe uma'ereko haw rehe nehe. **31** Uze'eg Tupàn. — Uma'ereko putar tåpuzràn ihewe imonokatu pyrer pupe wà nehe. Na'aw wanemiraha tåpuzràn rehe har xe: wyrapew, kyhàhàm, izyta, iwype har, **32** izyta katu pe har tåpuzràn izywyr har, ipupe har, izyta'i, kyhàhàm, ma'e uma'ereko haw rehe har paw. Emuapyk wanemiraha ràm paw pape rehe wanupe imono pà pítaitàigatu nehe. **33** Merari izuapyapyr uzemono'og ma'e uzapo putar a'e ma'e tåpuzràn ihewe imonokatu pyrer rehe har wà nehe, uma'ereko haw wà nehe. Itamar Àràw ta'yra'e wiko putar wanuwihiaw romo nehe.

### *Erewi wapapar haw*

**34-48** Moizez a'e, Àràw a'e no, teko wanuwihiaw a'e wà no, weruzar Tupàn Tuweharupi Wiko Ma'e ze'eg a'e wà kury. Upapar Erewi ta'yra'e wazuapyapyr a'e wà. Koat, Zeroxon, Merari. Omono'og uzeàñàñàm ma'e wà, imono'og pyr nàñàñ wà. Aze awa wereko 35 kwarahy, aze upuner tåpuzràn Tupàn pe imonokatu pyrer pupe

uma'erekò haw rehe, umuapyk her pape rehe wà. Heta 2.750 awa Koat izuapyapyr wà. Heta 2.630 awa Zeroxon izuapyapyr wà. Heta 3.200 awa Merari izuapyapyr wà. Aze uzemono'og paw rupi wà, heta 8.580 awa wà.

**49** Umuapyk a'e awa waner pape rehe Tupàn Tuweharupi Wiko Ma'e ze'eg rupi katete wà. Moizez umume'u wanemipaò ràm wanupe pitàitàigatu a'e. Umume'u hemiraha ràm wanupe pitàitàigatu no. Upapar a'e awa Tupàn Tuweharupi Wiko Ma'e ze'eg Moizez pe imono pyrer rupi katete wà.

### Teko ikatu 'ym ma'e wà

**5** <sup>1</sup> Tupàn Tuweharupi Wiko Ma'e uze'eg Moizez pe.

**2** — Pemuhem kar agwer ima'eahy ma'e peneko haw wi pe wà nehe, ere teko wanupe nehe: iperewahy ma'e, ipewer awa ima'e wi uehm ma'e hereko har, umàno ma'e kwer rehe opokok ma'e kwer herenataromo ikatu 'ym ma'e romo uzemuigo kar ma'e, i'i izupe. **3** Pemono kar ikatu 'ym ma'e peneko haw wi pe wà nehe, awa wà nehe, kuzà wà nehe. Nezewe mehe napemuaìw kwaw hereko haw nehe.

**4** Izaew izuapyapyr weruzar Tupàn Tuweharupi Wiko Ma'e ze'eg Moizez pe imono pyrer wà. Omono kar a'e teko paw weko haw wi wà.

### Ma'e imuaiw pyrer imekuzar haw

**5** Tupàn Tuweharupi Wiko Ma'e uze'eg Moizez pe.

**6** Emume'u ko heze'eg Izaew wanupe nehe. — Awa a'e nehe, kuzà a'e nehe no, aze uzapo ikatu 'ym ma'e amo pe nehe, ikatu 'ym ma'e uzapo putar iko Tupàn Tuweharupi Wiko Ma'e pe nehe. Wiko putar ikatu 'ym ma'e iapo har romo Tupàn henataromo nehe. **7** Tuwe umume'u wemipaò kwer nehe. Umuzewyr kar putar hemipyro kwer izar kwer pe nehe. Umuza'ak putar wemipyhyk kwer **5** pehegwer romo. Umuzewyr we putar amo pitài ipehegwer ipuraraw har pe nehe no. **8** Aze a'e teko umàno nehe, aze naheta kwaw

iànàmete a'e temetarer ipyhyk àràm romo nehe, a'e mehe ikatu 'ym ma'e iapo arer omono putar a'e temetarer Tupàn Tuweharupi Wiko Ma'e pe nehe. Xaxeto wiko putar temetarer izar romo nehe. Omono putarhekuzar izupe nehe. Omono putar àràpuhàràn hawitu ma'e xaxeto pe nehe no. Xaxeto omono putar àràpuhàràn Tupàn pe henataromo izuka pà nehe, a'e ma'e iapo arer hemiapo kwer imunàn kar pà Tupàn pe nehe. **9** Aze amo Izaew iporomono wer amo ma'e rehe Tupàn pe nehe, omono putar a'e ma'e xaxeto pe nehe. A'e xaxeto wiko putar a'e ma'e izar romo nehe. **10** Aze amo werur ma'e xaxeto pe nehe, a'e xaxeto wiko putar a'e ma'e izar romo nehe.

### Kuzà umen 'ym puhe oho ma'e

**11** Tupàn Tuweharupi Wiko Ma'e uze'eg Moizez pe.

**12** Eze'eg Izaew izuapyapyr wanupe nehe, ko heze'eg imume'u pà wanupe nehe. **13** Aze ru'u amo kuzà uzawy wape umen 'ym puhe oho pà nehe. Nezewe mehe wiko ikatu 'ym ma'e herenataromo nehe. Imen nukwaw kwaw hemiapo kwer a'e. Ni amo nuexak kwaw wà. Ni amo nuhem kwaw a'e pe iapo mehe wà. **14** Nezewe rehe we imen uzemupy'a. Aze ru'u kuzà noho kwaw umen 'ym puhe. Aze ru'u nezewe rehe we imen uzemupy'a. — Uker ru'u aipo amo ipuhe, i'i putar uezupe nehe. **15** Wyzài 'ar mehe a'e awa weraha putar wemireko xaxeto pe nehe. Weraha putar pitài kir arozzràñ xewar her ma'e imuku'i pyrer Tupàn pe imono pyràm romo nehe no. Xaxeto nomono kwaw uri kawer inuinuromo nehe. Nomono kwaw yhyk zàwenugar hehe nehe. Ta'e a'e ma'e a'e xe, kuzà imen uzemupy'a ma'e hemimono romo a'e xe. Azeharomoete har uezupe ikwaw kar haw romo werur a'e.

**16** Xaxeto weraha a'e kuzà pepa'i imen wi ma'e a'yr Tupàn Tuweharupi Wiko Ma'e pe izuka haw henataromo imupu'am kar pà nehe. **17** Uzakook putar 'y Tupàn henataromo imukatu pyrer ywy'a pupe nehe. Upyhyk putar ywy' opo ipor tåpuzràñ Tupàn pe imonokatu pyrer pupe har nehe no. Omono

putar a'e 'y pupe nehe. **18** Kuzà upyta we ma'e'a'yr hapy haw henataromo. Xaxeto umu'ar putar i'aw nehe. Omono putar xewar imuku'i pyrer imono pyr ipo pupe nehe. Ma'e Tupàn pe imono pyr tewyrowyroahy haw rehe har romo a'e. Xaxeto wereko putar ywy'a 'y iro ma'e hereko har opo pupe nehe. A'e 'y werur ze'egaiw purehe.

**19** — Emume'uahy ko ze'eg nehe, i'i putar xaxeto kuzà pe nehe. — Hemen wiko hezar romo a'e. Naker kwaw amo awa puhe. Nazapo kwaw ma'e amo awa puhe hezemuaïw kar pà Tupàn henataromo. A'e rupi nuzeapo kwaw ikatu 'ym ma'e ihewe ko 'y iro ma'e i'u mehe nehe. **20** Aze neremu'em, aze azeharomoete ereker amo puhe, ereiko ikatu 'ym ma'e romo Tupàn henataromo. **21** A'e mehe Tupàn Tuweharupi Wiko Ma'e umuawai putar nerer a'e nehe. Neànàm umume'u putar nerer ze'egaiw amo rehe imono mehe wà nehe. Nerie nememyr iapo haw uxinig putar newi nehe. Nerie hezun putar nehe. **22** Tuwe ko 'y wixe nerie pupe imuezun kar pà nehe. Tuwe nerie nememyr iapo haw uxinig newi nehe, i'i putar xaxeto kuzà pe nehe. Na'e kuzà uwazar putar iz'e'g izupe nehe. — Tuwe neremimume'u kwer uzeapo ihewe nehe, i'i putar izupe nehe.

**23** Na'e xaxeto umuapyk putar a'e ze'egaiw ma'epirer rehe nehe. A'e re uhez putar a'e ze'eg imuapyk pyrer 'yro pupe nehe. **24** A'e re u'u kar putar a'e 'yro ze'egaiw herur har kuzà pe nehe. Hahy putar tuwe kuzà hie pe nehe. **25** A'e 'ym mehe xaxeto upyro putar arozràn Tupàn pe imono pyr tewyrowyroahy haw rehe har kuzà ipo wi nehe. Upir putar imono pyr Tupàn Tuweharupi Wiko Ma'e henataromo nehe. Weraha putar ma'e'a'yr hapy haw pe nehe. **26** Na'e upyhyk putar opo ipor arozràn imono pyrer nehe. Wapy putar ma'e'a'yr hapy haw rehe nehe. Nezewa mehe ima'enukwaw a'e ma'e Tupàn pe imono awer rehe a'e nehe. Na'e u'u kar putar a'e 'y kuzà pe nehe. **27** Aze kuzà wiko amo awa puhe uker ma'e kwer romo nehe, aze na'likatu kwaw Tupàn henataromo nehe, a'e 'y wixe putar ipupe nehe. Hahy putar izupe nehe. Hie hezun

putar nehe. Hie umemyr iapo haw uxinig putar nehe. Wiko putar ze'egaiw hereko har wàñàm wainuiuromo nehe. **28** Aze kuzà nuiko kwaw amo puhe uker ma'e kwer romo nehe, a'e mehe a'e zepykaw nu'ar kwaw hehe nehe. Upuner umemyr wi haw rehe nehe.

**29** Amumé'u Tupàn ze'eg kuzà imen ma'e amo awa puhe oho ma'e kwer rehe har imen uzemupy'a ma'e rehe har kwez xe. **30** Aze ru'u awa wiko wemireko rehe uzemupy'a e ma'e romo. Weraha putar wemireko ma'e'a'yr Tupàn Tuweharupi Wiko Ma'e henataromo izuka haw pe nehe. Xaxeto weruzar putar ko ze'eg nehe. **31** Imen nuiko kwaw ikatu 'ym ma'e iapo har romo Tupàn henataromo nehe. Aze hemireko wiko tuwe a'e ma'e iapo arer romo nehe, zepykaw u'ar putar imen rehe zutyk a'e nehe.

### Nazirew wanupe ze'egaw

**6** **1** Tupàn Tuweharupi Wiko Ma'e uze'eg Moizez pe.

**2** — Eze'eg Izaew izuapyapyr wanupe nehe, ko hez'e'g imume'u pà wanupe nehe. — Awa a'e nehe, kuzà a'e nehe no, aze uzemume'u nazirew romo nehe, Tupàn Tuweharupi Wiko Ma'e pe uma'erekko ma'e romo nehe, **3** nu'u kwaw win nehe. Nu'u kwaw kàwiràn xeruwez her ma'e nehe no. Nu'u kwaw wyzài ma'e'a uwà her ma'e itykwer nehe. Nu'u kwaw uwà i'yw wi ipo'o romo pyrer nehe. Nu'u kwaw uwà kwarahy rehe uxinig ma'e kwer nehe. **4** Nazirew romo wiko mehe we nu'u kwaw ma'e uwà 'yw wi ur ma'e kwer nehe: ni hà'yzgwer, ni apirer.

**5** Nazirew romo wiko mehe we nonomonohok kwaw u'aw nehe. Nupin kwaw wamutaw nehe no. Uzemonokatu Tupàn pe ma'erekko haw rehe. Xo a'e ma'e zo uzapo putar nehe. Nuzapo kwaw amo ma'e nehe. I'aw ipuku putar tuwe nehe. Nonomonohok kwaw nazirew romo wiko mehe wà nehe.

**6-7** L'awpuku wexak kar putar Tupàn pe imonokatu haw purupe nehe. Tuwe nuzeapo kwaw Tupàn henataromo ikatu 'ym ma'e romo nehe. A'e rupi tuwe nuhem kwaw umàno ma'e kwer huwake nehe. Ni u

hetekwer huwake ni uhy hetekwer huwake ni wyky'yr, ni wywyr hetekwer huwake ni weinyr hetekwer huwake nuhem kwaw nehe. **8** Nazirew romo wiko mehe uzemonokatu putar Tupàn Tuweharupi Wiko Ma'e pe ma'erekohaw pe nehe.

**9** Aze amo umàno e na'rewahy huwake nehe, aze nezewemehe umuiaw i'aw nehe, a'e mehe 7 'ar pawire upin putar u'aw nehe. Upin putar wamutaw nehe no. Nezewe mehe ikatu wi putar Tupàn henataromo nehe no. **10** 8 haw 'ar mehe werur putar mokoz wiràmìri xaxeto pe tåpuzràñ Tupàn pe imonokatu pyrer pe teixe pe wà nehe: pykahuwà, aze ru'u pyku'i wà. **11** Xaxeto omono putar pitài Tupàn pe nehe, ikatu 'ymaw imunàñ kar haw romo nehe. Omono putar inugwer happy paw pyràm romo nehe. Nezewemehe Tupàn umunàñ putar umàno ma'e kwer huwake ihmawer nehe. A'e 'ar mehe we a'e nazirew omonokatu wi putar u'aw Tupàn pe nehe. **12** Na'e uzemonokatu wi putar Tupàn Tuweharupi Wiko Ma'e pe ima'erekohaw rehenehe. I'aw umumaw amo 'ar iaiw ma'e romo. U'ar ipapar mehe nupapar kwaw a'e 'ar nehe. Werur putar àràpuhàràñ hawitu ma'e pitài kwarahy hereko har wemipa kwer ikatu 'ym ma'e imunàñ kar haw romo nehe.

**13** Nazirew umumaw putar Tupàn pe uma'erekohaw 'ar a'e nehe. A'e 'ar mehe Tupàn uzapo kar ma'e izupe. Oho putar tåpuzràñ Tupàn pe imonokatu pyrer pe teixe haw pe nehe. **14** Omono putar na'iruz ma'e'yr ikatu 'ymaw hereko 'ymar Tupàn Tuweharupi Wiko Ma'e pe wà nehe: pitài àràpuhàràñ hawitu ma'e awa pitài kwarahy hereko har happy paw pyràm romo, àràpuhàràñ hawitu kuzà pitài kwarahy hereko har katu 'ygwer imunàñ kar haw romo, àràpuhàràñ hawitu ma'e awa Tupàn pe uzemuawye wi kar haw romo. **15** Omono putar kok ipor typy'ak imuapiruru kar 'ym pyrer izupe nehe: typy'ak uhu ma'e arozràñ imuku'i pyrer iapo pyrer uri kawer inuromo har, typy'ak pixik ma'e ipew ma'e. Xaxeto omono putar uri kawer pixik hehe nehe. Omono putar arozràñ Tupàn pe nehe. Omono putar win izupe nehe no.

**16** Xaxeto omono putar a'e ma'e paw Tupàn Tuweharupi Wiko Ma'e henataromo nehe. Omono putar ma'e katu 'ygwer imunàñ kar haw nehe. Omono putar ma'e happy paw pyràm nehe no. **17** Omono putar àràpuhàràñ awa Tupàn Tuweharupi Wiko Ma'e pe uzemuawye kar haw romo nehe. Omono putar typy'ak imuapiruru kar 'ym pyrer kok por izupe nehe no. Omono putar arozràñ izupe nehe. Omono putar win izupe nehe no. **18** Tåpuzràñ Tupàn pe imonokatu pyrer hukenaw pe nazirew upin putar wàkàg nehe. Upyhyk putar u'aw wer tata pe imono pà nehe, Tupàn imuawye kar haw happy haw pupe imono pà nehe.

**19** Umihir putar izywa kwer nehe. Na'e xaxeto upyhyk putar a'e ho'o kwer nazirew ipo pe imono pà nehe. Omono putar mokoz typy'ak kok pupe arer ipo pe nehe no: uhu ma'e, pixik ma'e no. (Uzapò putar a'e ma'e iákàg ipin ire nehe). **20** Na'e xaxeto omono putar a'e ma'e Tupàn Tuweharupi Wiko Ma'e pe nehe, imono pyr ikatuahy ma'e romo nehe. Xaxeto wiko putar a'e imono pyrer ikatuahy ma'e izar romo nehe. Upyhyk putar àràpuhàràñ ipux'a nehe. Upyhyk putar henugupy nehe no. Wiko putar a'e ma'e izar romo Tupàn ze'eg rupi katete nehe. A'e re nazirew upuner win i'u haw rehenehe.

**21** Amumaw a'e ze'eg Nazirew Tupàn Tuweharupi Wiko Ma'e pe uzemonokatu ma'e rehenehar imume'u haw kwez. Aze nazirew umume'u amo ma'e Tupàn pe nehe no, tuwe omono a'e ma'e wemimume'u kwer izupe nehe no.

### Xaxeto omono uze'egatu

#### teko wanehe wà

**22** Tupàn Tuweharupi Wiko Ma'e uze'eg Moizez pe.

**23** Eze'eg Àràw pe nehe, ta'yur wanupe nehe no. — Pemono ze'egatu teko Izaew izuapayapyr wanehe nehe.

**24** Tuwe Tupàn Tuweharupi Wiko Ma'e omono uze'egatu penehe nehe, pemonokatu pà nehe.

**25** Tuwe Tupàn Tuweharupi Wiko Ma'e penereko katu nehe. Tuwe pepuhareko katu nehe.

**26** Tuwe Tupàn Tuweharupi Wiko Ma'e ume'e penehe peamutar katu pà nehe. Tuwe umur zeàmàtyry'ym 'ymaw peme nehe, peze wanupe nehe, ere wanupe, i'i Tupàn Moizez pe.

**27** Uze'eg wi Tupàn. — Nezewe mehe Àràw a'e, ta'yri a'e wà no, wenoz putar heze'egatu Izaew wanehe imono pyràm wà nehe. Amono putar heze'egatu wanehe nehe.

### Teko wanuwihiaw wanemimono e

**7** **1** Moizez umumaw tåpuzràn Tupàn pe imonokatu pyrer imuàgà'y maw. A'e 'ar mehe we uzakook uri kawer hehe Tupàn ima'erekò haw pe imonokatu pà. Omonokatu tåpuzràn pupe har izupe paw rupi. Omonokatu ma'e'yr hapy haw rehe har paw izupe no. **2** Na'e uzeànàànàm ma'e wanuwihiaw a'e wà, Izaew izuapyapry wanuwihiaw a'e wà, teko wapapar har a'e wà, **3** werur ma'e imono pyr Tupàn Tuweharupi Wiko Ma'e pe wà: 6 ywyramawa ipyk pyrer, 12 tapi'ak wà. Mokoz tuwihiaw omono pitài ywyramawa pitàitåigatu wà. Pitàitåigatu omono pitài tapi'ak. Omono a'e ma'e paw tåpuzràn Tupàn pe imonokatu pyrer henataromo wà. **4** Tupàn Tuweharupi Wiko Ma'e uze'eg Moizez pe.

**5** — Epyhyk ywyramawa ne nehe. Epyhyk tapi'ak paw ne wà nehe no. Upyta putar tåpuzràn ihewe imonokatu pyrer rehe ma'erekò haw rehe wà nehe. Emono a'e ma'e Erewi izuapyapry wanupe nehe, wama'erekò haw romo pitàitåigatu nehe.

**6** Na'e Moizez omono ywyramawa Erewi izuapyapry wanupe. Omono tapi'ak wanupe wà no. **7** Omono mokoz ywyramawa 4 tapi'ak wanehe we Zeroxon izuapyapry wanupe wama'erekò awer hekuzaromo pitàitåigatu wà. **8** Omono 4 ywyramawa 8 tapi'ak wanehe we Merari izuapyapry wanupe wama'erekò awer hekuzaromo pitàitåigatu wà no. Itamar Àràw ta'yri uzapo a'e ma'e imono haw. **9** Moizez nomono kwaw ywyramawa Koat

izuapyapry wanupe. Ni tapi'ak nomono kwaw wanupe wà. Ta'e Tupàn weraha kar uma'e wanupe waxi'i rehe a'e wà xe.

**10** Tuwihiaw werur ma'e ma'e'yr hapy haw Tupàn pe imono haw rehe ima'enukwaw pà wà no. — Oromono putar ma'e Tupàn pe nehe kury, i'i wà. **11** A'e 'ar mehe we Tupàn uze'eg Moizez pe. — Tuwihiaw paw pitàitåigatu wà nehe, tuwe umur ma'e ihewe wà nehe, ma'e'yr hapy haw ihewe imur katu pà wà nehe.

**12-83** A'e 12 tuwihiaw omono uma'e nezewe wà: 'Ar ipy mehe Nazom Aminanaw ta'yri Zuta izuapyapry wanuwihiaw werur ma'e Tupàn pe. Mokoz haw 'ar mehe Netanew Zuar ta'yri Ixakar izuapyapry wanuwihiaw werur ma'e Tupàn pe. Nal'iruz haw 'ar mehe Eriaw Erom ta'yri Zemurom izuapyapry wanuwihiaw werur ma'e Tupàn pe. 4 haw 'ar mehe Erizur Xeneur ta'yri Humen izuapyapry wanuwihiaw werur ma'e Tupàn pe. 5 haw 'ar mehe Xerumiew Zurizanaz ta'yri Ximeàw izuapyapry wanuwihiaw werur ma'e Tupàn pe. 6 haw 'ar mehe Eriazap Newew ta'yri Kaz izuapyapry wanuwihiaw werur ma'e Tupàn pe. 7 haw 'ar mehe Erizàm Amiu ta'yri Eparai izuapyapry wanuwihiaw werur ma'e Tupàn pe. 8 haw 'ar mehe Kamariew Penazur ta'yri Manaxe izuapyapry wanuwihiaw werur ma'e Tupàn pe. 9 haw 'ar mehe Aminà Zineoni ta'yri Mezàmi izuapyapry wanuwihiaw werur ma'e Tupàn pe. 10 haw 'ar mehe Aiezer Amizanaz ta'yri Nà izuapyapry wanuwihiaw werur ma'e Tupàn pe. 11 haw 'ar mehe Paziew Okirà ta'yri Azer izuapyapry wanuwihiaw werur ma'e Tupàn pe. 12 haw 'ar mehe Aira Enà ta'yri Napitari izuapyapry wanuwihiaw werur ma'e Tupàn pe. Wanemirur paw uzuawygtu wà: Kawawpew pitài kir amo iku'aw har parat iapo pyrer. Kawawhu 800 kàràm parat iapo pyrer. Wexak ipuhuz haw tuwihiaw wama'e huwake wà. Kawawpew a'e, kawawhu a'e no, tynehem arozràn imuku'i pyrer uri kawer inuromo har pupe pitàitåigatu. Arozràn Tupàn pe imono pyr, i'i izupe wà. Amo ma'e werur wà no: pitài kawaw 115 kàràm or iapo

pyrer. Pitàitìagatu kawaw tynehem yhyk záwenugar pupe. Pitài tapi'aka'yr awa ipyahu ma'e hapy paw pyrám, pitài àràpuhàràñ hawitu ma'e awa hapy paw pyrám, pitài àràpuhàràñ hawitu ma'e awa pitài kwarahy hereko har hapy paw pyrám, pitài àràpuhàràñete awa katu 'ygwer imunàñ kar haw romo. Werur amo ma'ea'yr Tupàn imuawyze kar haw romo wà no. Mokoz tapi'ak awa wà: 5 àràpuhàràñ hawitu ma'e awa wà. 5 àràpuhàràñ hawitu ma'e awa pitài kwarahy hereko har wà.

**84-85** Izaew ta'yr wazuappyapyr wanuwihaw werur ma'e tetea'u Tupàn pe wà, ma'ea'yr hapy haw izupe imonokatu pà wà: 12 kawawhu parat iapo pyrer, 12 kawapew parat iapo pyrer. Heta 27,5 kir a'e parat ipuhuz haw a'e. **86** 12 kawaw or iapo pyrer. Heta 1,38 kir a'e or ipuhuz haw a'e. Tynehem a'e kawaw yhyk záwenugar pupe. **87** Werur ma'ea'yr tetea'u hapy paw pyrám romo wà no: 12 tapi'aka'yr awa wà. 12 àràpuhàràñ hawitu ma'e awa wà. 12 àràpuhàràna'yr hawitu ma'e awa wà. Arozràn a'e ma'ea'yr wanehe we har. 12 àràpuhàràñete awa katu 'ygwer imunàñ kar àwàm romo. **88** Werur ma'ea'yr tetea'u Tupàn pe uzemuawyze kar haw romo wà no: 24 tapi'ak awa wà, 60 àràpuhàràñ hawitu ma'e awa wà, 60 àràpuhàràñete awa wà, 60 àràpuhàràñ hawitu ma'e pitài kwarahy hereko har wà.

**89** Moizez wixe tåpuzràn Tupàn pe imonokatu pyrer pupe izupe uze'eg pà kury. Wixe mehe wenu Tupàn ize'eg mehe hyru ipykaw i'aromo har. Upyta mokoz kerumin wamyter pe ize'eg mehe. Nezewe Tupàn uze'eg Moizez pe tuweharupi.

**Tatainyhu hakamykamy ma'e huwa ma'e**  
**8** <sup>1</sup> Tupàn Tuweharupi Wiko Ma'e uze'eg Moizez pe.

**2** Eze'eg Àràw pe ko heze'eg imume'u pà izupe nehe. — **7** tatainy wanenaw rehe wamono mehe nehe, tuwe uhypate katu wenaw henataromo har rehe nehe, ere izupe nehe.

**3** Weruzar Àràw a'e ze'eg. Omonokatu tatainy a'e pe. Uhypate katu ywy wenaw

henataromo har rehe. Ta'e Tupàn umume'u nezewe haw iapo àwàm Moizez pe xe. **4** Teko umupànupà or a'e tatainy henaw iapo pà wà. Ivy pe har, ma'eputyr hagapaw hehe har a'e no, paw rupi or inupà pyrer romo a'e. Ta'e Tupàn Tuweharupi Wiko Ma'e wexak kar iapo àwàm Moizez pe a'e xe.

### **Erewi uzemonokatu uzemukatu pà wà**

**5** Tupàn Tuweharupi Wiko Ma'e uze'eg Moizez pe.

**6** — Emunyryk kar Erewi izuappyapyr amogwer Izaew izuappyapyr wanuwi ne wà nehe. Emukatu herenataromo ne wà nehe.

**7** Ezapo nezewe haw wamukatu pà nehe. Emupiripirik kar 'y herenataromo imukatu pyrer nehe, wanehe nehe. Tuwe upin wetekwer paw wà nehe. Tuwe uhez uma'e paw wà nehe no. Nezewe mehe wiko putar imukatu pyrer romo herenataromo wà nehe.

**8** Na'e epyhyk amo tapi'aka'yr awa nehe. Epyhyk arozràn ikatu wera'u ma'e imuku'i pyrer nehe. Emono uri kawer inuinuromo nehe. Emono a'e arozràn imur pyr tapi'aka'yr rehe we nehe. Epyhyk amo tapi'aka'yr awa katu 'ygwer imunàñ kar haw romo nehe. **9** A'e re emono'og teko Izaew izuappyapyr paw ne wà nehe. Emupu'äm kar Erewi izuappyapyr tåpuzràn Tupàn pe imonokatu pyrer henataromo ne wà nehe no. **10** Na'e teko Izaew izuappyapyr omono putar opo Erewi izuappyapyr waàkàg wanehe wà nehe.

**11** A'e pe Àràw umunyryk kar putar Erewi izuappyapyr ihewe wà nehe. Wiko putar Izaew wanemimur ikatuahy ma'e romo wà nehe, ihewe wà nehe. Nezewe mehe Erewi izuappyapyr upuner putar uma'erekò haw rehe ihewe wà nehe. **12** Erewi izuappyapyr omono putar opo mokoz tapi'ak awa waàkàg wanehe wà nehe. Uzuka putar pitài katu 'ygwer imunàñ kar haw romo wà nehe. Wapy putar inugwer uzemukatu kar pà herenataromo wà nehe. Ukaz paw putar nehe.

**13** Emunyryk kar Erewi izuappyapyr ihewe imur pyr ikatuahy ma'e romo ne wà nehe. Àràw a'e, ta'yr a'e wà no, wiko putar wanuwihaw romo wà nehe. **14** Emunyryk kar

Erewi izuapyapyr amogwer Izaew wanuwi ne wà nehe, hem'a'e romo wamuigo kar pà ne wà nehe. **15** A'e re eremukatu putar Erewi izuapyapyr ne wà nehe, wamunyryk kar pà ne wà nehe. Eremuhyk putar tåpuzràn ihewe imonokatu pyrer pupe ma'erekohaw pe nehe. **16** Amunyryk Izaew wanuwi hem'a'e romo ihe wà, Izaew wana'yr ipy wanekuzaromo ihe wà. Wiko hem'a'e romo wà. **17** Ezit ywy rehe har wana'yr ipy wazuka mehe amunyryk kar Izaew wana'yr ipy paw hezeupe ihe wà. Amunyryk kar ma'e'a'yr wamemyr ipy paw hezeupe ihe wà no. **18** Ko 'ar rehe areko Erewi izuapyapyr paw ihe wà kury, Izaew wana'yr ipy wanekuzaromo ihe wà kury. **19** Kutàri amono Erewi izuapyapyr Àràw pe ihe wà kury, ta'yr wanupe ihe wà no, Izaew wanemimiromo ihe wà. Uma'erekohaw putar tåpuzràn ihewe imonokatu pyrer pupe teko Izaew izuapyapyr wanekuzaromo wà nehe. Umunàn kar putar wanemipaço kwer ikatu 'ygwer ihewe wà nehe. Upyro putar Izaew iaiw haw wi wà nehe. Ta'e aze amo uhem herenaw ikatu ma'e huwake nehe, iaiw haw uezapo putar izupe nehe, i'i Tupàn.

**20** Nezewe Moizez a'e, Àràw a'e no, teko Izaew izuapyapyr paw a'e wà no, weruzar Tupàn Tuweharupi Wiko Ma'e ze'eg Moizez pe har Erewi izuapyapyr wanehe har a'e wà kury. **21** Erewi uzemukatu wà. Uhez uma'e wà no. Na'e Àràw umunyryk kar Tuweharupi Wiko Ma'e pe imono pyr ikatu ma'e romo wà no. Uzapo wamukatu haw wanupe. **22** Teko uzapo Tuweharupi Wiko Ma'e Moizez pe Erewi wanehe hemipaço kwer paw wà. Nezewe waxaexak tåpuzràn Tupàn pe imonokatu pyrer pupe uma'erekohaw ràm romo wà. Àràw a'e, ta'yr a'e wà no, wiko wanuwhiaw romo wà.

**23** Tupàn Tuweharupi Wiko Ma'e uze'eg Moizez pe.

**24** Na'aw Tupàn ze'eg Erewi wanehe har xe. — Wyzài Erewi izuapyr nehe, aze wereko 25 kwarahy nehe, uzypyrog putar tåpuzràn Tupàn pe imonokatu pyrer pupe uma'erekohaw rehe nehe. **25** 50 kwarahy hereko mehe

upytu'u putar ipupe uma'erekohaw nehe. **26** 50 kwarahy hereko re upuner uzehe we har wapytywà haw rehe wama'erekohaw tåpuzràn Tupàn pe imonokatu pyrer pupe har iapo mehe wà nehe. Nezewe rehe we nuiko kwaw a'e ma'e rehe uzekaiw ma'e romo wà nehe. Emuàgà'yim Erewi izuapyapyr wama'erekohaw nezewe nehe.

### Zanera'yr wazuka kar 'ymaw mokoz haw

**9** <sup>1</sup> Teko Izaew izuapyapyr Ezit ywy wi wahem ire pitài haw zahy rehe mokoz haw kwarahy rehe Tupàn Tuweharupi Wiko Ma'e uze'eg Moizez pe ywyxiguhu Xinaz her ma'e rehe a'e kury.

**2-3** 14 haw 'ar mehe kwarahy heixe mehe teko Izaew uzapo putar mynykawhu wa'yr wazuka 'ym awer her ma'e wà nehe. Weruzar putar heze'eg a'e ma'e rehe har paw wà nehe, i'i izupe.

**4** Na'e Moizez uzapo kar a'e mynykaw Izaew wanupe. **5** Uzapo 14 haw 'ar mehe pitài haw zahy rehe kwarahy heixe mehe we Xinaz ywyxiguhu rehe wà. Izaew uzapo Tupàn Tuweharupi Wiko Ma'e Moizez pe hemipaço kwer paw wà.

**6** Nezewe rehe we amo awa wiko ikatu 'ym ma'e Tupàn henataromo wà. Ta'e opokok umàno ma'e kwer rehe wà xe. A'e rupi nupuner kwaw mynykaw zanera'yr wazuka 'ym awer her ma'e iapo haw rehe a'e 'ar mehe wà. A'e rupi uze'eg oho Moizez pe Àràw pe wà. **7** — Na'urekatu kwaw Tupàn henataromo ure, ta'e oropokok umàno ma'e kwer rehe ure xe, i'i wanupe wà. — Aipo nurupuner kwaw ureremimono ràm Tuweharupi Wiko Ma'e pe imono haw rehe amogwer Izaew wanehe we ure nehe, 'ar imume'u pyrer rehe ure nehe, i'i wanupe wà.

**8** Na'e Moizez uwazar waze'eg wanupe. — Heràro pe nehe. Aze'eg putar aha Tuweharupi Wiko Ma'e pe nehe. Akwaw putar peme hemipaço kar nehe, i'i wanupe.

**9** Na'e Tupàn Tuweharupi Wiko Ma'e uze'eg Moizez pe.

**10** Emume'u ko heze'eg Izaew wanupe nehe. — Amo peinuromo har, amo pezuapyr, aze

wiko ikatu 'ym ma'e romo herenataromo umàno ma'e kwer rehe opokok ire nehe, aze ru'u amo wiko muite wata haw iapo pà nehe, nezewe rehe we upuner Izaew wana'yr wazuka 'ym awer iapo haw rehe nehe, Tupàn Tuweharupi Wiko Ma'e imuwete pà nehe.

**11** Pemumaw putar pitài zahy nehe. A'e mehe pezapo putar 14 haw 'ar mehe mokoz haw zahy rehe kwarahy heixe mehe we nehe. A'e 'ar mehe pe'u putar àràpuhàràn hawitu ma'e awa ho'o kwer typy'ak imuapiruru kar pyrer 'ym inuromo nehe, ka'a iro ma'e inuromo nehe.

**12** Tuwe naheta kwaw ikurer nehe. Tuwe naheta kwaw ikurer iku'egwer pe nehe. Tuwe napemonohok kwaw ni pitài ikagwer nehe. Pezapo a'e mynykaw Tupàn ze'eg a'e ma'e rehe har rupi katete nehe.

**13** Aze ru'u amo wiko putar ikatu ma'e romo Tupàn henataromo a'e 'ar mehe nehe. Aze ru'u amo ywy rehe nuwata kwaw a'e 'ar rehe nehe. Aze a'e teko nuzapo kwaw a'e mynykaw nehe, pemuhem kar teko wamyster wi nehe. Ta'e numur kwaw ihewe imur pyr i'ar katu mehe xe. Azepyk putar hehe hemiapo kwer ikatu 'ym ma'e hekuzaromo nehe.

**14** Aze amo ae ywy rehe arer peinuromo wiko ma'e ipurapo wer a'e mynykaw rehe nehe, tuwe weruzar heze'eg rehe har nehe. Amume'u heze'eg tekò nànàñ ihe, peywy rehe uzexak kar ma'e kwer wanupe, amo ywy rehe uzexak kar ma'e kwer wanupe no.

# *Ywàkun upyk tåpuzràn imonokatu pyrer a'e*

**15** Tàpuzràñ Tupàn p  imonokatu pyrer imuapykaw 'ar mehe amo yw kun ur ipyk p  a'e. Pyhaw nuzawy kwaw tata. **16** Tuweharupi uzexak kar nezewe: 'aromo amo yw kun upyk t puzr n. Pyhaw nuzawy kwaw tata. **17** Yw kun t puzr n wi izeupir mehe Izaew izuapyapyr uzypyrog wata p  w . Aze yw kun upytu'u wata re, Izaew uzapo uker haw a'e pe w . **18** Uzypyrog wata p  w . Aze ru'u uzapo uker haw w . Wyz i ma'e iapo mehe weruzar Tup n Tuweharupi Wiko Ma'e w . Upyta a'e pe aze yw kun upyta t puzr n

Tupàn pe imonokatu pyrer i'aromo. **19** Aze umumaw 'ar tetea'u tāpuzrān i'aromo Izaew weruzar Tupàn Tuweharupi Wiko Ma'e a'e wi uhem 'ym pà wà. **20** Amo upytu'u awer rehe ywākun umumaw māràmārān 'ar tāpuzrān i'aromo. Izaew weruzar Tuweharupi Wiko Ma'e ize'eg wà. Upyta a'e pe wà, uzypyrog wata pà wà. **21** Amo upytu'u awer rehe Uzypyrog upytu'u pà karuk mehe. Iku'egwer pe uezupir wi. Izeupir mehe uzypyrog wata pà wà. Tuweharupi aze ywākun uezupir, 'aromo, aze ru'u pyhaw, Izaew uzypyrog wata pà wà. **22** Aze umumaw mokoz 'ar tāpuzrān i'aromo upyta pà, aze ru'u umumaw pitái zahy, aze ru'u umumaw pitái kwarahy, aze upytu'u, a'e mehe Izaew upyta a'e pe wà. Nuypyrog kwaw wata pà wà. Aze uezupir, oho a'e wi wà. **23** Weruzar Tupàn Tuweharupi Wiko Ma'e ize'eg wà. Uzapo uker haw wà, aze ru'u uzypyrog wata pà wà. Izaew weruzar Tuweharupi Wiko Ma'e ze'eg Moizez pe imono pyrer wà.

## *Xi'äm parat iapo pyr*

**10** <sup>1</sup>Tupàn Tuweharupi Wiko Ma'e umume'u ko uze'eg Moizez pe.

2 — Enupànupà parat mokoz xi'äm ma'eay'r i'a kwer iapo pyrer zàwenuglar iapo pà nehe. Aze neporomono'og wer teko wanehe nehe, ezupy kar a'e xi'äm nehe. Aze nepureraha wer teko waker haw wi ne wà nehe, ezupy kar a'e xi'äm nehe. 3 Aze erezupy kar a'e mokoz xi'äm nehe, teko paw uzemono'og putar neruwake fàpuzràn Tupàn pe imonokatu pyrer pe teixe haw huwake nehe. 4 Aze erezupy kar xo pitài zo nehe, xo teko uzeànaànàm ma'e wanuwiham uzemono'og putar nerehe we wà nehe. 5 Aze upyahy na'arewahy har romo nehe, Izaew ta'y'r wazuapyapyr kwarahy ihemaw kutyr har uzypyrog putar uhemaw rehe wà nehe. 6 Aze upy nezewegatete mokoz haw wà nehe, Izaew ta'y'r wazuapyapyr kwarahy ihemaw awyze har kutyr har uzypyrog putar uhemaw rehe wà nehe. Ipyahy haw na'arewahy har henu mehe uhem putar oho wà nehe. 7 Aze neporomono'og wer teko wanehe nehe,

ezupy kar àrewa'u nehe. **8** Xaxeto Àràw izuapyapyr upy putar a'e xi'am wà nehe. Izaew weruzar putar ko ze'eg tuweharupi wà nehe. **9** Aze peàmàtyry'yam amo teko peywy rehe pe wà nehe, aze pezepyro peiko peàmàtyry'ymar penehe ipuruzuka wer ma'e wanuwi nehe, pezupy kar a'e xi'am peànàm zauxiapekwer wamono'og kar pà nehe. Ihe Tupàn Tuweharupi Wiko Ma'e pezar apuputywà putar peàmàtyry'ymar wanuwi pepyro pà ihe nehe. **10** Aze penurywete nehe, aze pezapo mynykaw zahy pyahu rehe nehe, aze ru'u pezapo amo mynykaw nehe, pezupy a'e xi'am ma'e hapy paw pyr imur mehe nehe, ma'e hemuawyze kar haw imur mehe nehe no. Aiko Tuweharupi Wiko Ma'e pezar romo ihe.

### *Izaew utyryk Xinaz ywytyr wi wà*

**11** Teko Ezit ywy wi wahem ire mokoz haw kwarahy rehe mokoz haw zahy rehe 20 haw 'ar mehe ywàkun uezupir tåpuzràn Tupàn pe imonokatu pyrer wi a'e kury. **12** A'e 'ar mehe we Izaew uzypyrog wata pà wà, Xinaz ywyxiguhu wi uhem pà wà. Ywàkun upytu'u Pàrà ywyxiguhu rehe kury.

**13** Nezewe uzypyrog wata pà Tupàn Tuweharupi Wiko Ma'e ze'eg Moizez pe imono pyrer rupi katete wà. **14** Izypy mehe pànuhu Zuta her hereko har iwype har uhem a'e wi wà. Uhem amo uzemono'og ma'e wà. Na'e uhem amo uzemono'og ma'e wà no. Nezewe uhem paw rupi wà. Nazom Aminanaw ta'yr wiko wanuwhaw romo. **15** Netanew Zuar ta'yr wiko Ixakar izuapyapyr wanuwhaw romo. **16** Eriaw Erom ta'yr wiko Zemurom izuapyapyr wanuwhaw romo.

**17** Umuàgà'yam tåpuzràn Tupàn pe imonokatu pyrer wà. Na'e Erewi izuapyapyr Zeroxon iànàm wà, Merari iànàm wà no, uhem a'e wi tåpuzràn Tupàn pe imonokatu pyrer heraha pà wà.

**18** Na'e pànuhu Humen her hereko har iwype har uhem a'e wi wà. Uhem amo uzemono'og ma'e wà. Na'e uhem amo uzemono'og ma'e wà no. Nezewe uhem paw rupi wà. Erizur Xeneur ta'yr wiko

wanuwhaw romo. **19** Xerumiew Zurizanaz ta'yr wiko Ximeàw izuapyapyr wanuwhaw romo. **20** Eriazap Newew ta'yr wiko Kaz izuapyapyr wanuwhaw romo.

**21** Na'e uhem Erewi izuapyapyr Koat iànàm wà kury, ma'e Tupàn pe imonokatu pyrer heraha pà wà kury. Uker àwàm pe uhem mehe umupu'am tåpuzràn Tupàn pe imonokatu pyrer a'e pe wà.

**22** Na'e pànuhu Eparai her hereko har iwype har uhem a'e wi wà. Uhem amo uzemono'og ma'e wà. Na'e Uhem amo uzemono'og ma'e wà no. Nezewe uhem paw rupi wà. Erizàm Amiu ta'yr wiko wanuwhaw romo.

**23** Kamariew Penazur ta'yr wiko Manaxe izuapyapyr wanuwhaw romo. **24** Aminà Zineoni ta'yr wiko Mezàmi izuapyapyr wanuwhaw romo.

**25** A'e re amogwer Izaew izuapyapyr paw wanaikweromo uhem pànuhu Nà her hereko har iwype har a'e wi wà. Uhem amo uzemono'og ma'e wà. Na'e uhem amo uzemono'og ma'e wà no. Nezewe uhem paw rupi wà. Aiezer Amizanaz ta'yr wiko wanuwhaw romo. **26** Paziew Okirà ta'yr wiko Azer izuapyapyr wanuwhaw romo.

**27** Aira Enà ta'yr wiko Napitari izuapyapyr wanuwhaw romo. **28** Izaew uzypyrog wata pà nezewe wà. Pitàitaigatu uzypyrog wànàm wanehe we wata mehe wà.

### *Ezur herupi ty, i'i Moizez Omaw pe*

**29** Uze'eg Moizez wemireko ikywyr pe kury. Omaw Zetero ta'yr her romo a'e. Minìà ywy reher arer romo hekon. — Tupàn Tuweharupi Wiko Ma'e uze'eg nezewe urewe a'e. — Amono putar amo ywy peme nehe, i'i urewe. Zahem putar zaha a'e ywy kutyr kury. — Amuigo kar putar Izaew teko hemetarer katu ma'e romo ihe wà nehe, i'i urewe. A'e rupi ko ze'eg amume'u newe kury. — Ezur urerupi nehe. Ximuza'aza'ak putar ikatu ma'e zaneremipyhyk ràm nehe, i'i izupe.

**30** Uwazar Omaw Moizez iz'e'eg izupe. — Nan. Azewyr putar heywy pe nehe, heànàm wanupe nehe, i'i izupe.

**31** — Echo zo nehe, i'i Moizez izupe.  
— Erekwaw ywyxiguhu. Erekwaw ker haw ikatu ma'e. Erepuner urerape rám hexak kar har romo nerekohaw urewe. **32** Azeerezur urerupi nehe, ximuza'aza'ak putar ma'e Tupàn Tuweharupi Wiko Ma'e hemimur ram paw rupi nehe.

### *Tupàn umuata kar teko Izaew wà*

**33** Nezewe Izaew uhem oho Xinaz ywytyr Tupàn Tuweharupi Wiko Ma'e henaw wi wà. Urumaw na'iruz 'ar wata pà wà. Tupàn Tuweharupi Wiko Ma'e ze'eg hyru oho wanenataromo tuweharupi waker haw hexak kar pà wanupe. **34** Wahem mehe ywàkun Tupàn Tuweharupi Wiko Ma'e heko haw hexak kar har upyta wa'aromo 'aromo a'e.

**35** Tuweharupi Tupàn Ze'eg Hyru iho mehe Moizez umume'u ko ze'eg a'e. — O Tupàn Tuweharupi Wiko Ma'e, epu'am neàmàtyry'ymar wamuhàmuhàz pà nehe. Tuwe nerehe iakatuwawahy 'ym ma'e uzàn neranatar wi wà nehe, i'i izupe. **36** Tupàn Ze'eg Hyru ipytu'mehe tuweharupi Moizez umume'u ko ze'eg. — O Tupàn Tuweharupi Wiko Ma'e, ezewyr Izaew izuapypyrapr waànàànàm wainuinuromo epyta pà nehe, i'i izupe.

### *Tamera pe teko wikwahyahy wà*

**1** **1** Na'e zawaiw katu Izaew waneko haw kury. A'e rupi uzypyrog Tupàn Tuweharupi Wiko Ma'e rehe uze'eg zemueteahy haw rehe wà kury. Waze'eg henu mehe Tuweharupi Wiko Ma'e wikwahy wanupe. Umu'ar kar tata wanehe. Tata ukaz wamyter pe waker haw ipehegwer hapy pà. **2** Na'e teko uhapukaz upytwà awàm henoz pà Moizez pe wà. Moizez uze'eg Tupàn Tuweharupi Wiko Ma'e pe. Na'e tata uwew. **3** A'e rupi omono Tamera a'e ywy pehegwer her romo wà, ta'e Tupàn Tuweharupi Wiko Ma'e hata ukaz wamyter pe a'e pe xe. — Tata, i'i her zaneze'eg rupi.

### *Wexaexak Moizez 70 upytwà àràm wà*

**4** Heta amo ywy rehe arer Izaew wanupi wata ma'e wà. Uhez tuwe ma'ero'okwer wà. Te Izaew uzypyrog uma'hez haw imume'u pà wà no. — A, aze mo heta ma'ero'o kwer pixik zaneremi'u rám romo, i'i wà. **5** — Ezit ywy rehe xi'u ipira. Te zanerewykàtà. Nahekuzar kwaw. Azeharomoete xiuhez temi'u a'e pe har: pipin, meràw, ka'a i'u pyr, ma'ywanem xemor her ma'e, ma'ywanem az her ma'e. **6** Upaw zanekàgaw kwez kury. Naheta kwaw i'u pyr. Xo mana zo xixak.

**7** Mana nuzawy kwaw ma'eà'yz pixika'i ma'e xig izu wewer ma'e. **8-9** U'ar pyhaw zuwiri inuinuromo. Iku'egwer pe teko uhem oho imono'og pà uker haw izywyr wà. Umuku'iku'i wà. Aze ru'u oxooxok ygu'a pupe wà. Umupupur zapopo pupe wà. Uma'ema'e a'e mana typy'ak ipew ma'e iapo pà wà. Hete haw nuzawy kwaw typy'ak uri kawer inuromo imihih pyrer hete haw.

**10** Na'e Moizez wenu teko wazai'o mehe a'e wà. Teko uza'i'o wàpuzràñ pupe teixe haw pe pitàitâigatu wà. Tuweharupi Wiko Ma'e wikwahy. Moizez wikwahy a'e no.

**11** A'e rupi Moizez uze'eg Tupàn pe. — Mâràzàwe tuwe hererekohy pe nezew. Mâràzàwe tuwe erekwahy ihewe. Mâràzàwe tuwe hemuigo kar ma'erekohaw zawaiw katu wera'u ma'e ihewe. Mâràzàwe tuwe hemuigo kar pe 'aw teko paw wanuwihiaw romo. **12** Nazapo kwaw 'aw teko ihe wà. Namuzexak kar kwaw ihe wà. Mâràzàwe tuwe hemuigo kar pe wanehe uzekaiw ma'e zàwenugah romo. Araha he'waromo kwarera'i ài ihe wà, ywy waipy pe neremimono kwer kutyr ihe wà. **13** Ma'e pe apyhyk putar ma'ero'o kwer 'aw teko wanupe nehe. Heta teteau' wà. Ur heruwake uza'i'o pà wà. — Uruhez ma'ero'o kwer, i'i ihewe wà. **14** Ihe zutuka'i napuner kwaw 'aw teko wanehe hezekaiw haw rehe ihe. Heta teteau' ihewe wà. **15** Aze hererekohy pe nezewne nehe, hepuhareko pe hezuka pà nehe. Aze hekatu newe, epuraraw kar zo ma'erahy nezewne ihewe nehe, i'i izupe.

**16** Tupàn Tuweharupi Wiko Ma'e uwazar Moizez ize'eg izupe kury. — Emono'og 70 awa teko Izaew wanuwihiaw ihewe ne wà nehe. Eraha tåpuzràn ihewe imonokatu pyrer pe ne wà nehe. Epyta a'e pe wanehe we nehe. **17** A'e mehe awezyw putar wanupe heze'eg pà nehe. Amunyryk putar herekwe ikurer newe imono pyrer newi nehe, wanupe imono pà nehe. Nezewe mehe nepetywà putar teko wanehe nezekaiw mehe a'e wà nehe. Ipuhuз katu a'e ma'erekohaw. Ne zutyska'i nerepuner kwaw iapo haw rehe nehe. A'e 70 awa nepetywà putar wà nehe. **18** Emume'u ko heze'eg teko wanupe nehe kury. — Pezemukatu nehe. Nezewe mehe pyhewe pekatu putar herenataromo nehe. Pe'u putar ma'ero'o kwer nehe. Tupàn Tuweharupi Wiko Ma'e penenu pezai'o mehe a'e, ma'ero'o kwer izuhez haw imume'u mehe a'e, Ezit ywy reh peneko katu haw imume'u mehe a'e. A'e rupi Tupàn Tuweharupi Wiko Ma'e umur putar ma'ero'o kwer peme nehe. Pe'u putar nehe. **19** Napemumaw kwaw xo pitai' ar zo i'u pà nehe. Napemumaw kwaw xo mokoz' ar zo i'u pà nehe. Napemumaw kwaw xo 5' ar zo i'u pà nehe. Napemumaw kwaw xo 10' ar zo i'u pà nehe. Napemumaw kwaw xo 20' ar zo i'u pà nehe. **20** Pemumaw putar pitai' zahy i'u pà nehe. Te uehem putar peapygwar rupi nehe. Pezewaru putar izuwi nehe. Pehuhuk putar hexak mehe nehe. Ta'e peityk Tupàn Tuweharupi Wiko Ma'e pemyter pe har pe xe. Ta'e peze'eg zemueteahy hehe xe. — Aze mo nazahem iwer Ezit ywy wi, peze izupe, ere wanupe nehe.

**21** Uze'eg Moizez. — Araha 600.000 awa wanerekoh ihe wà. — Amono putar ma'ero'o kwer tetea'u wanupe nehe. Umumaw putar pitai' zahy i'u pà wà nehe, ere kwez ihewe. **22** Ma'e pe heta àràpuhàràn hawitu ma'e tetea'u izuka pyràm wà. Ma'e pe heta tapi'ak 'aw teko wamuewykàtà kar àràm wà. Aze mo omono'og pira yryhu pe har paw, aipo uhyk mo, i'i izupe.

**23** Na'e Tupàn Tuweharupi Wiko Ma'e uwazar Moizez ze'eg izupe. — Aipo aiko ikàg 'ym ma'e romo nezewe ihe. Tàrtiyaki'

erexak putar hepuner haw nehe kury. Na'arewahy erexak putar uezapo ma'e ràm nehe kury, i'i izupe.

**24** Na'e Moizez umume'u Tupàn Tuweharupi Wiko Ma'e ize'eg awer teko wanupe kury. Omono'og 70 teko wanuwihiaw wà. Umupù'am kar a'e awa tåpuzràn Tupàn pe imonokatu pyrer izywyr wà. **25** Na'e Tuweharupi Wiko Ma'e wezyw ywàkun pupe Moizez pe uez'eg pà kury. Ozo'ok wekwe kurer Moizez pe wemimono kwer izuwi, a'e 70 wanupe imono pà. Tekwe wanehe tur mehe uzypyrog uez'eg pà wahy haw rupi Tupàn ze'eg imume'u har zàwe wà. Nan kwehe tete upytu'u wà.

**26** Amo mokoz a'e 70 wanehe we har tuwihiaw upyta teko waker haw pe wà. Noho kwaw tåpuzràn Tupàn pe imonokatu pyrer pe wà. Ewnaz awa ipy her romo. Menaz inugwer her romo. Tupàn Hekwe ur wanehe. Uzypyrog uez'eg pà Tupàn ze'eg imume'u har zàwe wà. **27** Na'e amo kwàkwàmo uzàn oho Moizez pe. — Ewnaz a'e, Menaz a'e no, uez'eg waiko Tupàn ze'eg imume'u har zàwe teko waker haw myter pe wà. **28** Na'e Zuzue Nun ta'yr a'e, kwàkwàmo romo heko mehe arer Moizez ipetywà har a'e, uez'eg nezewe a'e. — Moizez heruwihiaw, emupytu'u kar nezewe waze'eg ire ne wà nehe, i'i izupe.

**29** Na'e uwazar ize'eg izupe. — Nema'enukwaw zo hereko haw rehe nehe. Ihe hemá'enukwaw hereko haw rehe ihe. Aze mo Tupàn Tuweharupi Wiko Ma'e umur wekwe 'aw teko nàñàñ, ikatu mo ihewe. Aze mo umuigo kar uez'eg imume'u har romo paw rupi wà, ikatu mo ihewe, i'i.

**30** Na'e Moizez a'e, a'e 70 tuwihiaw a'e wà no, uzewyr teko waker haw pe wà.

### *Tupàn umur kar wiràmiri konor her ma'e a'e wà*

**31** A'e 'ar mehe we Tupàn Tuweharupi Wiko Ma'e umur kar ywytu yryhu wi a'e pe kury. Ywytu werur wiràmiri konor her ma'e tetea'u uzemono'og pyrer a'e pe wà. U'ar teko waker haw nàñàñ wà. U'ar izywyr katu wà no. Aze amo umumaw 30 kirom wata

pà, nupaw kwaw wà. Upyk ywy ywytyr tetea'u iapo pà wà. Heta ru'u pitài met aihaw pe. **32** Nezewe umumaw a'e 'ar wà. Umumaw pytun gatu wà no. Umumaw amo 'ar wà no, uma'ereko pà konor wamono'og pà wà. Pitàitâigatu omono'og 1.000 kir wà. Umuhàmuhaž uker haw izywyr wanuxinig kar pà wà. **33** Wano'o kwer heta tetea'u mehe we Tupàn Tuweharupi Wiko Ma'e wikkwahy teko wanupe kury. Uzepyk wanehe ma'eahy haw iaiw ma'e imono pà wanupe. Umàno teko tetea'u wà. **34** A'e rupi Kimorot-Atawa i'i a'e ywy pehegwer pe wà. — Ma'e putar haw izutym awer, i'i zaneze'eg rupi. Ta'e uzutym teko ma'ero'o kwer hemimue'o kar kwer a'e pe wà xe.

**35** A'e re Izaew oho Azerot pe uker haw iapo pà a'e pe wà kury.

### Mirià rehe zepykaw

**12** <sup>1</sup>Moizez wereko amo kuzà Exio ywy rehe arer wemireko romo. Mirià a'e, Àràw uze'egahy izupe hereko awer rehe wà. **2** — Aipo xo Moizez pe zo Tupàn Tuweharupi Wiko Ma'e umume'u kar uze'eg a'e. Aipo numume'u kar kwaw zanewe a'e no, i'i wà. Tupàn Tuweharupi Wiko Ma'e wenu waze'eg mehe a'e. **3** (-Aiko upuner wera'u ma'e romo, ni'i kwaw Moizez. — Aiko ikàg ym ma'e romo ihe, i'i uezupe.)

**4** Nan kwehe tete Tupàn Tuweharupi Wiko

Ma'e uze'eg Moizez pe, Àràw pe no, Mirià pe no. — Pehem tâpuzràn ihewe imonokatu pyrer pe nehe, i'i wanupe. Oho wà.

**5** Tuweharupi Wiko Ma'e wezyw ywàkun upu'äm ma'e pupe kury. Upyta tâpuzràn pe teixe haw huwake. Na'e wenoz Àràw imuwa. Wenoz Mirià imuwa no. Wahem mehe

**6** Tupàn uze'eg wanupe. — Peinu peme heze'eg àwàm nehe. Heze'eg imume'u har peinuromo waneta mehe azexak kar wanupe wapuahu mehe ihe. **7** Nazapo kwaw nezewehaw heremiruze'eg Moizez pe. Ta'e amuigo kar teko heremiaihu paw wanuwhaw romo ihe xe. **8** Aze'eg izupe henataromo ihe. Aze'eg tuwe izupe. Nazumim kwaw hema'enukwaw paw izuwi. Amume'u tuwe. Te herexakaw

wexak a'e no. Mâràzàwe tuwe napekyze kwaw ihewi. Mâràzàwe tuwe peze'eg heremiruze'eg Moizez kutyr.

**9** Na'e Tupàn Tuweharupi Wiko Ma'e oho a'e wi wanupe wikkwahy pà kury. **10** Ihem ire ywàkun tâpuzràn i'aromo har ukàzym. A'e 'ar mehe we amo iperewaiw haw uehem Mirià pe. Xigatu ipir amanezu ài. Àràw ume'e Mirià rehe. — Azeharomoete iperewahy a'e, i'i izupe. **11** Na'e Àràw uze'eg Moizez pe. — Urere'o mehe uruzapo ikatu 'ym ma'e. Emuzepyk kar zo Tupàn urerehe hekuzaromo nehe. **12** Amo kuzà imemyr uzexak kar umàno ma'e kwer romo a'e wà. Hetekwer nuhyk kwaw izexak kar mehe wà. Emuigo kar zo Mirià agwer ma'e romo nehe, i'i izupe.

**13** Na'e Moizez uze'eg Tupàn Tuweharupi Wiko Ma'e pe kury. — O Tupàn, ainoz imukatu àwàm newe kury, i'i izupe.

**14** Tuweharupi Wiko Ma'e uwazar Moizez ze'eg izupe. — Aze mo Mirià tu uzenymon huwa rehe, aipo numumaw iwer mo 7 'ar umaranugar pà. A'e rupi, pemuhem kar peneko haw wi nehe. Tuwe umumaw 7 'ar a'e pe nehe. A'e re perur wi nehe.

**15** Nezewe mehe Mirià umumaw 7 'ar katupé teko waker haw wi nehe. Teko nuhem kwaw a'e wi wà. Uker haw pe herur wi ire zo uehem oho a'e wi wà.

**16** A'e re teko uehem Azerot wi wà. Uzapo uker haw Pàrà ywyxiguhiu rehe wà.

### Ywy rehe ume'e ma'e wà

**13** <sup>1</sup>Tupàn Tuweharupi Wiko Ma'e uze'eg Moizez pe.

**2** — Emono kar amo awa Kànà ywy rehe wamumé'e kar pà ne wà nehe. Amono putar a'e ywy Izaew wanupe ihe nehe. Exaexak pitài awa Zako ta'yir wazuapyapry wainuromo har wanuwi pitàitâigatu ne wà nehe. Tuwe a'e awa pitàitâigatu wiko wànàm wanuwhaw romo wà nehe, i'i izupe.

**3** Ywyxiguhiu Pàrà her ma'e wi Moizez omono kar a'e awa a'e ywy rehe ume'e ma'e ràm romo a'e wà kury, Tupàn Tuweharupi Wiko Ma'e ize'eg rupi katete a'e wà kury. Pitàitâigatu wiko wànàm wanuwhaw romo

wà. **4-15** Na'aw waner xe ko pape rehe wà. (Amume'u putar Izaew ta'yr izuapyapyr waner nehe. A'e re amume'u putar wanuwihaw her nehe.) Humen: Xamua Žakur ta'yr, Ximeàw: Xapa Ori ta'yr, Zuta: Karew Zepona ta'yr, Ixakar: Igaw Zuze ta'yr, Eparai: Ozez Nun ta'yr, Mezami: Pawxi Hapu ta'yr, Zemurom: Kaniew Xoni ta'yr, Manaxe: Kani Xuzi ta'yr, Nà: Amiew Kemari ta'yr, Azer: Xetur Mikaew ta'yr, Napitari: Nawi Wopixi ta'yr, Kaz: Kawew Maki ta'yr.

**16** Moizez omono kar a'e awa a'e ywy rehe wamume'e kar pà. Omono amo her Ozez Nun ta'yr pe. Zuzue, i'i izupe kury. **17** Moizez omono kar a'e awa Kànàà ywy hexak katu kar pà wanupe a'e wà. Wamono kar mehe uze'eg nezewe wanupe. — Peho ywy pehegwer kwarahy hemaw awyze har kutyr har rehe nehe. Pezeupir ywytyruhu rehe nehe. **18** Peme'egatu ywy rehe. Pexak hehe har nehe no. Pexak teko hehe har ikàgaw nehe. Aipo ikàg wà. U na'ikàg kwaw wà. Pexak waneta haw nehe no. Aze ru'u heta tetea'u wà. Aze ru'u naheta tete kwaw wà. **19** Peme'e waneko haw ywy ikatu haw rehe nehe no. Aipo ikatuahy. U iaiw aipo. Peme'e tawhu wanehe nehe no. Aipo heta pàrirogaw aiha ma'e waiwyr. **20** Peme'e ywy rehe nehe. Aipo hezuz katu ma'e hehe. U nàñ. Aipo heta ka'a. Aipo heta ka'akyr. Pekàg pekyze 'ym pà nehe, amo ma'ywa a'e pe har herur pà ihewe nehe, i'i wanupe. (A'e 'ar mehe a'e ywy rehe har uzypyrog uwà ipo'o pà a'e wà.)

**21** Na'e a'e awa oho a'e ywy rehe ume'e pà a'e wà kury. Uzypyrog ywyxiguhu Zim her ma'e pe wà. Oho te Heow pe wà. Amat pe zeupir haw huwake tuz Heow a'e. **22** Uzeupir ywy kwarahy ihmaw awyze har kutyr har rupi wà. Na'iruz awa wiko a'e pe wà. Aimà, Xezaz, Tawmaz waner wà. Wiko aiha katu ma'e Anak her ma'e izuapyapyr romo wà. (Teko a'e ywy rehe har uzapo Emerom tawhu wà. Na'e upaw 7 kwarahy. A'e re Ezit ywy rehe har uzapo Zuwà tawhu wà.) **23** Na'e a'e 12 awa uhem Erekow ywyàpyznaw pe wà kury. Omonohok amo uwà 'yw hàkà wà. Heta uwà haryw hehe.

Mokoz awa weraha a'e haryw ywyra rehe imuzaiko pyrer wà. Upyhyk homà 'a kwer wà. Upyhyk pi 'a kwer wà no. **24** Erekow ywyàpyznaw, i'i a'e ywy pehegwer pe wà. Ta'e omonohok uwà haryw a'e pe wà xe. — Uwà haryw i'i her zaneze'eg rupi.

**25** Umumaw 40 'ar ywy hexak pà wà.

**26** Na'e uzewyr Kanez Pàrà ywyxiguhu pe har pe wà, Moizez ipyta haw pe wà. Àràw wiko a'e pe Izaew paw wapyr a'e no. Umume'u wemixak kwer wanupe wà, teko paw wanupe wà no. Wexak kar temi'u a'e ywy rehe arer herur pyrer wanupe wà no.

**27** Uze'eg Moizez pe wà. — Uremono kar pe amo ywy rehe ne. Oroho a'e ywy rehe ure. Azeharomoete ikatuahy ywy. Hezuz katu ma'e a'e pe. Aze ereme'e ko hezuz ma'e kwer rehe nehe, erepuner putar ywy ikatu haw hexakaw rehe nehe. **28** Teko a'e pe wiko ma'e ikàg a'e wà. Uhua'u tawhu wà. Heta pàrirogaw aiha ma'e waiwyr. Uruexak teko aiha katu ma'e wazuapyapyr ure wà no.

**29** Amarek ywy rehe har wiko ywy kwarahy hemaw awyze har kutyr har rehe wà. Ete izuapyapyr wà, Zepu izuapyapyr wà no, Amohe ywy rehe har wà no, wiko ywytyruhu rehe wà. Kànàà izuapyapyr wiko yryhu Mezitehàñ her ma'e ruwake wà, yrykaw Zotàw her ma'e iywr wà no, i'i izupe wà.

**30** Na'e teko uzypyrog Moizez pe uze'eze'egahy pà wà kury. Umupytu'u kar Karew waze'eg ire wà. Uze'eg wanupe.



— Xiàmàtyry'ym zaha ko 'ar rehe zane wà nehe kury. Xipyhyk waiwy wanuwi nehe. Zanekàg zane. Zapuner putar wanetykaw rehe nehe, i'i wanupe.

**31** Amogwer awa hupi oho ma'e kwer uze'eg wà kury. — Nan. Nazapuner kwaw a'e teko wanetykaw rehe nehe, ta'e ikàg wera'u zanewi a'e wà xe, i'i wà.

**32** Umuhàmuhàz wemu'emaw Izaew wainuiuromo wà, ywy wemixak kwer rehe wà. Uze'eg nezewe wà. — Ywy na'ikatu kwaw, i'i mua'u wà. — Teko ima'uhez wà, ta'e nahezuz katu kwaw ma'e ywy rehe xe. Awa a'e pe har iaíha katu a'e wà. **33** Uruxak awa aiha katu wera'u ma'e a'e pe ure wà. Anak izuapyapyr romo wanekon wà. Uruiko tukur ài wanuwake ure. — Tukur aipo wà, i'i mo urewe wà.

### **Wikwahyahy teko wà**

**14** **1** A'e rupi a'e 'ar mehe pyhaw teko paw uhapukaz uzai'o pà wà. **2** Izaew paw uze'eg zemueteahy Moizez pe Àràw pe wà. — Aze mo zàmàno Ezit ywy rehe ikatu wera'u mo. Aze mo zàmàno ko ywyxiguhu rehe, ikatu wera'u mo. **3** Màràzàwe tuwe Tupàn Tuweharupi Wiko Ma'e zanererur xe ko ywy rehe a'e. Zauxiapakwer zanezuka putar wà nehe. Upyhyk putar zaneremireko wà nehe, zanera'yàr wà nehe no. Ezit pe zanezewyr haw ikatu wera'u mo zanewe, i'i wanupe wà.

**4** Uze'eg nezewe uzeupeupe wà. — Xixak putar amo ae awa zaneruwhaw romo nehe. Zazewyr Ezit pe nehe, i'i uzeupeupe wà.

**5** Na'e Moizez wapyk upenàràg rehe Àràw rehe we teko paw wanenataromo uwa imuhyk pà ywy rehe wà kury. **6** Zuzue Nun ta'yàr a'e, Karew Zepone ta'yàr a'e no, ywy hexak arer romo wanekon amogwer tuwhaw wainuromo a'e wà. Umu'i ukamir puku uzemumikahy haw hexak kar pà wà kury. **7** Uze'eg teko wanupe wà. — Ywy ureremixak kwer ikatuahy a'e. **8** Aze Tupàn zanepytywà nehe, zanemuixe kar putar hehe nehe. Umur putar a'e ywy zanewe nehe. Ikatuahy a'e. Hezuz katu ma'e hehe. **9** Peiko zo Tupàn Tuweharupi Wiko Ma'e heruzar

'ymar romo nehe. Pekyze zo teko a'e ywy rehe har wanuwi nehe. Nazawaiw kwaw waneityk àwàm zanewe nehe. Tupàn Tuweharupi Wiko Ma'e wiko zanerehe we a'e. Weityk tupàn a'ua'u a'e teko wanehe uzekaiw ma'e wà. A'e rupi pekyze zo nehe, i'i wanupe wà.

**10** Nezewe rehe we teko ipuruzuka wer wanehe ita tetea'u pupe waapiapi pà wà. Nupuner kwaw wà. A'e 'ar mehe we teko paw wexak Tupàn Tuweharupi Wiko Ma'e izexak kar haw heny katu haw wà kury. Uptya tapuzràn Tupàn pe imonokatu pyrer i'aromo.

### **Moizez wenuz ze'egatu haw teko wanehe**

**11** Tupàn Tuweharupi Wiko Ma'e uze'eg Moizez pe kury. — Máràn 'ar 'aw teko umumaw putar heputar 'ym pà wà nehe. Máràn 'ar umumaw putar herehe uzeruzar 'ym pà wà nehe. Azapo purumuhegatu kar haw tetea'u wainuiuromo ihe. Nezewe rehe we nuzeruzar kwaw herehe wà. **12** Amono kar putar ma'eahy uhua'u ma'e wanehe nehe, wamumaw pà nehe. Amuigo kar putar nezuapyapyr teko ikàg ma'e romo ihe wà nehe. Nezuapyapyr ikàg wera'u putar wanuwi wà nehe, i'i Tupàn Moizez pe. **13** Uwazar Moizez Tupàn Tuweharupi Wiko Ma'e ze'eg izupe. — Erepyro 'aw teko Ezit ywy wi nepuner haw rupi ne wà. Ezit ywy rehe har ukwaw putar 'aw teko wanupe neremiapo ràm wà nehe. **14** Ikwaw mehe umume'u putar ko ywy rehe har wanupe wà nehe. Ko ywy rehe har ukwaw urerehe we nerekohaw wà. Uruexak ywàkun nerekohaw ure'aromo ipytu'u mehe ure, Tupàn Tuweharupi Wiko Ma'e. A'e teko ukwaw a'e ma'e wà. Ereho urerenataromo ywàkun upu'äm ma'e pupe 'aromo. Ereho urerenataromo tata upu'äm ma'e pupe pyhaw no. Ukwaw neho haw wà no. **15** Aze erezuka neremaihu ne wà nehe, teko nekwaw par a'e wà nehe, neremiapo kwer henu arer a'e wà nehe, uze'eg putar nezewe nerehe a'e wà nehe. **16** — Tupàn uzuka wemiaihu ywyxiguhu rehe a'e wà, ta'e nupuner kwaw waneraha haw rehe ywy wemimume'u kwer pe a'e xe, i'i putar newe

wà nehe. **17** Tupàn Tuweharupi Wiko Ma'e, ainoz ko ma'e newe kury. Exak kar nepuner haw nehe kury. Ezapo neremimume'u kwer nehe. **18** Nezewe ereze'eg ne. — Ihe, Tupàn Tuweharupi Wiko Ma'e ihe, àrogatu ma'e ihe. Apurupuhareko katu ihe no. Amunàn katu 'ymaw ihe. Amunàn ikatu 'ym ma'e teko wanemiapo kwer ihe no. Nezewe rehe we iapo arer nuiko kwaw iapo 'ym arer ài ihewe wà. Aze tu uzapo ikatu 'ym ma'e wà, azepyk ta'yrs wanehe. Azepyk hemimino wanehe no. Azepyk hemimino wana'yrs wanehe no, ere purupe. **19** Kutàri ainoz ko ma'e newe kury, o Tupàn. Emunàn 'aw teko wanemiapo kwer ikatu 'ym ma'e nehe. Ta'e errepurupuhareko ne xe. Ezit ywy wi wahem mehe we te xe eremunàn wanemiapo kwer, i'i Moizez Tupàn pe.

**20** Tupàn Tuweharupi Wiko Ma'e uze'eg kury. — Erenyo ihewe ne, a'e rupi amunàn putar nehe, i'i izupe. **21** Amume'uhay ko ma'e herekuwe haw rehe ihe nehe kury, hereko haw heny katu ma'e ikàg ma'e ywy imynehemar rehe nehe kury. **22** 'Aw awa nuixe kwaw a'e ywy rehe wà nehe. Ni pitái nuixe kwaw nehe. Umàno putar paw rupi wà. Wexak hereko haw heny katu ma'e wà. Wexak heremiapo kwer Ezit ywy rehe arer wà. Wexak heremiapo kwer ywyxiguhu rehe arer wà no. Nezewe rehe we 10 haw heragaw hemuikwahy pà wà. Na'ipureruzar wer kwaw herehe wà. **23** Amume'u a'e ywy waiipy wanupe ihe. Nuixe pixik kwaw hehe wà nehe. Ni amo hereityk arer nuixe kwaw a'e ywy rehe wà nehe. **24** Heremiruze'eg Karew uzawy amogwer wà. Tuweharupi uzeruzar herehe a'e. A'e rupi amuixe kar ywy hemixak kwer rehe ihe nehe. Izuapyapyr wiko putar a'e ywy izar romo wà nehe. **25** Amarek ywy rehe har a'e wà, Kànàà izuapyapyr a'e wà no, wiko ywyàpyznaw rehe ko 'ar rehe wà kury. A'e rupi, pyhewe, pezewyr ywyxiguhu pe Yryhupiràg kutyr peho pà nehe.

### Tupàn uzepyk teko wanehe

**26** Tupàn Tuweharupi Wiko Ma'e uze'eg Moizez pe Àràw pe a'e kury.

**27** — Aenu Izaew waze'eg ahayah mehe ihe wà. Mârân 'ar amumaw putar 'aw teko ikatu 'ym ma'e wanehe hezepyk 'ym pà ihe nehe. Tuweharupi uze'eg zemueteahy herehe wà.

**28** Eze'eg nezewe 'aw teko wanupe nehe, heze'eg imume'u pà wanupe nehe. — Amume'uhay ko ma'e hereko haw rehe ihe kury. Amono putar peneminozgwer peme ihe nehe. Ihe Tupàn Tuweharupi Wiko Ma'e aiko ko ze'eg imume'u har romo ihe. **29** Amo pezuka putar a'e wà nehe. Umuhàmuhàz putar penetekwer ywyxiguhu rehe wà nehe no. Peze'eg zemueteahy herehe. A'e rupi ni amo peinuromo har tua'u ma'e ihyau ma'e nuixe kwaw a'e ywy rehe wà nehe. Xo ko 'ar rehe 20 kwarahy hereko 'ymar zo wixe putar a'e pe wà nehe. **30** Amume'uhay a'e pe peneko àwàm ihe. Napeixe kwaw a'e pe nehe. Karew Zepone ta'yrs a'e nehe, Zuzue Nun ta'yrs a'e nehe no, xo a'e zo wixe putar a'e pe wà nehe.

**31** — Upyhyk putar urera'yrs wà nehe, peze. Ihe araha putar pena'yrs a'e ywy penemimutar 'ym pe ihe wà nehe. Uzapo putar a'e ywy weko haw romo nehe. **32** Pe pemàno putar nehe. Penetekwer upyta putar ko ywyxiguhu rehe wà nehe. **33** Pena'yrs wata e putar oho waiko ko ywyxiguhu rehe a'e wà nehe. Umumaw putar 40 kwarahy wata e pà wà nehe. Upuraraw putar ma'erahy a'e wà nehe, ta'e napezeruzar kwaw heze'eg rehe pe xe. Xo pemàno paw ire zo wixe putar a'e ywy rehe wà nehe, i'i Tupàn peme, ere Izaew wanupe nehe, i'i Tupàn Moizez pe. **34** Pemumaw putar 40 kwarahy ma'erahy ipurawar pà penemapiro kwer ikatu 'ym ma'e hekuzaromo nehe. Ta'e pemumaw 40 'ar a'e ywy rehe peme'egatu pà xe. 'Ar paw umumaw kar putar pitái kwarahy peme pitaitàigatu nehe. Pekwaw putar heàmàtyry'ymar romo peneko awer nehe. **35** Azapo putar a'e ma'e a'e teko heàmàtyry'ymar nànàm nehe. Pemàno putar paw rupi nehe. Pepaw putar ko ywyxiguhu rehe nehe. Ihe Tupàn Tuweharupi Wiko Ma'e azé'eg kwez kury.

**36-37** Awa Moizez hemimono karer ywy rehe ume'egatu ma'e kwer numume'u kwaw ze'eg azeharomoete har uzewyr mehe wà.

Uzewyr mehe umuze'egahy kar teko Moizez kutywà. A'e rupi Tupàn Tuweharupi Wiko Ma'e omono kar ma'eahy haw wanehe. Umàno wà. **38** Heta 12 awa imono pyrer wà. 10 umàno wà. Xo Zuzue zo a'e, xo Karew zo a'e, wikuwe a'e wà.

### **Izaew na'ikàg kwaw wà kury**

**39** Izaew uzemumikahy Moizez Tupàn Tuweharupi Wiko Ma'e ze'eg imume'u mehe wà. **40** Ku'em mehe izi'itahy uzypyrog ywy ywytyr hereko har rehe wixe pà wà kury. Uze'eg nezewe wà. — Ko 'ar rehe uruhyk ywy Tupàn Tuweharupi Wiko Ma'e hemimume'u kwer pe ureho àwàm rehe ure. Azeharomoete uruzapo ikatu 'ym ma'e ure, i'i teko Moizez pe wà.

**41** Moizez uwazar waze'eg wanupe. — Máràzàwe tuwe napepureruzar wer kwaw Tupàn Tuweharupi Wiko Ma'e ize'eg rehe. Na'ikatu kwaw nezewe nehe. **42** Peixe zo ywy ywytyruhu hereko har rehe nehe. Tupàn Tuweharupi Wiko Ma'e nuiko kwaw peinuinuromo a'e. Peàmàtyry'ymar peneityk putar wà nehe. **43** Amarek ywy rehe har a'e wà, Kànàà izuapypyr a'e wà no, wiko a'e pe peàmàtyry'ym pà pezuka pà wà. Tuweharupi Wiko Ma'e nuiko kwaw penehe we nehe. Ta'e pepuir izuwi xe, i'i wanupe.

**44** Nezewe rehe we Izaew nuweruzar kwaw ize'eg wà. Heixe wer ywy ywytyruhu hereko har pupe wà. Nezewe rehe we ni Tupàn Tuweharupi Wiko Ma'e ze'eg hyru a'e, ni Moizez a'e, nuhem kwaw waker haw wi wà.

**45** Na'e Amarek a'e wà, Kànàà a'e ywy ywytyruhu hereko har rehe wiko ma'e a'e wà no, uzàmàtyry'ym Izaew wà wà kury, waneityk pà wà kury. Izaew uzàn Oroma pe wà. Amarek uzàn wanaikweromo Kànàà wanupi wà no.

### **Ze'egatu haw ma'e imono e pyr rehe har**

**15** <sup>1</sup>Tupàn Tuweharupi Wiko Ma'e umume'u ko uze'eg Moizez pe. **2**— Tuwe Izaew weruzar ko heze'eg ywy wanupe heremimono ràm rehe wixe mehe

wà nehe, i'i izupe. Moizez umume'u ize'eg teko wanupe.

**3**— Pemono putar ma'ea'y'r Tupàn pe pe wà nehe: tapi'ak awa, aze ru'u àràpuhàràn hawitu ma'e awa, aze ru'u àràpuhàràn hawitu ma'e kuzà, aze ru'u àràpuhàrànete awa. A'e ma'ea'y'r wiko putar hapy pyràm romo ukaz paw ma'e ràm romo nehe, aze ru'u teko uzuka putar wà nehe, ta'e umume'u izuka àwàm Tupàn pe wà xe, aze ru'u uzuka e imurywete kar pà wà nehe, aze ru'u wiko putar Tupàn pe imono pyr romo mynykawhu imuwyete haw 'ar mehe har romo nehe. Hyàkwegatu Tuweharupi Wiko Ma'e pe nehe. **4-5** Aze amo omono àràpuhàràn hawitu ma'e kuzà Tupàn Tuweharupi Wiko Ma'e pe ukaz paw ma'e romo nehe, aze ru'u amo omono àràpuhàrànete awa izupe nehe, tuwe werur pitài kir arozràm imuku'i pyrer ikatu ma'e pitài zutahyky'ahu por uri kawer inuromo imupyràm pyrer nehe no. Tuwe werur pitài zutahyky'a win nehe no. **6** Aze uzuka àràpuhàràn hawitu ma'e awa nehe, werur putar mokoz kir arozràm imuku'i pyrer ikatu ma'e pitài zutahyky'a por uri kawer inuromo imupyràm pyrer nehe no. **7** Tuwe werur pitài zutahyky'ahu por win nehe no. Hyàkwegatu putar Tuweharupi Wiko Ma'e pe nehe. **8** Aze pezuka tapi'aka'y'r awa ukaz paw ma'e ràm romo nehe, aze ru'u pezuka izuka àwàm penemimume'u kwer rehe nehe, aze ru'u pezuka Tupàn pe uzemuawye kar haw romo nehe, **9** pemur na'iruz kir arozràm imuku'i pyrer ikatu ma'e nehe, mokoz zutahyky'a tynehem etea'i ma'e uri kawer inuromo imupyràm pyrer nehe. **10** Perur na'iruz zutahyky'a win nehe no. Hyàkwegatu putar Tuweharupi Wiko Ma'e pe nehe.

**11** Pezapo nezewe haw ma'ea'y'r nànà nehe: tapi'ak awa, àràpuhàràn hawitu ma'e awa, àràpuhàràn hawitu ma'e kuzà, àràpuhàrànete awa. **12** Aze pezuka màràmàràn ma'ea'y'r pe wà nehe, pezapo nezewe haw wanupe upaw rupi katete nehe. **13** Izaew paw uzapo putar nezewe haw temi'u Tupàn pe hyàkwegatu ma'e herur mehe wà nehe. **14** Heta amo ywy rehe arer

peinuinuromo wiko ma'e wà. Aze wiko amogwemogwer 'ar imumaw par romo wà nehe, aze ru'u wiko tuweharupi peinuromo wiko ma'e ràm romo wà nehe, tuwe uzapo ma'e penemiapo zàwe wà nehe, aze werur tem'u Tupàn Tuweharupi Wiko Ma'e pe wà nehe. Hyàkwegatu a'e ma'e Tupàn pe. **15** Peruzar Tupàn ze'eg nehe. Amo ywy rehe arer peinuromo wiko ma'e weruzar putar ize'eg pezàwegatete wà nehe no. Tuweharupi pezuapyapyr weruzar putar ko ze'eg wà nehe. Tupàn Tuweharupi Wiko Ma'e henataromo teko paw weruzar putar ko ize'eg wà nehe. Peruzar putar nehe. Amo ywy rehe har weruzar putar wà nehe no. **16** Peruzar putar ize'eg nehe. Weruzar putar ize'eg wà nehe no. Pezapo putar hemiapo kar nehe. Uzapo putar hemiapo kar a'e wà nehe no.

**17** Tupàn Tuweharupi Wiko Ma'e umume'u ko uze'eg Moizez pe kury. **18** — Izaew weruzar putar ko heze'eg ywy wanupe heremimur ràm rehe wixe mehe wà nehe, i'i izupe. **19** — Temi'u a'e ywy rehe hezuz ma'e kwer i'u mehe nehe, pemonokatu ikurer Tupàn Tuweharupi Wiko Ma'e pe nehe. **20** Typy'ak iapo mehe nehe, pemono typy'ak ipy arozràn ipyahu ma'e pupe iapo pyrer Tupàn pe imono pyr ikatu ma'e romo nehe. **21** Pe nehe, pezuapyapyr wà nehe no, pemono putar a'e typy'ak ikatu ma'e Tupàn Tuweharupi Wiko Ma'e pe nehe.

**22** Aze ru'u amo uzuhaw e putar amo ko ze'eg nehe. Aze ru'u uzapo putar ikatu 'ym ma'e amo Tuweharupi Wiko Ma'e ze'eg Moizez pe imono pyrer heruzar 'ym pà nehe. **23** Ko 'ar henataromo nehe, tuweharupi nehe, pezapo nezewe haw nehe. **24** Aze teko uzawy e Tupàn hape wà nehe, umur putar tap'iaka'yì awa wà nehe. Uzuka putar wà nehe. Uzuka putar nehe. Hyàkwegatu putar Tuweharupi Wiko Ma'e pe nehe. Umur putar arozràn imur pyr izupe nehe no. Umur putar win izupe nehe no. Tuwe uzuka amo àràpuhàrànete awa katu 'ygwer imunàn kar haw romo wà nehe no. **25** Xaxeto umur putar a'e ma'e Tupàn pe Izaew paw wanekuzaromo a'e nehe, wanemiapo kwer ikatu 'ygwer ma'e

imunàn kar pà izupe nehe. Umunàn putar Tupàn nehe. Ta'e uzapo e ikatu 'ym ma'e wà xe. Omono ma'e izupe wemiapo kwer ikatu 'ym ma'e imunàn kar pà izupe wà no. Umur temi'u izupe wà no. **26** Izaew paw a'e wà, amo ywy rehe arer peinuromo wiko ma'e a'e wà no, uzapo e ikatu 'ym ma'e Tupàn henataromo wà. A'e rupi umunàn putar wanuwi nehe.

**27** Aze amo teko uzapo ikatu 'ym ma'e hehe ipurapo wer 'ym pà nehe, omono putar pitài àràpuhàrànete kuzà pitài kwarahy hereko har Tupàn pe nehe, wemiapo kwer ikatu 'ym ma'e imunàn kar haw romo nehe. **28** Xaxeto ormono putar a'e ma'ea'yr ma'ea'yr happy haw rehe hemiapo e kwer ikatu 'ym ma'e imunàn kar pà Tupàn pe nehe. Tupàn umunàn putar hemiapo kwer iapo arer wi nehe. **29** Wyzai ikatu 'ym ma'e iapo arer hehe ipurapo wer 'ym ma'e kwer weruzar putar ko ze'eg wà nehe, Izaew wà nehe, amo ywy rehe har peinuromo wiko ma'e wà nehe no.

**30** Aze amo uzapo ikatu 'ym ma'e hehe ipurapo wer pà nehe, Izaew nehe, aze ru'u amo ywy rehe arer nehe, wiko putar Tupàn Tuweharupi Wiko Ma'e iàmàtyry'ymar romo nehe. Pezuka a'e teko nehe. **31** Ta'e weityk Tuweharupi Wiko Ma'e ize'eg a'e xe. Nuweruzar kwaw hemiapo kar ta'e uputar nezewe haw a'e xe. A'e teko wiko putar uzezuka ma'e ài a'e nehe.

### *Awa nuzeruze'eg kwaw 'ar mytu'u haw rehe*

**32** Izaew ywyxiguhu rehe wiko we mehe wexak amo awa zepe'aw mytu'u haw 'ar mehe imono'og mehe wà. **33** Hexak arer weraha Moizez heko haw pe. Àràw a'e no, teko paw a'e wà no, wiko a'e pe wà no. **34** Na'e umuigo kar amo awa a'e awa rehe ume'egatu ma'e romo wà. Ta'e nukwaw kwaw a'e awa pe wemiapo ràm wà xe. **35** Na'e Tupàn Tuweharupi Wiko Ma'e uze'eg Moizez pe kury. — Pezuka 'aw awa nehe. Tuwe teko paw weraha katu pe iker haw wi izuka pà wà nehe, ita teteal'u pupe iapiapi pà wà nehe.

**36** Na'e teko weruzar Tupàn ze'eg Moizez pe imono pyrer wà. Weraha a'e awa katu pe

uker haw wi wà. Teko paw uzapizapi ita tetea'u pupe wà. Te umànò kury.

### ***Imupuràgaw inemo iapo pyrer***

**37** Tupàn Tuweharupi Wiko Ma'e uze'eg Moizez pe.

**38** — Emume'u ko heze'eg Izaew wanupe nehe. — Pemono imupuràgaw inemo iapo pyrer pezepykaw iapyr nehe. Imupuràgaw nànàn pemono kyhàhàm huwyahy ma'e nehe no. **39** A'e imupuràgaw hexak mehe nehe, pema'enukwaw putar Tupàn Tuweharupi Wiko Ma'e ize'eg nànàn nehe. Peruzar putar a'e ze'eg nehe no. Napepytu'u kwaw hehe pezeruzar ire nehe. Napezapó kwaw penemimutar pep'y'a pe har nehe, peneha pe har nehe. **40** A'e imupuràgaw pemuma'enukwaw kar putar heze'eg nànàn nehe. Weruzar kar putar heze'eg paw peme nehe no. Nezewe mehe peiko putar teko ihewe imunyryk pyrer romo nehe. Napezemonokatu kwaw amo pe nehe. **41** Aiko Tupàn Tuweharupi Wiko Ma'e romo ihe. Apupyro Ezit ywy wi. Ta'e hereko wer pezar romo ihe xe. Aiko Tuweharupi Wiko Ma'e romo pezar romo ihe.

### ***Wikwahy Kora, Nàtà, Àmiràw wanehe we***

**16** <sup>1-2</sup> Kora Izar ta'yr Erewi izuapyr Koat iànàm a'e, uzamàtyry'ym Moizez a'e. Uzemono'og na'iruz awa Humen izuapyr wanehe we a'e. Mokoz wiko Eriaw ta'yr romo wà. Nàtà awa ipy her romo. Tywyr a'e, Àmiràw her romo a'e. Inugwer awa Om Peret ta'yr her romo a'e. Kora wenoz amo 250 awa Izaew ikwaw katu pyr wà no. Teko waxaexak a'e awa uwihaw romo wà. **3** Uzemono'og Moizez pe Àràw pe uze'eg pà wà kury. — Uhyk kury. Teko paw wiko Tupàn Tuweharupi Wiko Ma'e hemiaihu romo wà. Pitàitàigatu wiko Tupàn hemiruze'eg romo wà. Tupàn Tuweharupi Wiko Ma'e wiko wainuinuromo a'e. Máràzàwe tuwe peneko wer Tupàn hemiaihu wanuwihiaw romo, i'i wanupé wà.

**4** Waze'eg henu mehe Moizez uzemumew upenàràg rehé ywy rehé uwa imuhyk pà.

**5** Na'e uze'eg Kora pe, hemiruze'eg nànàn no.

— Pyhewe izi'italy Tupàn wexak kar putar wemiruze'eg purupe nehe. Wexak kar putar uma'erekò haw pe imunyryk kar pyrer nehe. Wexaexak putar amo nehe. A'e awa uhem putar ma'e'yr hapy haw pe nehe. **6-7** Pyhewe izi'italy pe nehe, penemiruze'eg wà nehe no, pepyhk putar yhyk zàwenugar hapy haw nehe. Pemono putar tâtàpyzgwer ipupe nehe no. Pemono putar yhyk zàwenugar ipupe nehe no. Na'e peraha putar ma'e'yr hapy haw pe nehe. A'e 'ar mehe xixak putar Tupàn hemixak kwer nehe. Pepytu'u peze'eg ire kury, Erewi izuapypapr wà, i'i Moizez.

**8** Moizez uze'eg Kora pe no. — Peinu katu ko ze'eg nehe, Erewi izuapypapr wà. **9** Tupàn Izaew wazar pemonokatu amogwer teko wanuwi a'e. Ta'e peputar uzewake a'e xe. Uzapó kar uma'erekò haw tâpuzràm imonokatu pyrer pupe har peme. Pezeapo putar imuwe haw teko wanekuzaromo nehe. Aipo nuhyk kwaw nezewe haw peme. **10** Tupàn umur a'e ikatu ma'e peme a'e, amogwer Erewi izuapypapr wanupe no. Nuhyk kwaw peme. Peneko wer xaxeto romo kury. **11** Àràw kutyr peze'egahy mehe peze'egahy peiko Tuweharupi Wiko Ma'e kutyr. Pezàmàtyry'ym Tupàn Tuweharupi Wiko Ma'e peiko.

**12** Na'e Moizez wenoz kar mokoz Eriaw ta'yr wamuwà wà kury. Nàtà, Àmiràw waner wà. Nur kwaw wà. — Noroho kwaw nehe, i'i Moizez ze'eg herur arer wanupe wà.

**13** Urepyro pe ywy ikatu ma'e wi ma'e imuezuz katu har wi ne, ko wyxigihu rehé urezuka pà ne. Aipo nuhyk kwaw newe. Erezapo a'e ma'e paw urewe. Nezewe rehé we nepurapo kar wer ma'e rehé urewe no.

**14** Azeharomoete na'urererur kwaw pe ywy katu ma'e pe ma'e imuezuz katu har pe no. Neremur kwaw ywy ikatu ma'e urewe. Neremur kwaw uwà tyw ikatu ma'e urewe. Na'uremuigo kar kwaw pe a'e ma'e izar romo. Nezewe rehé we neremu'em wer urewe. Noroho kwaw nehe, i'i izupe wà.

**15** Moizez wikwahy wanupe kury. Uze'eg Tupàn Tuweharupi Wiko Ma'e pe.

Emuawyze kar zo 'aw awa wanemimur ràm nehe. Nazapo pixik kwaw ikatu 'ym ma'e wanupe. Nazo'ok kwaw ma'e wanuwi. Ni sumeta'i nazo'ok kwaw wanuwi.

**16** A'e rupi Moizez uze'eg Kora pe. — Pyhewe ne nehe, 250 neremiruze'eg a'e wà nehe no, pezur tåpuzràn Tupàn pe imonokatu pyrer pe nehe. Àràw wiko putar a'e pe nehe no. **17** Pe pitàitåigatu pepyhk putar yhyk zàwenugar hapy haw nehe. Pemono putar yhyk zàwenugar ipupe nehe. Peraha putar ma'e'a'yrl hapy haw pe nehe, i'i wanupe.

**18** Nezewe mehe awa upyhyk yhyk zàwenugar pitàitåigatu wà. Umunyk tata hehe wà no. Paw rupi upyta tåpuzràn Tupàn pe imonokatu pyrer pupe teixe haw huwake Moizez rehe we Àràw rehe we wà. **19** Na'e Kora omono'og teko paw wà kury. Upyta Moizez henataromo Àràw henataromo tåpuzràn Tupàn pe imonokatu pyrer pupe teixe haw huwake wà. Na'arewahy Tupàn Tuweharupi Wiko Ma'e heko haw heny haw uzexak kar teko nànàn kury. **20** Tupàn Tuweharupi Wiko Ma'e uze'eg Moizez pe Àràw pe.

**21** — Pehem 'aw teko wamyster wi nehe. Ta'e amumaw putar tårityka'i ihe wà nehe kury.

**22** Moizez a'e, Àràw a'e no, wapyk upenàràg rehe a'e wà kury. Umuhyk uwa ywy rehe uze'eg pà wà. — O, Tupàn, eremuigo kar teko paw ne wà. Aipo erekwahy putar teko nànàn pitái awa hemiaipo kwer rehe nehe.

**23** Na'e Tupàn Tuweharupi Wiko Ma'e uwazar Moizez ze'eg izupe.

**24** — Pehem peho Kora hàpuz wi nehe, Nàtà hàpuz wi nehe, Àmiràw hàpuz wi nehe no, ere teko wanupe nehe, i'i Tupàn Moizez pe.

**25** Na'e Moizez oho a'e wi teko wanuwi haw wanupi Nàtà huwake Àmiràw huwake kury. **26** Uze'eg teko wanupe. — Petyryk 'aw awa ikatu 'ym ma'e wanàpuz wi nehe. Pepokok zo wama'e rehe nehe. Aze pepokok hehe nehe, apumumaw putar wanemiapo kwer ikatu 'ygwer ma'ehekuzaromo ihe nehe no.

**27** Na'e teko uthyryk wanàpuz wi wà: Kora hàpuz, Nàtà hàpuz, Àmiràw hàpuz. Nàtà a'e,

Àmiràw a'e no, uhem wàpuz wi teixe haw huwake upyta pà wà, wemireko wanehe we wà, wa'yr wanehe we wà no. **28** Na'e Moizez uze'eg teko wanupe. — Amume'u putar ko ma'e imuàgà'yamar her peme nehe kury. Naiko kwaw imuàgà'yamar romo. Azapo a'e ma'e paw ihe, ta'e Tupàn Tuweharupi Wiko Ma'e uzapo kar ihewe a'e xe. **29** Aze a'e awa umàno amogwer wazàwe wà nehe, aze Tupàn nuzypk kwaw wanehe nehe, a'e mehe pekwaw putar Tupàn Tuweharupi Wiko Ma'e hemur kar har romo heko 'ymaw nehe. **30** Aze uzapo amo ma'e temixak 'ym nehe, aze ywy uzepe'a'aw teko imokon pà nehe, aze omokon wama'e paw nehe no, aze wikuwe umàno ma'e kwer wapyta haw pe oho mehe wà nehe, pekwaw putar 'aw awa Tupàn Tuweharupi Wiko Ma'e heityk arer romo waneko haw nehe.

**31** Uzeapo nezewe haw. Moizez ize'eg pawire na'arewahy ywy uzepe'a a'e teko wawype. **32** Omokon wà. Omokon waànàm wà no. Omokon Kora hemiruze'eg paw wà no. Omokon wama'e paw no. **33** Nezewe mehe wikuwe umàno ma'e kwer wapyta haw pe wezyw mehe wà. Wama'e paw no. Ywy upyk wà. Ukàzym wà. **34** Wanehapukaz haw henu mehe Izaew a'e pe wiko ma'e uzàn oho a'e wi uhapukaz pà wà. Ywy zanemukun putar a'e nehe no, i'i wà.

**35** Na'e Tupàn Tuweharupi Wiko Ma'e omono kar tata wanehe 50 awa yhyk zàwenugar hapy har wazuka pà kury.

### ***Yhyk hapy har wà***

**36** Na'e Tupàn Tuweharupi Wiko Ma'e uze'eg Moizez pe kury.

**37** — Emume'u ko heze'eg Ereazar Àràw ta'yr pe nehe. — Epyhyk yhyk hapy haw ma'e ukaz ma'e kwer inuromo har eho nehe. Emuhàmuhàz tåtäpyzgwer ipupe har muite nehe. Ta'e amonokatu yhyk hapy haw hezeupe ihe xe. **38** Xaxeto omono ma'e'a'yrl hapy haw rehe Tuweharupi Wiko Ma'e henataromo wà, imonokatu pà Tupàn pe wà. A'e rupi epyhyk yhyk hapy haw a'e awa wanemiapo kwer hekuzaromo izuka pyrer

wanuwi nehe. Enupànupà huwer zàwenugar romo iapo pà nehe. Ema'ema'e a'e huwer zàwenugar ma'ea'yr hapy haw ipykaw romo iapo pà nehe. Nezewe haw upyta putar Izaew wanupe katu 'ygwer wi wamunyryk kar haw romo nehe, ere izupe nehe, i'i Tupàn izupe.

**39** Na'e xaxeto Ereazar upyhyk yhyk hapy haw ita tâtâ iapo pyrer awa izuka pyrer wanemirur kwer kury. Unupànupà huwer hagapaw romo iapo pà ma'ea'yr hapy haw ipykaw romo. **40** Izaew wexak a'e ma'e Tupàn Tuweharupi Wiko Ma'e ze'eg rupi katete wà. Ima'enukwaw hehe wà. Tuwe ni amo Àràw izuapyr nuwapy kwaw yhyk zàwenugar Tupàn Tuweharupi Wiko Ma'e henataromo Korà zàwe izuapyr wazàwe wà nehe.

### Àràw upyro teko wà

**41** Nezewe rehe we iku'egwer pe Izaew paw uzypyrog uze'egahy pà Moizez kutyr Àràw kutyr wà kury. — Pezuka Tupàn Tuweharupi Wiko Ma'e hemiaihu pe wà, i'i wanupe wà.

**42** Paw rupi Moizez pe Àràw pe uze'eg pà wazemono'og ire uwak tâpuzràn Tupàn pe imonokatu pyrer kutyr wà kury. Wexak ywàkun ipykaw wà. Na'e Tupàn Tuweharupi Wiko Ma'e heko haw heny katu haw uxexak kar kury. **43** Moizez a'e, Àràw a'e no, oho tâpuzràn Tupàn pe imonokatu pyrer henataromo wà kury. **44** Tupàn Tuweharupi Wiko Ma'e uze'eg Moizez pe.

**45** Pehem peho 'aw teko wamyter wi nehe. Ta'e azuka putar tuwe târityka'i ihe wà nehe kury xe, i'i izupe. Na'e Moizez a'e, Àràw a'e no, wapyk upenàràg rehe uwa imuhyk pà ywy rehe wà kury. **46** Uze'eg Moizez Àràw pe. — Epyhyk nema'e yhyk zàwenugar hapy haw nehe. Emono amo tanimuk ma'ea'yr hapy haw rehe har ipupe nehe. Eityk yhyk zàwenugar hehe nehe. Na'arewahy elo teko waneko haw pe nehe. Emono ma'e Tupàn pe wanemiapo kwer ikatu 'ym ma'e imunàñ kar pà izupe nehe. Ezàn ty. Tupàn Tuweharupi Wiko Ma'e ikwahy haw uxexak kar kwez kury. Ma'eahy haw uzypyrog kwez teko wapyhyk pà kury, i'i izupe.

**47** Na'e Àràw upyhyk yhyk zàwenugar hapy haw Moizez ze'eg rupi kury. Uzàn teko wamyter pe. Wexak ma'eahy haw izypyrogaw. A'e mehe weityk yhyk zàwenugar tanimuk rehe ma'e imono pà Tupàn pe teko wanemiapo kwer ikatu 'ym ma'e imunàñ kar haw romo kury. **48** A'e rupi ma'eahy haw upytu'u teko wanuwi kury. Àràw upu'äm teko wikuwe ma'e wamyter pe, umàno ma'e kwer wamyter pe no. **49** A'e ma'eahy haw uzuka 14.700 teko wà. Heta we amo teko Kora rehe we umàno ma'e kwer wà no. **50** Ma'eahy haw ipaw ire Àràw uzewyr tâpuzràn Tupàn pe imonokatu pyrer pupe teixe haw pe. Moizez wiko a'e pe.

### Àràw zewyràihàg

**17** <sup>1</sup>Tupàn Tuweharupi Wiko Ma'e uze'eg Moizez pe.

**2** — Eze'eg Izaew wanupe nehe, i'i izupe. — Tuwe Izaew ta'yr wazuapypyr wanuwhiaw paw werur amo ywyra pokokaw ihewe nehe, ere wanupe nehe. Nezewe mehe heta putar 12 ywyra pokokaw wà nehe. Emuapyk tuwhiaw waner a'e ywyra wanche pitaitàigatu ne wà nehe. **3** A'e re emuapyk Àràw her ywyra Erewi izuapypyr wama'e rehe nehe. Heta putar pitai ywyra Izaew ta'yr wazuapypyr wanuwhiaw wanupe pitaitàigatu wà nehe. **4** Apuàwàxi tâpuzràn ihewe imonokatu pyrer pupe heze'eg hyru henataromo tuweharupi ihe. Emono a'e ywyra pokokaw a'e zanezeàwàxi haw pe nehe. **5** A'e pe nehe, ywyra pokokaw heremixak ràm ima'e ikyrhezuz putar a'e nehe. Nezewe mehe amupytu'u kar putar 'aw Izaew hekutyr waze'egahy re ihe wà nehe, i'i Tupàn Moizez pe.

**6** Na'e Moizez uze'eg Izaew wanupe kury. Wanuwhiaw umur ywyra opokokaw izupe pitaitàigatu wà. Heta pitai ywyra Izaew ta'yr wazuapypyr imono'og pyrer nàñan pitaitàigatu wà. Heta 12 wà. Àràw ima'e upyta amogwer wainuromo no. **7** Moizez omono ywyra tâpuzràn Tupàn pe imonokatu pyrer pupe Tupàn Tuweharupi Wiko Ma'e ze'eg hyru henataromo wà.

**8** Iku'egwer pe Moizez wixe tāpuzrān Tupān pe imonokatu pyrer pupe ywyra Àràw ipokokaw hexak pà. Erewi izuapyapyr wanekuzaromo har a'e. Ikyrhezuz a'e. Heta ikyrhezuz iputyr no, heta ma'e'ywa amenua her ma'e iazuer hehe no. **9** Na'e Moizez weraha ywyra pokokaw paw Tuweharupi Wiko Ma'e henatar wi wà. Weraha Izaew wanupe wà. Izaew wexak uezapo ma'e kwer wà. Tuwihaw upyhyk ywyra opokokaw pitaitàigatu wà.

**10** Tupān Tuweharupi Wiko Ma'e uze'eg Moizez pe. — Emono wi ywyra Àràw ipokokaw hez'e'eg hyru henataromo nehe. Upyta putar a'e pe Izaew hereruzar 'ymar wanemixak ràm romo nehe. Nezewe mehe upytu'u putar hekutyr uze'eg ire wà nehe. Nezewe mehe nazuka kwaw ihe wà nehe, i'i Moizez pe.

**11** Moizez uzapo ma'e Tuweharupi Wiko Ma'e ze'eg rupi katete a'e.

**12** Na'e teko Izaew uze'eg Moizez pe wà kury. — Zakàzym putar nehe. Zamàno putar nehe. Azeharomoete zamàno putar paw rupi nehe. **13** Tupān Ze'eg Hyru huwake uehem ma'e umàno putar nehe. Azeharomoete zamàno putar paw rupi nehe, i'i izupe wà.

### Xaxeto wamekuzar haw

**18** **1** Tupān Tuweharupi Wiko Ma'e uze'eg Àràw pe. — Ne nehe, nera'yr wà nehe no, amogwer Erewi izuapyapyr wà nehe no, aze amo uzawy ma'erekò haw tāpuzrān ihewe imonokatu pyrer pupe har iapo mehe nehe, azepyk putar penehe nehe. Xo ne zo nehe, xo nera'yr zo wà nehe, pepuraw putar ma'erahy nehe, aze amo xaxeto uzawy uma'erekò haw iapo mehe wà nehe. **2** Erur amogwer Erewi izuapyapyr xe ne wà nehe. Ereiko izuapyr romo ne no. Neptyywà putar ma'erekò haw tāpuzrān pupe har iapo mehe wà nehe. Upytywà putar nera'yr wà nehe no. **3** Erezapo kar putar ma'e Erewi izuapyapyr wanupe nehe. Uzapo putar wà nehe. Uzapo putar ma'e tāpuzrān Tupān pe imonokatu pyrer pupe ma'erekò haw wà nehe no. Nuhem kwaw ma'e Tupān pe imonokatu

pyrer henaw ikatu ma'e pupe har huwake wà nehe. Nuhem kwaw ma'e'a'yr happy haw huwake wà nehe. Aze uzapo nezewe haw wà nehe, pemàno putar nehe. Umàno putar wà nehe no. **4** Erewi izuapyapyr uma'erekò putar nerehe we wà nehe. Uzapo putar ma'erekò haw tāpuzrān Tupān pe imonokatu pyrer pupe har paw rupi wà nehe. Nezewe rehe we ni amo teko ikwaw pyr 'ym numal'erekò kwaw penehe we wà nehe. **5** Xo ne zo nehe, zo nera'yr zo a'e wà nehe, xo pe zo peiko putar Tupān henaw ikatu ma'e rehe ma'erekò haw rehe uzekaiw ma'e romo nehe, ma'e'a'yr happy haw rehe ma'erekò haw rehe uzekaiw ma'e romo nehe. Nezewe mehe naikwahy wi kwaw teko Izaew izuapyapyr wanupe ihe nehe. **6** Ame'e Izaew nànàm ihe. Na'e aexaexak neànàm Erewi izuapyapyr ihe wà, pe xaxeto wanupe imono pyràm romo ihe wà. Erewi izuapyapyr uzemonokatu ihewe wà, ma'erekò haw tāpuzrān ihewe imonokatu pyrer pupe har iapo har romo wà. **7** Ne nehe, nera'yr wà nehe no, pezapo putar xaxeto wama'erekò haw nehe. Pezekaiw putar ma'e'a'yr happy haw rehe har rehe nehe. Pezekaiw putar ma'e herenaw ikatuahy ma'e pupe har rehe nehe no. Peiko a'e ma'e rehe uzekaiw ma'e romo. Ta'e apumuigo kar xaxeto romo ihe xe. Nezewe rehe we wyzai xaxeto 'ym a'e nehe, aze uehem ma'e ihewe imonokatu pyrer huwake nehe, umàno putar nehe.

### Xaxeto wanemi'u

**8** Tupān Tuweharupi Wiko Ma'e uze'eg Àràw pe. — Teko umur ikatu ma'e tetea'u ihewe wà. Ereapý amo ne wà. Amogwer nereapý kwaw ne wà. Amono putar ukaz 'ym ma'e kwer paw newe ihe wà nehe kury. Amono newe ihe wà, amono nezuapyapyr wanupe ihe wà no. Peiko putar wazar romo tuweharupi nehe. **9** Amo ihewe imur katu pyrer nereapý kwaw ne wà. Erepýhyk putar a'e ma'e ne wà nehe: arozràn imur pyrer, ma'e katu 'ygwer imunàn kar haw, ma'e teko ikatu ma'e romo wamuigo kar haw. Ne nehe, nera'yr wà nehe no, peiko putar ma'e

imonokatu pyrer ihewe herur pyrâm paw wazar romo nehe. **10** Ere'u putar a'e ma'e ywy pehegwer imukatu pyrer rehe nehe. Xo awa zo upuner i'u haw rehe wà nehe. Uzeapo putar herenataromo ikatu ma'e romo newe nehe.

**11** Izaew werur putar ikatu ma'e tetea'u ihewe wà nehe no. Ereiko putar wazar romo nehe no. Amono putar newe nehe, nera'yr wanupe nehe no, nerazyr wanupe nehe no, tuweharupi nehe. Neànàm herenataromo ikatu ma'e paw upuner putar a'e ma'e i'u haw rehe wà nehe. **12** Izaew werur uiwy wi arozràñ ipo'o pyr ipy ikatu wera'u ma'e ihewe wà. Amono a'e ma'e newe ihe: uri kawer ikatu wera'u ma'e, win ikatu wera'u ma'e, arozràñ ikatu wera'u ma'e. **13** Teko werur putar uiwy wi ipo'o pyrer ipy wà nehe. Ereiko putar a'e ma'e izar romo nehe. Neànàm herenataromo ikatu ma'e paw upuner putar a'e ma'e i'u haw rehe wà nehe.

**14** Aiko Tupân Tuweharupi Wiko Ma'e romo ihe. Wyzzai ma'e Izaew ywy rehe har nehe, aze teko omonokatu hemâ'erekohaw pe wà nehe, ereiko putar a'e ma'e izar romo nehe.

**15** Izaew wana'yr ipy paw wà nehe, waneimaw imemyr ipy paw wà nehe no, aze umur ihewe wà nehe, ereiko putar wazar romo nehe. Ta'yr ipy herenataromo ikatu 'ym ma'e wà, ma'ea'yr imemyr ipy herenataromo ikatu 'ym ma'e wà, uzewyr putar wà nehe. Wamur arer upyhyk wi putar wà nehe. Na'e umur putar hekuzar ihewe wà nehe. **16** Teko umur putar wa'yr ipy hekuzar newe wà nehe, ta'yr pitâi zahy hereko mehe wà nehe. Umur putar 57 kâram parat newe wà nehe. (Nezewé i'i tàmuzgwer uze'eg pape rehe imuapyk pà wà; pitâi temetarer tâtâ xikuru her ma'e a'e, nuzawy kwaw 20 temetarer tâtâ zera her ma'e.) **17** Aze amo werur ma'ea'yr imemyr ipy ihewe nehe, nupuner kwaw wemimir kwer im'e'eg kar haw rehe nehe: tap'iak imemyr ipy, àràpuhàràñ hawitu ma'e imemyr ipy, àràpuhàràñete imemyr ipy. Aiko izar romo. Tuwe xaxeto uzuka nehe. Emupiripirik huwykwer ma'ea'yr hapy haw rehe nehe. Eapy ikawer temi'u ihewe imur pyr romo nehe. Hyàkwegatu putar ihewe nehe.

**18** Ereiko putar ho'o kwer izar romo nehe. Ereiko putar ipuxi'a kwer izar romo nehe, henugupy kwer awyze har izar romo nehe no.

**19** Izaew umur putar ikatu ma'e ihewe tuweharupi wà nehe. Ne nehe, nera'yr wà nehe no, peiko putar a'e ma'e wazar romo tuweharupi nehe. Azapokatu ko heze'eg xa inuromo ihe kury, nerehe we, nera'yr wanehe we no. Nazuhaw pixik kwaw nehe. Pezuhaw pixik zo nehe no.

**20** Tupân Tuweharupi Wiko Ma'e uze'eg Àràw pe. — Nererekohaw ywy amogwer Izaew wazàwé nehe. Nererekohaw tâpuz nehe. Izaew wainuinuromo aiko nema'e romo ihe. Aiko ywy zàwenugar romo newe. Aiko tâpuz tetea'u zàwenugar romo newe. Izaew upyhyk putar ywy wà nehe. Upyhyk putar tâpuz tetea'u wà nehe. Hepyhyk putar pe nema'e romo a'e ma'e hekuzaromo nehe.

### *Erewi wama'e wanemipyhyk*

**21** Tupân Tuweharupi Wiko Ma'e uze'eg kury. — Teko Izaew izuapyapyr umur putar pitâi uma'e 10 uma'e wi imunyryk pyrer tuweharupi wà nehe. Erezekaiw putar tâpuzràñ ihewe imonokatu pyrer rehe nehe. Amono putar a'e wanemimur kwer newe hehe nezekaiw haw hekuzaromo nehe.

**22** Amogwer Izaew nuhem pixik kwaw tâpuzràñ ihewe imonokatu pyrer huwake wà nehe. Ta'e uzapo mo ikatu 'ym ma'e nezewe wà xe. A'e mehe mo uvezuka mo wà. **23** Erewi izuapyapyr uzapo putar ma'erekohaw tâpuzràñ Tupân pe imonokatu pyrer pupe har wà nehe. Aze uzawy wà nehe, azepyk putar wanehe nehe. Ko heze'eg peruzar tuweharupi pepytu'u 'ym pà nehe. Erewi izuapyapyr nuwereko kwaw ywy Izaew ywy rehe wà nehe. **24** Ta'e amono Izaew ihewe wanemimur wanupe ihe xe. Izaew umur pitâi uma'e 10 uma'e wi imunyryk pyrer ihewe wà, ikatu ma'e romo wà. Amono a'e ma'e peme ihe. Erewi izuapyapyr wiko putar izar romo wà nehe. A'e rupi amume'u ko ma'e peme. — Naperekohaw ywy Izaew ywy rehe nehe, a'e peme.

**Teko wenuhem pitài ma'e 10 ma'e  
wanuwi wà, Erewi wanupe imono pà wà**

25 — Emume'u ko heze'eg Erewi izuapyapyr wanupe nehe, 26 i'i Tupàn Tuweharupi Wiko Ma'e Moizez pe. — Aze Izaew omono'og 10 ma'e wà nehe, umur putar pitài ma'e ihewe wà nehe. Pepyhyk putar nehe. Peiko putar izar romo nehe. A'e mehe pemono putar pitài a'e ma'e 10 ma'e wi imunyryk pyrer Tupàn pe imono pyr ikatu ma'e romo nehe. 27 A'e penemimono nuzawy kwaw ma'e tymar hemipo'o kwer ipy Tupàn pe imono pyr nehe. Nuzawy kwaw win iapo pyrer ipy Tupàn pe imono pyr nehe no. 28 Tuweharupi Izaew umur putar pitài uma'e 10 uma'e wi imunyryk pyrer wà nehe. Pepyhyk putar a'e ma'e nehe. Pemunyryk putar pitài ma'e a'e 10 uma'e wi imunyryk pyrer Tupàn Tuweharupi Wiko Ma'e pe imono pyr ikatu ma'e romo nehe no. Pemono putar a'e ma'e xaxeto Àràw pe nehe. 29 Teko umur putar ma'e ihewe wà nehe. Pepyhyk putar wanemimur nehe. Pemur ikurer ikatu wera'u ma'e ihewe nehe. 30 Ikatu wera'u ma'e ihewe imur ire pepuner ikurer ipyhyk pà nehe. Ma'e tymar wiko nezewe a'e. Umur ma'e ihewe. A'e re upyhyk ikurer no. 31 Ne nehe, neànàm wà nehe no, pepuner putar ikurer i'u haw rehe wyzai ywy pehegwer rehe nehe. Ta'e pepyhyk a'e ma'e pema'erekohaw hekuzaromo xe. 32 Napezapó kwaw ikatu 'ym ma'e i'u mehe nehe, aze a'e 'ym mehe we pemunyryk kar ipehegwer ikatu wera'u ma'e Tupàn Tuweharupi Wiko Ma'e pe nehe. Pemuaiw zo Izaew wanemimur ikatu ma'e nehe. Pe'u zo ikurer nehe, ipehegwer ikatu wera'u ma'e ihewe imur 'ym mehe we nehe. Aze mo pezapó nezewe haw, pemuaiw mo Izaew wanemimur ikatu ma'e. Aze naperuzar kwaw ko ze'eg nehe, pemàno putar nehe.

**'Y purumukatu haw**

**19** <sup>1</sup>— Pemume'u ko heze'eg Izaew wanupe nehe, <sup>2</sup> i'i Tupàn Tuweharupi Wiko Ma'e Moizez pe Àràw pe.

— Perur tapi'ak kuzà ipiràg ma'e ikatu 'ymaw hereko 'ymar ko pe uma'erekohaw wi nehe. 3 Pemono xaxeto Ereazar pe nehe. Weraha putar katu pe teko waker haw wi nehe. Uzuka putar waker haw henataromo nehe. 4 Na'e Ereazar upyhyk putar huwykwer nehe. Umupiripirik putar 7 haw ukwà pupe tâpuzrà Tupàn pe imonokatu pyrer kutyr nehe. 5 Na'e hehe we har wapy putar tapi'ak kuzà henataromo nehe. Ukaz putar ipehegwer nehe: ipirer, ho'o kwer, huwykwer, hie kwer. 6 Xaxeto upyhyk putar ywyràkàxigyw ipehegwer imonohok pyrer nehe. Upyhyk putar pitài ixop hákàgwer nehe no. Upyhyk putar àràpuhàràw hawer imupiràg pyrer nehe no. Weityk putar a'e ma'e paw tata tapi'ak hapy haw pupe nehe. 7 Na'e uhez putar uma'e wemimunehew nehe. Uzahak putar nehe no. A'e re upuner teko waker haw pupe wixe haw rehe nehe. Nezewe rehe we wiko putar ikatu 'ym ma'e romo Tupàn henataromo nehe. Xo kwarahy heixe re zo ikatu putar henataromo nehe. 8 Tapi'ak hapy har uhez putar uma'e wemimunehew nehe no. Uzahak putar nehe no. Nezewe rehe we wiko putar ikatu 'ym ma'e romo Tupàn henataromo nehe. Xo kwarahy heixe re zo ikatu putar henataromo nehe. 9 Amo awa Tupàn henataromo ikatu ma'e omono'og putar tanimuk tapi'ak hapy awer rehe har nehe. Weityk putar katu pe teko waker haw wi nehe, ywy pehegwer Tupàn henataromo ikatu ma'e rehe nehe. Teko Izaew uzekaiw katu hehe a'e pe wà nehe. 'Y purumukatu ma'e imuhyk mehe teko omono putar a'e tanimuk ipupe wà nehe. A'e tapi'ak izuka haw umunàn teko wanemiaipo kwer ikatu 'ym ma'e a'e. 10 Tanimuk imono'ogar uhez putar uma'e wemimunehew nehe. Nezewe rehe we wiko putar ikatu 'ym ma'e romo Tupàn henataromo nehe. Xo kwarahy heixe re zo ikatu putar henataromo nehe. Izaew weruzar ko ze'eg tuweharupi nehe. Izaew wainuiuromo har weruzar putar tuweharupi wà nehe no.

**Ze'eg umàno ma'e  
kwer rehe ipokokaw rehe har**

**11** Aze amo opokok umàno ma'e kwer rehe nehe, umumaw putar 7 'ar Tupàn henataromo ikatu 'ym ma'e romo nehe. **12** Na'iruz haw 'ar mehe nehe, 7 haw 'ar mehe nehe no, uzemukatu putar 'y purumukatu har pupe nehe. Ikatu putar Tupàn henataromo nehe. Aze nuzemukatu kar kwaw 3 haw 'ar mehe nehe, 7 haw 'ar mehe nehe, nuiko kwaw Tupàn henataromo ikatu ma'e romo nehe. **13** Wyzài umàno ma'e kwer rehe opokok ma'e nehe, aze nuzemukatu kwaw Tupàn henataromo nehe, wiko putar ikatu 'ym ma'e romo Tupàn henataromo nehe, ta'e nuzakook kwaw 'y purumukatu ma'e uzehe xe. Umuaiw tåpuzràn Tupàn pe imonokatu pyrer a'e. A'e teko nuiko kwaw Izaew romo a'e nehe.

**14** Aze amo umàno tåpuzràn pupe nehe, ipupe wixe ma'e wiko putar ikatu 'ym ma'e Tupàn henataromo nehe. Umumaw putar 7 'ar ikatu 'ym ma'e romo nehe. **15** Ywy'a ipyk 'ym pyr uzeapo putar ikatu 'ym ma'e romo henataromo nehe. **16** Aze amo opokok izuka pyrer rehe nehe, aze ru'u opokok umàno e ma'e kwer rehe nehe, aze ru'u opokok teko ikagwer rehe nehe, aze ru'u opokok hetekwer itym awer rehe nehe, umumaw putar 7 'ar ikatu 'ym ma'e romo Tupàn henataromo nehe.

**17** Pemukatu putar a'e ikatu 'ym ma'e nezewe nehe: pepyhk tamimuk tapi'ak ipiràg ma'e katu 'ygwer imunàn kar haw romo hapy pyrer nehe. Pemono ywy'a pupe nehe. Pezuhez 'y ikatu ma'e hehe nehe. **18** Aze umukatu putar umàno ma'e kwer rehe opokok ma'e wà nehe, awa Tupàn henataromo ikatu ma'e upyhyk putar ixop hákàgwer nehe. Umuàkym putar hákàgwer a'e 'y pupe nehe. Umupiripirik putar a'e 'y tåpuzràn rehe nehe, ipupe har nànàn nehe no, teko ipupe har nànàn nehe no. Aze amo opokok teko ikagwer rehe nehe, aze ru'u itym awer rehe nehe, amo teko Tupàn henataromo ikatu ma'e umupiripirik putar a'e 'y imukatu pyrer a'e teko rehe nehe. **19** Na'iruz haw 'ar mehe nehe, 7 haw 'ar mehe nehe no, Tupàn henataromo ikatu ma'e umupiripirik putar a'e 'y teko ikatu

'ym ma'e rehe nehe. 7 haw 'ar mehe a'e teko ikatu putar henataromo nehe. Uhez putar uma'e wemimunehew nehe. Uzahak putar nehe no. Kwarahy heixe mehe ikatu putar Tupàn henataromo nehe.

**20** Aze amo na'ikatu kwaw Tupàn henataromo nehe, aze nuzemukatu kwaw nehe, wiko wiwi putar ikatu 'ym ma'e romo nehe, ta'e amo numupirik kwaw 'y purumukatu ma'e hehe a'e xe. A'e teko umuawi tåpuzràn Tupàn Tuweharupi Wiko Ma'e pe imonokatu pyrer a'e. A'e rupi a'e teko nuiko kwaw Izaew izuapyr romo nehe.

**21** Peruzar ko ze'eg tuweharupi nehe. 'Y purumukatu ma'e imupiripirikar uhez putar uma'e wemimunehew nehe. Aze amo opokok a'e 'y rehe nehe, wiko putar ikatu 'ym ma'e romo Tupàn henataromo nehe. Xo kwarahy heixe re ikatu putar nehe. **22** Aze amo teko Tupàn henataromo ikatu 'ym ma'e opokok amo ma'e rehe nehe, a'e ma'e uzeapo putar ikatu 'ym ma'e romo henataromo nehe no. Aze amo opokok a'e teko rehe nehe, wiko putar ikatu 'ym ma'e romo Tupàn henataromo nehe no. Xo kwarahy heixe re ikatu putar nehe.

**Mirià umàno haw**

**20** <sup>1</sup>Zahy ipy rehe teko Izaew paw oho ywyxiguhu Zim her ma'e pe wà. Uzapó uker haw Kanez pe wà. Mirià umàno a'e pe. Utym hetekwer a'e pe wà. **2**Naheta kwaw 'y a'e pe. A'e rupi teko uzemono'og Moizez pe Áràw pe uze'eg ahyahy pà wà. **3**— Aze mo urumàno Tupàn Tuweharupi Wiko Ma'e henataromo amogwer Izaew urerapi har wainuinuromo, a'e mehe mo ikatu wera'u mo. **4**Uruiko Tupàn Tuweharupi Wiko Ma'e hemiaihu romo ure. Máràzàwe tuwe urererur pe xe ko ywyxiguhu pe. Aipo urereimaw wainuinuromo uremàno àwàm rehe urererur pe. **5**Máràzàwe tuwe urererur pe Ezit wi ko ywy iaiw ma'e pe. Naheta kwaw arozràn xe. Naheta kwaw ma'ywa 'yw xe. Ni pi 'yw, ni uwà 'yw, ni homà 'yw naheta kwaw. Naheta kwaw 'y ureremi'u romo no.

**6**Na'e Moizez uhem a'e wi Áràw rehe we teko wanuwi tåpuzràn Tupàn pe imonokatu

pyrer ukenaw pe wà kury. Wapyk upenàràg rehe uwa imuhyk pà ywy rehe wà. Tupàn Tuweharupi Wiko Ma'e heko haw heny katu haw uxexak kar wanupe. **7** Uze'eg Tupàn Tuweharupi Wiko Ma'e Moizez pe.

**8** — Epyhyk ywyra heze'eg itapew rehe har hyru henataromo har nehe. A'e re emono'og teko Àràw rehe we ne wà nehe. Paw rupi wanenataromo eze'eg itahu pe nehe. A'e mehe 'y uehem putar izuwi nehe. Nezewe mehe penuhem putar 'y itahu wi nehe, teko wanupe imono pà nehe. Ui'u putar wà nehe. Waneimaw ui'u putar wà nehe no.

**9** Na'e Moizez upyhyk ywyra Tupàn henataromo har oho ize'eg rupi katete kury.

**10** Moizez omono'og teko itahu henataromo Àràw rehe we wà kury. Uze'eg wanupe kury. — Pezeapyaka katu nehe, teko Tupàn heruzar 'ymar wà. Aipo urumuhem kar putar 'y 'ág itahu wi peme ure nehe, i'i wanupe. **11** Upir Moizez opo. Unupà itahu mokoz haw ywyra pupe. Uhem 'y tetea'u izuwi uwyrık pà. Ui'u teko wà. Ui'u waneimaw wà no.

**12** Uze'eg Tupàn Tuweharupi Wiko Ma'e Moizez pe Àràw pe kury. — Napezeruzar katu kwaw herehe. A'e rupi napexak kar kwaw hepuner haw ikatuahy ma'e teko Izaew wanupe. A'e rupi naperaha kwaw heremaihu ywy heremimume'u kwer pe pe wà nehe, i'i wanupe.

**13** A'e ma'e uezapo Merima pe. Teko umume'eahy Tupàn Tuweharupi Wiko Ma'e ikatu 'ymaw a'e pe wà. Ikatu 'ymaw imume'eahy haw, i'i her zaneze'eg rupi. Tupàn uzapo ma'e a'e pe upuner haw ikatu ma'e hexak kar pà a'e pe no.

### **Enom ywy rehe har wanuwhaw numugwaw kar kwaw weko haw myteromo wà**

**14** Kanez tawhu pe wanekon wà kury. Moizez omono kar uez'eg heraha har Enom izuapyapyr wanuwhawete pe wà kury. — Ko ze'eg neànàm Izaew ta'yr izuapyapyr umur kar newe wà. Erekaww ureroko haw zawaiw katu ma'e no. **15** Erekaww ureipy Ezit pe waho awer kwehe arer no.

Urumumaw kwarahy tetea'u a'e pe ureroko pà. Ezit ywy rehe har werekoahy ureipy wà. Urerekaoahy wà no. **16** A'e rupi urenoz urepytywà àwàm Tupàn Tuweharupi Wiko Ma'e pe ure. Wenu ureze'eg a'e. A'e rupi umur kar weko haw pe har Ezit ywy wi urepyro kar pà izupe. Uruiko Kanez tawhu pe neiyaw huwake kury. **17** Tuwe uruahaw neywy nehe. Ure nehe, urereimaw wà nehe no, nuruhem kwaw urerape wi nehe. Nuruixe kwaw peko pe nehe. Nuruixe kwaw uwà tyw penemitygwer pe nehe. Nuru'u kwaw 'y neyzygwar pupe har nehe. Neywy rehe ureroko mehe uruata putar pe uhu ma'e rupi nehe, i'i izupe wà.

**18** Enom wanuwhawete uwazar Moizez ze'eg izupe. — Nan. Nuruhaw kar kwaw urewy peme nehe. Aze pezeagaw nehe, uruata putar pekutyr nehe, peàmàtyry'ym pà nehe.

**19** Na'e teko Izaew uze'eg wà kury. — Uruata putar oroho pe uhu ma'e rupi nehe. Aze amo u'u 'y nehe, aze amo ma'ea'yr u'u 'y nehe, urumekuzar putar nehe, i'i wà. Urepurahaw wer neywy rehe. Nuruputar kwaw amo ma'e, i'i wà.

**20** Enom wanuwhawete uwazar waze'eg wanupe. — Nan. Napeahaw kwaw nehe, i'i wanupe. Na'e Enom izuapyapyr zauxiapekwer tetea'u uzàmàtyry'ym teko Izaew wà wà kury. **21** Nezewe mehe Enom nuwahaw kar kwaw uiwy Izaew wanupe wà. A'e rupi Izaew oho amo pe rupi wà.

### **Àràw màno haw**

**22** Teko Izaew paw uhem Kanez tawhu wi wà, ywytyr Or her ma'e pe oho pà wà. **23** Enom ywyaw iwyr hin a'e ywytyr. A'e pe Tupàn Tuweharupi Wiko Ma'e uze'eg Moizez pe Àràw pe kury.

**24** — Àràw nuixe kwaw ywy Izaew wanupe heremimume'u kwer pe a'e nehe. Umàno putar nehe, ta'e 'y Merima wi imuhem kar mehe naperuzar kwaw heze'eg xe. **25** Erur Àràw nehe. Erur ta'yr Ereazar nehe no. Emuzeupir kar Or ywytyr rehe ne wà nehe. **26** A'e re enuhem Àràw ikamir puku izuwi

nehe. Emunehew kar Ereazar pe nehe. Àràw umàno putar a'e pe nehe.

**27** Uzapo Moizez a'e ma'e Tupàn Tuweharupi Wiko Ma'e ze'eg rupi katete a'e. Uzeupir Or ywytyr rehe teko paw wanenataromo wà. **28** Wenuhem Moizez kamir puku xaxeto romo heko haw hexak kar haw Àràw wi kury. Umunehew kar Ereazar pe. Umàno Àràw ywytyr apyr kury. A'e re Moizez wezyw Ereazar rupi. **29** Àràw imàno awer ikwaw mehe teko umumaw 30 'ar uzai'o pá hehe wà.

### Araz heitykaw

**21** <sup>1</sup>Araz a'e, Kànàà wanuwihawete Kànàà ywy rehe kwarahy ihemaw awyze har kutyr wiko ma'e ukwaw Izaew wanur haw a'e. — Ur waiko pe Atari her ma'e rupi wà, i'l wà. A'e rupi uzàmàtyry'ym Izaew oho wà kury. Weraha amo teko wemipyhyk kwer uzeupi romo wà. **2**Na'e teko Izaew umume'u ko ma'e Tupàn Tuweharupi Wiko Ma'e pe kury. — Aze ereityk kar 'aw teko urewe ne wà nehe, urumumaw putar waneko haw tawhu paw rupi nehe, i'l izupe wà.

**3** Tupàn Tuweharupi Wiko Ma'e wenu Izaew waneminoz. Uptyywà Izaew Kànàà waneityk pá wà. Nezewe mehe Izaew umumaw wà. Umumaw waneko haw tawhu wà no. — Orima, i'l a'e ywy pe wà. — Ma'e imumaw paw, i'l her zaneze'eg rupi.

### Moz morog iapo pyrer

**4**Na'e Izaew uhem oho Or ywytyr wi wà kury, Yryhupiràg piarupi wà kury. Nezewe umàmàñ Enom ywy iwy hehe wata 'ym pá wà. Wata mehe teko upytu'u ma'e hàrogatu re wà. **5** Uzypyrog Tupàn ikutyr Moizez ikutyr uze'eg pá wà. — Màràzàwe tuwe Tupàn zanepyro kar Moizez pe Ezit ywy wi a'e. Aipo zanemumàno kar putar ywyxiguhu rehe nehe. Naheta kwaw temi'u xe. Ni 'y naheta kwaw. Zaneremi'u xe har na'ikatu kwaw. Urekene'o kury.

**6**Na'e Tupàn Tuweharupi Wiko Ma'e omono kar mozaiw wanupe wà kury. Uhàuhàz teko wamytepe wà. Uxi'u Izaew

tetea'u wazuka pá wà. **7**Na'e teko uze'eg oho Moizez pe wà kury. — Ikatu 'ym ma'e uruzapo Tupàn Tuweharupi Wiko Ma'e henataromo ure. Ta'e uruze'eg zemueteahy hehe ure xe. Uruze'eg zemueteahy nerehe ure no. Emuhem kar 'agwer mozaiw teko wamyster wi Tupàn pe ne wà nehe, i'i izupe wà. Na'e Moizez uze'eg Tuweharupi Wiko Ma'e pe teko wanehe kury. **8**Uze'eg Tupàn Moizez pe. — Emupyràñ itazu mozaiw hagapaw romo iapo pá nehe. Emupu'ám hagapaw ywyra rehe. Tuwe mozaiw hemixi'u kwer ume'e hehe wà nehe. Nezewe mehe ikatu putar wà nehe.

**9**Na'e umupyràñ Moizez itazu morog mozaiw hagapaw romo iapo pá. Omomog ywyra imupu'ám pyrer rehe. Aze mozaiw uxí'u amo, a'e teko ume'e a'e mozaiw hagapaw rehe wà. Ikatu nezewe mehe wà.

### Izaew oho Moaw waiwy rehe wà

**10**Na'e Izaew uhem a'e wi wà. Uzapo uker haw Omot pe wà. **11**Na'e oho Omot wi tawhu kwer Amari her ma'e pe ywyxiguhu rehe Moaw waiwy ikupe kutyr kwarahy ihemaw kutyr wà kury. **12**A'e re uhem a'e wi uker haw iapo pá Zerez ywyàpyznaw rehe wà. **13**A'e wi oho uker haw iapo pá Aroron yrykawhu izywyr kwarahy heixe haw awyze har kutyr ywyxiguhu Amohe waiwy pe uhem ma'e rehe wà. (Aroron yrykawhu uzeapo ywyaw Moaw waiwy Amohe waiwy myter pe har romo.) **14**A'e rupi nezewe uze'eg pape Tupàn Tuweharupi Wiko Ma'e ipuruàmàtyry'ym awer her ma'e a'e: Waew tawhu Xupa ywy rehe har, ywyàpyznaw a'e pe har wà no, yrykawhu Aroron, **15**wezyw haw a'e ywyàpyznaw wanuwi har Ar tawhu pe oho ma'e wà, Moaw waiwyaw kutyr oho ma'e. **16**A'e wi oho Meer pe wà. 'Yzygwar, i'i her zaneze'eg rupi. Tupàn Tuweharupi Wiko Ma'e uze'eg Moizez pe a'e pe. — Emono'og teko ne wà nehe. Amono putar 'y teko nànàñ ihe nehe, i'i izupe.

**17**Na'e teko Izaew umuzàg ko zegar haw wà.

- O 'zygwar, emuhem kar 'y nezewi nehe.  
 A'e mehe urumume'u putar nekattu haw zegar haw imuzàg pà nehe.  
**18** 'Ag 'zygwar tuwihaw uhàwykàz wà.  
 Teko wanuwhaw uwàptymawok wà, uywyra tuwihaw romo hexak kar haw pupe wà,  
 Ywyra purunupà haw pupe wà.  
 Ywyxiguhu wi oho Matana pe wà, i'i wà.  
**19** Matana wi oho Nariew pe wà. Nariew wi oho Mamot pe wà. **20** Mamot wi oho ywyàpyznaw Moaw waiwy rehe har pe Piziga ywytyr iwy pe wà. Teko upuner ywyxiguhu hexakaw rehe a'e wi wà.

### *Izaew weityk Xeom wà, Og wà no*

**21** Na'e teko Izaew izuapyapyr omono kar uze'eg heraha har Xeom Amohe wanuwhawete pe wà kury.

**22** — Tuwe uruahaw neywy nehe. Nuruixe kwaw peko pe nehe. Nuruixe kwaw uwà tyw penemytgwer pe nehe. Nuru'u kwaw 'y nezygwar pupe har nehe. Tuwe uruahaw neywy nehe. Ure nehe, urereimaw wà nehe no, nuruhem kwaw pe wi nehe. Neywy rehe urerekö mehe uruata putar pe uhu ma'e rupi nehe. Te uruhem oroho peywy wi nehe, i'i izupe wà. **23** Nezewe rehe we Xeom nuwahaw kar kwaw uiwy Izaew wanupe. Nan. Omono'og wemiruze'eg paw rupi wà, teko Izaew wakutyr ywyxiguhu rehe waneraha pà wà. Xeom oho Zaxa pe Izaew waàmàtyry'ym pà. **24** Izaew uzuka Amohe tetea'u utakihe pupe wà. Upyhyk waiwy wanuwi wà. Ywy ipyhyk pyrer uzypyrog Aronon yrykawhu pe. Oho yrykawhu Zamok pe. Zamok upyta Amon waiwyaw pe. Heta pàrirogawtâtà a'e pe. **25** Nezewe Izaew upyhyk a'e tawhu Amohe waiwy rehe har paw rupi wà. Upyta wapupe wiko pà wà, Ezemon tawhu pupe wà, taw a'e tawhu izywyr har wapupe wà no. **26** Xeom Amohe ywy rehe har wanuwhawete a'e, wiko Ezemon tawhu pe a'e. A'e 'ym mehe uzàmàtyry'ym Moaw wanuwhawete a'e

tawhu pe har wazar a'e. Upyhyk iziwy paw wanuwi wà. A'e ywy oho Aronon yrykawhu pe. **27** A'e rupi ze'eg puràg iapo har uze'eg nezewe hehe wà.

Pezur Ezemon pe nehe,  
 tawhu tuwhawete Xeom  
 heko haw pe nehe.

Uzapo wi putar wà nehe.  
 Uzapokatu wi putar wà nehe.

**28** Uhem tata Ezemon wi.  
 Uhem heny kwer tawhu tuwhawete  
 Xeom heko haw wi.  
 Zauxiapékwer tetea'u  
 uzemono'og ma'e wà,  
 nuzawy kwaw tatahu wà.  
 Umumaw Ar tawhu Moaw  
 ywy rehe har wà.  
 U'u ywytyr Aronon yrykawhu  
 ywate har izywyr har wà.

**29** Pezemumikahy nehe,  
 Moaw ywy rehe har wà.  
 Tupàn ua'u Kemoz imuwete har wà.  
 Pekázym putar nehe.  
 Tupàn ua'u pezar umuzàn kar  
 zauxiapékwer pemiryrap wà.  
 Omono kar penazyr peàmàtyry'ymar  
 wanupe wà no,  
 umuigo kar Xeom Amohe  
 wanuwhawete pe uma'erekö  
 e ma'e romo wà.

**30** Ezemon ipuner haw upaw kwez kury.  
 Ezemon wi Nimon pe ma'e paw  
 uzeapo imumaw pyrer romo a'e wà.  
 Weityk Nopa tawhu wà.  
 Tata uhem Menema tawhu pe no,  
 i'i wà.

**31** Nezewe mehe Izaew upyta Amohe ywy rehe wiko pà wà kury. **32** Na'e Moizez omono kar teko Zazer tawhu pe wà. — Peme'egatu hehe nehe, i'i wanupe. A'e re Izaew upyhyk taw Zazer tawhu izywyr har wà. Umuhem kar Amohe ywy rehe har a'e pe wiko ma'e paw rupi wà.

**33** Na'e Izaew uzewyr Mâxà piarupi uzeupir pà wà. Og Mâxà wanuwhawete uhem waàmàtyry'ym pà Enerez tawhu pe. **34** Tupàn

Tuweharupi Wiko Ma'e uze'eg Moizez pe. — Ekyze zo izuwi nehe. Ta'e amur putar wanuwhawete nepo pe ihe nehe xe. Amur putar hemiaihu newe wà nehe no. Amur putar iziyi newe nehe no. Nema'enukwaw Xeom Amohe wanuwhawete Ezemon pe har pe neremiapo kwer. Ezapo nezewegatete haw Og pe nehe no.

**35** A'e rupi Izaew uzuka Og wà. Uzuka ta'yr wà no. Uzuka hemiaihu paw wà no. Ni pitai nuhem kwaw wà. Upyhyk waiwy wanuwi wà.

**Marak omono kar uze'eg Mârààw pe**  
**22** <sup>1</sup> Izaew uhem oho a'e wà. Uzapo uker haw ywytyr heta 'ymaw Moaw ywy rehe har rehe Zötàw yrykawhu ikupe kutyr kwarahy ihmaw kutyr Zeriko tawhu henataromo wà.

**2** Amo umume'u Izaew wanemiapo kwer oho Marak Zipor ta'yr Moaw wanuwhawete pe wà. — Ummaw Amohe wà, i'i izupe wà. **3** Ukyze Izaew wanuwi, ta'e heta tetea'u wà xe. Azeharomoete Moaw izuapypyr ukyzeahy Izaew wanuwi wà. **4** Moaw uze'eg Minia wanuwhawete wanupe wà. — A'e teko u'l putar zaneywyr har paw rupi wà nehe. Nuzawy kwaw tapi'ak ka'api'i paw i'u har wà nehe, i'i wà. **5** Na'e tuwhawete Marak wenoz kar Mârààw Meor ta'yr imuwa kury. Mârààw wiko Petor tawhu Ewparat yrykawhu huwake har Amaw ywy rehe har pe a'e. Ize'eg heraha har umume'u ko ze'eg izupe wà. — Amo teko uhua'u ma'e uhem Ezit ywy wi paw rupi wà. Uhàuhàz ko ywy nànàñ wà kury. Ur heruwake wiko pà wà kury. **6** Aenoz ko ma'e newe. — Ezur xe 'aw teko wanehe ze'egaiw imono pà nehe. Ta'e upuner wera'u ihewi wà xe. Aze ru'u nezewe mehe apuner putar wanetykaw rehe xe wi wamuhem kar haw rehe nehe. Akwaw ko ma'e ihe. Aze eremono ze'egatu amo rehe, ikatu ma'e uzeapo a'e teko pe. Aze eremono ze'egaiw amo rehe, ikatu 'ym ma'e uzeapo a'e teko pe, i'i izupe wà.

**7** Na'e Moaw wanuwhawete oho Minia wanuwhawete wanupi izupe uze'eg pà wà kury. Weraha temetarer uzeupi ze'egaiw

hekuzaromo wà nehe. Uhem Mârààw heko haw pe wà. Umume'u Marak ze'eg izupe wà. **8** Mârààw uwazar waze'eg wanupe nezewe. — Peker xe pitai haw nehe. Tupan Tuweharupi Wiko Ma'e umume'u putar ma'e ihewe nehe. Pyhewe amume'u putar a'e ma'e peme nehe, i'i wanupe. Moaw wanuwhawete upyta Mârààw ipyr wà. **9** Tupan ur izupe uze'eg pà. Upuranu hehe. — Amo awa wiko neypy wà. Mo romo aipo wiko wà, i'i izupe. **10** Uwazar Mârààw Tupan ize'eg izupe. — Marak Moaw wanuwhawete umur kar uze'eg ihewe. **11** — Amo teko tetea'u uhem Ezit ywy wi paw rupi wà. Uhàuhàz ko ywy nànàñ wà kury. Marak uputar na'arewahy heho àwàm a'e. — Emono ze'egaiw 'aw teko wanehe nehe, i'i iko ihewe. Aze ru'u nezewe mehe upuner wanetykaw rehe nehe, wamuhem kar haw rehe nehe.

**12** Tupan uze'eg Mârààw pe. — Eho zo wanupi nehe. Emono zo ze'egaiw Izaew wanehe nehe. Ta'e ihe amono heze'egatu a'e teko wanehe ihe xe.

**13** Ku'em mehe Mârààw upu'äm tuwhaw Marak hemimur kwer wanupe uze'eg pà kury. — Pezewyr peywy pe nehe. Tupan Tuweharupi Wiko Ma'e nahemono kar kwaw penupi a'e, i'i wanupe.

**14** Na'e uzewyr oho wà. Uze'eg oho Marak pe wà. — Mârààw natur wer kwaw urerupi a'e, i'i izupe wà.

**15** Na'e Marak omono kar amo tuwhaw izupe wà kury. Heta wera'u tuwhaw izypy mehe arer wanuwi wà. Upuner wera'u wanuwi wà no. **16** Uze'eg oho Mârààw pe wà. — Ihe Marak Zipor ta'yr ainoz xe nezur àwàm newe kury. **17** Amono putar temetarer tetea'u newe hekuzaromo nehe. Wyzai neremimutar amono putar newe nehe. Ezur 'aw teko wanehe ze'egaiw imono pà nehe, i'i izupe wà, Marak ize'eg imume'u pà wà.

**18** Uwazar Mârààw waze'eg wanupe. — Aze mo Marak umur or wàpuzuhi pe har paw rupi, aze mo umur parat wàpuzuhi pe har paw rupi, napuner iwer mo ma'e iapo haw rehe. Ni uhua'u ma'e ni pixikal'i ma'e iapo haw rehe napuner iwer mo, aze mo Tuweharupi

Wiko Ma'e hezar nuzapo kar iwer mo a'e ma'e ihewe. **19** Aenoz pitai ma'e peme kury. Peker xe hepyr nehe. Nezewe mehe akwaw putar Tuweharupi Wiko Ma'e ize'eg ihe nehe, aze umume'u ma'e ihewe nehe, i'i wanupe.

**20** Pyhaw Tuweharupi Wiko Ma'e uzexak kar Mârààw pe uze'eg pà. — 'Aw awa ur nerenoz pà wà. A'e rupi ezemuàgà'yim wanupi neho àwàm rehe nehe. Nezewe rehe we xo heremiaipo kar ezapo nehe. **21** A'e rupi iku'egwer pe Mârààw uzemuàgà'yim kury. Omono izuru pe har weimaw zumeta'i kuzà rehe. Oho Moaw wanuwihaw wanupi.

### *Mârààw, zumeta'i, Tupàn heko haw pe har*

**22** Tupàn wikwahy a'e, ta'e Mârààw oho a'e xe. Oho weimaw zumeta'i kuzà ikupe pe. Mokoz izupe uma'ereko ma'e oho hupi wà no. Na'arewahy Tupàn heko haw pe har upu'äm henataromo pe rupi iho re imupytu'u kar pà. **23** Zumeta'i wexak Tupàn heko haw pe har pe rupi. Wereko takihepuku opo pe. Hexak mehe zumeta'i uhem oho pe wi kaiwer kutyr. Na'e Mârààw upetek zumeta'i heraha wi pà pe pe. **24** Na'e Tupàn heko haw pe har upyta pe pixika'i haw pe kury, mokoz uwà tyw wamyster pe. Heta pàrirogawtâtà ita iapo pyrer mokoz iphegwer wanehe. **25** Zumeta'i Tupàn heko haw pe har hexak mehe uzekok pàrirogawtâtà rehe Mârààw ipy imuzarahy pà hehe. A'e rupi Mârààw upetek wi zumeta'i. **26** Na'e Tupàn heko haw pe har oho wanenataromo kury. Upyta pe pixika'i wera'u haw pe kury. Zumeta'i nupuner kwaw ni awyze har rupi ni ahurehe har rupi oho haw rehe. **27** Zumeta'i wexak Tupàn heko haw pe har. A'e rupi uzeàpàrirog ywy rehe. Mârààw wikwahy tuwe kury. A'e rupi unupà zumeta'i ywyra pupe kury. **28** Na'e Tuweharupi Wiko Ma'e umuze'eg kar zumeta'i kury. Uze'eg Mârààw pe. — Ma'e azapo newe ihe. Mâràzawé tuwe hepetek pe na'iruz haw, i'i izupe.

**29** Uwazar Mârààw izupe. — Urupetek ihe, ta'e naherekoo katu kwaw pe ne xe. Aze

mo heta takihepuku hepo pe, uruzuka mo na'arewahy, i'i izupe.

**30** Na'e zumeta'i uze'eg wi Mârààw pe kury. — Aipo naiko kwaw nereimaw romo. Aipo nerezeupir kwaw hekupe pe tuweharupi. Aipo azapo agwer ma'e newe tuweharupi, i'i izupe. — Nan, i'i Mârààw izupe.

**31** Na'e Tupàn Tuweharupi Wiko Ma'e wexak kar weko haw pe har Mârààw pe kury. Upyta pe rupi. Wereko takihepuku opo pe. Mârààw wapyk upenàràg rehe uwa imuhyk pà ywy rehe. **32** Tupàn Tuweharupi Wiko Ma'e heko haw pe har uze'eg kury. — Mâràzawé tuwe erepetek zumeta'i na'iruz haw. Ihe azur neàmàtyry'ymar ài nemuzewyr kar pà ihe. Ta'e na'ikatu kwaw ko neata haw ihewe xe. **33** Nereimaw zumeta'i kuzà herexak a'e, ihewi utyryk pà na'iruz haw a'e. Aze mo nuzapo iwer nezewe haw, uruzuka mo ihe. Nazuka iwer mo nereimaw ihe, i'i izupe.

**34** Na'e Mârààw uze'eg Tupàn heko haw pe har pe kury. — Azapo ikatu 'ym ma'e Tupàn henataromo. Nakwaw kwaw pe rupi nerekoo haw hemupytu'u kar har romo. Aze hemuzewyr kar kutàri nehe, azewyr putar hereko haw pe nehe.

**35** Uwazar Tupàn Tuweharupi Wiko Ma'e ize'eg izupe. — Eho 'aw awa wanupi nehe. Xo heze'eg emume'u nehe, i'i izupe. Nezewe mehe Mârààw oho tuwihaw Marak hemimur karer wanupi.

### *Marak umuawyze Mârààw*

**36** — Mârààw uhem iko kury, i'i amo Marak pe. A'e rupi oho huwàxi pà tawhu Aronon yrykaw izywyr har Moaw ywy izywyr har Ar her ma'e pe kury. **37** Upuranu Marak hehe. — Mâràzawé tuwe nanezur wer kwaw pitai haw mehe nerenoz kar mehe. — Numur kwaw temetarer teteau ihewe nehe, aipo ere nezeupe herehe ne, i'i izupe.

**38** Mârààw uwazar ize'eg izupe. — Aiko xe nepyr kury. Napuner kwaw heze'eg imume'u haw rehe nehe. Xo Tupàn ze'eg imume'u haw rehe apuner putar nehe, i'i izupe.

**39** Na'e Mârààw oho Marak rupi Uzot tawhu pe kury. **40** Marak uzuka tapi'ak wà.

Uzuka àràpuhàràn hawitu ma'e kuzà wà no. Omono wano'o kwer ipehegwer Mârààw pe tuwihaw hehe we har wanupe no.

### **Mârààw ze'eg awer pitài haw**

**41** Iku'egwer pe ku'em mehe Marak weraha Mârààw Mamot-Ma'aw pe. Mârààw upuner amo teko Izaew wanexakaw rehe a'e wi.

**23** <sup>1</sup>Na'e Mârààw uze'eg Marak pe. — Ezapo 7 ma'ea'y hapy haw nehe. Emuàgà'yim 7 tap'iaka'yawa ne wà nehe. Emuàgà'yim 7 àràpuhàràn hawitu ma'e awa ne wà nehe no.

**2** Marak weruzar Mârààw ze'eg. Na'e uzuka pitài tapi'ak pitài àràpuhàràn rehe we ma'ea'y hapy haw wanehe pitàitâigatu wà. **3** Na'e Mârààw uze'eg Marak pe. — Epyta neremimono kwer hapy pyrer huwake nehe. Aha putar newi nehe. Aze ru'u Tupàn Tuweharupi Wiko Ma'e ur heàwàxi pà nehe. Aze uzapo kar ma'e ihewe nehe, amume'u putar a'e ma'e paw newe nehe, i'i izupe. Na'e Mârààw uezepir a'e zutyska'i amo ywytyr apyr. **4** Tupàn uwàxi Mârààw wà a'e pe. Mârààw uze'eg izupe. — Azapo 7 ma'ea'y hapy haw ihe wà. Azuka pitài tapi'ak pitài àràpuhàràn rehe we ma'ea'y hapy haw nàñan ihe wà, i'i izupe.

**5** Tupàn Tuweharupi Wiko Ma'e uze'eg Mârààw pe, hemimume'u ràm imume'u pà izupe. — Ezewyr ko heze'eg imume'u pà Marak pe kury, i'i izupe. **6** Na'e Mârààw uezewyr Marak pe kury. Marak wiko wemimono kwer hapy pyrer huwake a'e rihi. Moaw wanuwhaw wiko hehe we a'e wà no.

**7** Na'e Mârààw umume'u ko ze'eg puràg uezapo ma'e ràm imume'u haw a'e kury.

- Marak Moaw wanuwhawete hemur kar Xir ywy wi a'e.
- Omono kar amo awa ywytyruhu kwarahy ihmaw kutyr har pe hepiaromo a'e wà.
- Ezur nehe, i'i ihewe.
- Emono ze'egaiw teko Izaew wanehe ihewe nehe, i'i ihewe.
- Azeharomoete, emono ze'egaiw

Izaew izuapyapyr wanehe nehe, i'i ihewe.

**8** A'e teko uzuka putar Moaw a'e wà nehe.

Napuner kwaw ze'egaiw imono haw rehewanehe nehe. Tupàn numume'u kwaw Izaew wanehe uzepyk àwàm a'e.

A'e rupi namume'u kwaw wanehe izepyk àwàm ihe nehe.

**9** Itahu apyr hereko mehe, ywytyruhu apyr hereko mehe aeaxak teko Izaew izuapyapyr ihe wà.

Wiko a'e zutyska'i wà. — Nazaike kwaw amogwer teko wazàwe, i'i uezuepepe wà.

**10** Zako izuapyapyr nuzawy kwaw ywy ku'i kwer wà.

Heta tetea'u wà. Ni amo nupuner kwaw wapapar haw rehewà.

Aze mo aiko Tupàn hemiaihu romo a'e teko wainuiuromo hemàno mehe,

A'e mehe mo ikatu mo ihewe. Hereko katu wer teko imunar 'ym ma'e wazàwe ihe, i'i Mârààw.

**11** Na'e Marak uze'eg Mârààw pe kury. — Ma'e erezapo kwez ihewe kury. Amono kar amo nepiaromo. — Emono ze'egaiw heàmàtyry'ymar wanehe nehe, a'e newe. Nezewe rehe we eremono ze'egatu wanehe, i'i izupe.

**12** Uwazar ize'eg izupe.

— Aze Tupàn Tuweharupi Wiko Ma'e umume'u kar ma'e ihewe, xo a'e ma'e zo imume'u haw rehe apuner ihe, i'i.

### **Mârààw ize'eg awer mokoz haw**

**13** Na'e Marak uze'eg Mârààw pe.

— Ezur herupi amo ywy pehegwer pe nehe. A'e pe erepunyer putar amogwemogwer Izaew wanexakaw rehe nehe. A'e pe nerekomehe emono ze'egaiw a'e teko wanehe nehe, aze ikatu newe nehe, i'i izupe.

**14** Marak weraha Mârààw kaiwer Zopi her ma'e Piziga ywytyr apyr har pe. Uzapo 7 ma'e'a'yr hapy haw a'e pe wà. Ma'e'a'yr hapy haw nànàn uzuka pitài tapi'aka'yr awa pitàitàigatu wà. Uzuka pitài àràpuhàràñ hawitu ma'e awa pitàitàigatu wà no.

**15** Na'e Mârààw uze'eg Marak pe.

— Epyta xe neremimono kwer hapy pyrer huwake nehe. Aha putar newi Tupàn Tuweharupi Wiko Ma'e huwàxi pà nehe, i'i izupe.

**16** Tuweharupi Wiko Ma'e uwàxi Mârààw wà a'e pe. Umume'u hemimume'u ràm izupe. — Ezewyr Marak pe heze'eg imume'u pà izupe kury, i'i izupe. **17** A'e rupi Mârààw uzewyr Marak huwàxi pà. Wiko wemimono kwer hapy pyrer huwake rihi. Moaw wanuwihaw wiko hehe we wà no. — Ma'e Tuweharupi Wiko Ma'e umume'u newe, i'i Marak izupe. **18** Uwazar Mârààw Marak ize'eg izupe ko ze'eg puràg imume'u pà.

— Ezur nehe, Marak Zipor ta'yr.

Einu katu heremimume'u ràm nehe.

**19** Tupàn nahemu'em kwaw teko wazàwe a'e.

Nuiko kwaw teko romo.

Nuzewyr kwaw uze'eg awer wi.

Aze Tupàn umume'u wemiaco ràm, aipo nuzapo kwaw.

— Azapo putar ihe nehe, i'i.

Uzapo tuwe a'e.

**20** — Emono ze'egatu Izaew wanehe nehe, i'i ihewe.

Omono ze'egatu wanehe.

Napuner kwaw ze'egaiw wanehe imono haw rehè kury.

**21** Aexak Izaew waneko àwàm ihe. Naheta kwaw iaiw haw wanupe nehe. Naheta kwaw ma'erahy wanupe nehe.

Tuweharupi Wiko Ma'e a'e, wazar a'e, wiko wanehe we a'e.

Teko uhupukaz wà.

— Tuweharupi Wiko Ma'e wiko zaneruwihawete romo a'e, i'i wà.

**22** Tupàn upyro Izaew a'e wà, Ezit ywy wi a'e wà.

Ikàg tapi'ak awa hehaite ma'e ài.

**23** Ni amo nupuner kwaw ze'egaiw imono haw rehè wanehe paze ma'e ài wà nehe. Nupuner kwaw uezapo ma'e ràm imume'u muà'u haw rehè ikatu 'ym ma'e iapo haw rehè wanupe wà.

Teko paw uze'eg putar nezewé a'e teko wanehe wà nehe.

— Pexak Tupàn hemiapo kwer nehe, i'i putar wà nehe.

**24** Izaew upu'am zàwàruhu iriàw kuzà ài wà.

Ikàg zàwàruhu iriàw awa ài wà.

Wemiar i'u re zo upytu'u putar nehe. Wemipyhyk wanuwykwer i'u re zo upytu'u putar nehe, i'i wà.

**25** Na'e Marak uze'eg Mârààw pe.

— Aze nerepuner kwaw ze'egaiw imono haw rehè Izaew wanehe nehe, emono zo ze'egatu wanehe nehe, i'i izupe. **26** Mârààw uwazar ize'eg izupe. — Ko ma'e amume'u kwez newe: xo Tupàn Tuweharupi Wiko Ma'e hemiapo kar iapo haw rehè zo apuner ihe, i'i izupe.

### Mârààw ze'egatu haw na'iruz haw

**27** Na'e Marak uze'eg Mârààw pe.

— Ezur herupi nehe. Ureraha putar amo ywy pehegwer pe nehe. Aze ru'u Tupàn omono kar ze'egaiw Izaew wanehe newe a'e pe nehe, i'i izupe.

**28** Na'e Marak weraha Mârààw Peor ywytyr apyr iphegwer ywyxiguhi kutyr ume'e ma'e rehè. **29** Uze'eg Mârààw Marak pe.

— Ezapo 7 ma'e'a'yr hapy haw nehe. Emuàgà'y'm 7 tapi'aka'yr awa ne wà nehe. Emuàgà'y'm 7 àràpuhàràñ hawitu ma'e awa ne wà nehe no.

**30** Marak weruzar Mârààw ze'eg. Na'e uzuka pitài tapi'ak pitài àràpuhàràñ rehè we ma'e'a'yr hapy haw nànàn pitàitàigatu wà.

**24** <sup>1</sup>Màrààw wexak Tupàn Tuweharupi Wiko Ma'e hemimutar kury. Iporomono kar wer ze'egatu Izaew wanehe Márààw pe a'e. A'e rupi Márààw nupuranu kwaw Tupàn rehe kury. — Ma'e ereputar, ni'i kwaw izupe. Nan. Uwak ywyxiguhi kutyr. <sup>2</sup>Wexak teko Izaew a'e pe wà. Izaew ta'yr wazuapyapyr uzemono'og uezhezehe uker haw iapo pà pitàitágatu a'e pe wà. Tupàn Hekwe umuze'eg kar Márààw kury. <sup>3</sup>A'e rupi umume'u ko ze'eg puràg uezapo ma'e ràm imume'u haw.

Na'aw Márààw Meor ta'yr ze'eg xe.

'Aw awa upuner ma'e hexak  
katu haw rehe.

Na'aw ize'eg xe.

**4** Upuner Tupàn ze'eg henu  
katu haw rehe no.

A'ar ihe. Herehazawok.

Aexak Tupàn upuner ma'e ihe.

**5** Ipuràg eteahy teko Izaew  
izuapyapyr waker haw.

Ipuràg eteahy wanàpuzràn wà.

**6** Nuzawy kwaw inàzàràn 'yw  
tetea'u uzehyrohyrogatu ma'e.

Nuzawy kwaw ma'etymaw  
rykawhu izywyr har.

Nuzawy kwaw aroe 'yw  
Tupàn Tuweharupi Wiko  
Ma'e hemitygwer.

Nuzawy kwaw ywyràkàxigyw 'y  
huwake har.

**7** Heta tetea'u putar 'y Izaew  
wanupe nehe.

Ui'u putar wà nehe.

Omono putar 'y wemitygwer  
rehe nehe no.

Wanuwhawete upuner wera'u  
putar Akak wi nehe.

Teko paw ukwaw putar hemiaihu  
wakàgaw wà nehe.

**8** Tupàn upyro Izaew

Exit ywy wi wà.

Uzàmàtyry'ym waàmàtyry'ymar  
tapi'ak awa hehaite ma'e ài.

Izaew u'u putar wàmàtyry'ymar wà.

Uzuhaw zauxiapekwer wàkàgwer wà.  
Uzuka u'yw pupe wazywà pà wà.

**9** Izaew nuzawy kwaw zàwàruhu iriàw  
upuner ma'e wà.

Iker mehe ni amo numume'e  
kar kwaw wà.

Aze amo omono ze'egatu  
Izaew wanehe nehe,  
Tupàn omono putar ze'egatu a'e  
ze'egatu imono har rehe nehe no.

Aze amo omono ze'egaiw  
Izaew wanehe nehe.

Tupàn omono putar ze'egaiw a'e  
ze'egaiw imono har rehe nehe no.

**10** Na'e Marak wikwahy Márààw pe kury.  
Ukwar opo rehe inugwer opo pupe  
wekwahy haw hexak kar pà. Uze'eg izupe.

— Urenoz xe heàmàtyry'ymar wanehe  
ze'egaiw imono kar pà newe. Na'iruz haw xo  
ze'egatu zo eremono wanehe. **11** Eho nerekò<sup>h</sup>  
haw pe kury. Amume'u hekuzar newe.  
Nezewo rehe we Tupàn Tuweharupi Wiko  
Ma'e hemupytu'u kar hekuzar newe imono  
'ym mehe we a'e, i'i izupe.

**12** Na'e Márààw uwazar ize'eg izupe.

— Amume'u a'e ma'e neze'eg herur har  
wanupe ihe. **13** — Aze mo eremur neparat  
paw ihewe, aze mo eremur neor paw ihewe,  
napuner iwer mo Tupàn Tuweharupi Wiko  
Ma'e ze'eg heruzar 'ymaw rehe. — Nazapo  
kwaw heremiapo kar nehe, a'e wanupe.  
— Xo Tupàn hemimume'u zo amume'u putar  
nehe, a'e wanupe, i'i izupe.

### **Màrààw ze'egatu haw iahykaw**

**14** Márààw uze'eg wi Marak pe.

— Azewyr putar heànàm wanupe ihe nehe  
kury. Heho 'ym mehe we amume'u putar  
Izaew neremaihu wanupe wanemaiapo ràm  
newe nehe, i'i izupe. **15** Na'e umume'u ko  
ze'eg puràg ma'e uezapo ma'e ràm imume'u  
pà kury.

Na'aw Márààw Meor ta'yr ze'eg xe.

'Aw awa upuner ma'e hexak  
katu haw rehe.

Na'aw ize'eg xe.

- 16** Upuner Tupàn ze'eg henu haw rehe.  
Aze Tupàn ywate wera'u ma'e umur  
ma'e kwaw paw izupe,  
upuner ikwaw paw rehe.  
A'ar ihe. Herehazawok kury.  
Aexak Tupàn upuner wera'u ma'e  
hepuahu zàwenugar kury.
- 17** Ame'e uezapo ma'e ràm rehe.  
Aexak teko Izaew izuapyapyr wà.  
Wanuwhawete zahytata uhyape katu  
ma'e uxexak kar putar wanupe nehe.  
Ur putar Izaew wanuwi  
zahytata uwewe ma'e ài.  
Weityk putar Moaw wanuwhaw  
wà nehe.  
Uumuwat putar 'aw teko wiko wera'u  
ma'e wà nehe.
- 18** Weityk putar Izaew waàmàtyry'yamar  
Enom izuapyapyr wà nehe.  
Upyhyk putar waiwy wà nehe.  
Wiko putar waiwy izar romo  
wà nehe no.  
Teko Izaew izuapyapyr wexak  
kar putar ukàgaw wà nehe.
- 19** Zako izuapyapyr wanuwi uhem  
putar teko wazar nehe.  
Uumuwat putar tawhu pupe  
wikuwe ma'e wà nehe.
- 20** Na'e upuahu haw zàwenugar  
rehe Màràw wexak Amarek  
izuapyapyr wà. Na'e umume'u  
ko ze'eg uezapo ma'e ràm  
imume'u har.
- Izypy mehe Amarek wiko teko  
amogwer wanuwi  
upuner wera'u ma'e romo wà.  
Iahykaw rehe amo umumuwat putar  
Amarek a'e wà nehe.  
Nuzewyr pixik kwaw wà nehe.
- 21** MÀràw wexak Kene izuapyapyr  
wà no. A'e rupi umume'u ko ze'eg  
uezapo ma'e ràm imume'u har.  
Ywy peneko haw ikatu.  
Naheta kwaw pezuka haw a'e pe.  
Pezapó penaity itahu rehe.

- 22** Nezewe rehe we Axir pemumaw  
putar wà nehe.  
Peneraha putar wemipyhyk  
kwer romo wanupe  
uma'erek e ma'e romo a'e wà nehe.
- 23** MÀràw umume'u ko ze'eg uezapo ma'e  
ràm imume'u har no.  
Amo teko uzemono'og kwarahy  
heixe haw awyze har kutyr wà.  
Mon aipo wà.
- 24** Waàmàtyry'yamar ur putar Xip  
ryrypyp'o wi ukahu pupe wà nehe.  
Weityk putar Axir wà nehe.  
Weityk putar Emer wà nehe no.  
A'e re Tupàn umumuwat putar a'e teko  
kwarahy heixe haw awyze har  
kutyr har wà nehe no.
- 25** Na'e MÀràw uzemuàgà'y'm weko haw  
pe uzewyr pà kury. Marak oho a'e wi a'e no.

### *Izaew umuwete Ma'aw-Peor wà*

**25** <sup>1</sup> Izaew uzapo uker haw  
wywyapyznaw Akaz her ma'e rehe wà  
kury. Awa uzypyrog kužà Moaw wanazyr  
wapuhue uker pà wà. <sup>2</sup> A'e kužà wenoz teko  
Izaew wamuwà umynykaw pe wà. Uzuka  
ma'ea'yr uzar tupàn a'ua'u wanupe a'e  
mynykaw pe wà. Izaew umai'u wama'i'u haw  
pe wà. Umuwete wazar tupàn a'ua'u wà no.  
<sup>3</sup> Nezewe Izaew uzemono'og tupàn  
Ma'aw-Peor her ma'e imuwe katu pà wà  
kury. A'e rupi Tupàn Tuweharupi Wiko  
Ma'e wikwahy wanupe. <sup>4</sup> Uze'eg Moizez  
pe. — Emono'og teko Izaew izuapyapyr  
wanuwhaw ne wà nehe. E'azuwyk  
herenataromo 'aromo kwarahy ihyape katu  
mehe we ne wà nehe. Nezewe mehe Izaew  
wanupe hekwahy haw upaw putar nehe, i'i  
izupe.

<sup>5</sup> Moizez uze'eg tuwhaw wanupe. — Pe  
pitaitàigatu pezuka awa peànàm Ma'aw-Peor  
imuwe arer pe wà nehe, i'i wanupe.  
<sup>6</sup> Moizez a'e, teko paw a'e wà no, uzai'o  
waiko tåpuzràn Tupàn pe imonokatu pyrer  
henataromo wà. Na'e pitài Izaew weraha

amo kuzà Minià wàpuzràn pupe Moizez henataromo teko wanenataromo wà kury. **7** Pinez Ereazar ta'yr xaxeto Àràw hemimino wexak waneixe mehe wà. Hexak mehe upu'am zemono'ogaw wi oho pà. Upyhyk u'ywhu. **8** Oho a'e awa haikweromo. Wixe hàpuzràn pupe. Ukutuk awa hie. Ukutuk kuzà hie rehe no. Nezewe mehe umumaw ma'eahy haw Izaew wainuinuromo har wà. **9** A'e 'ym mehe a'e ma'eahy haw uzuka 24.000 teko wà.

**10** Na'e Tupàn Tuweharupi Wiko Ma'e uze'eg Moizez pe.

**11** — Pinez umumaw teko Izaew wanupe hekwahy haw a'e. Wiko hezàwe a'e. Nupuner kwaw amo tupàn wamuwete haw hexakaw rehe. Xo hemuwete haw wexak a'e. Uzuka Pinez a'e awa. A'e rupi namumaw kwaw Izaew hekwahy haw inuromo. **12** A'e rupi emume'u ko ma'e izupe kury. — Tupàn uzapokatu uze'egaw nerehe we kury, umyrypar romo nemuigo kar pà kury, ere izupe nehe, i'i izupe. **13** A'e nehe, izuapyapyr a'e wà nehe no, wiko putar xaxeto romo tuweharupi wà nehe. Ta'e numuwete kar kwaw amo tupàn Izaew wanupe wà xe, herenataromo wà xe. Nezewe mehe umunàn kar wanemiapo kwer ikatu 'ym ma'e ihewe a'e.

**14** Izaew kuzà Minià izuapyapyr ipuhe izuka pyrer a'e, Ziniri her romo a'e. Xaru ta'yr romo hekon a'e. Wiko Ximeàw izuapyapyr romo. **15** Kuzà Minià izuapyapyr izuka pyrer a'e, Kozimi her romo a'e. Zur tazyr romo hekon. Zur wiko amo Minià izuapyapyr uzeànanàm ma'e wanuwihow romo.

**16** Tupàn Tuweharupi Wiko Ma'e uzapo kar ma'e Moizez pe.

**17** Pezàmàtyry'ym Minià izuapyapyr peho pe wà nehe, wazuka pà pe wà nehe. **18** Uzapo ikatu 'ym ma'e peme wà. Ta'e hemu'em peme wà, tupàn ua'u Peor hagapaw imuwete kar pà peme wà. Hemu'em peme Kozimi Minià wanuwihow tazyr rehe wà no. Izaew uzuka tazyr ma'eahy haw Peor ywytyr rehe heta mehe wà.

**Mokoz haw rupi upapar teko wà**  
**26** <sup>1</sup> Wama'eahy re Tupàn Tuweharupi Wiko Ma'e uze'eg Moizez pe Ereazar xaxeto Àràw ta'yr pe no.

**2** — Pepapar awa Izaew 20 kwarahy henataromo hereko har paw wà nehe. Pepapar awa uzeànàm ma'e wainuromo har paw rupi pe wà nehe, aze upuner zauxiapekwer romo weko haw rehe wà nehe, i'i wanupe.

**3-4** Moizez a'e, Ereazar a'e no, weruzar ize'eg wà. Omono'og awa zauxiapekwer romo wiko haw upuner ma'e paw rupi wà. Uzemono'og Moaw ywy reh ywytyr heta 'ymaw rehe wà, Zotàw yrykawhu izywyr wà, Zeriko tawhu henataromo wà. Amume'u putar Izaew Ezit ywy wi uhem ma'e kwer waner xe ihe wà nehe:

**5** Humen izuapyapyr uzeànàm ma'e waner wà (Humen wiko Zako ta'yr ipy romo): Enok, Paru, **6** Ezerom, Karomi. **7** Awa a'e teko wainuromo har wapapar mehe heta 43.730 wà. **8** Paru umuzàg amo wà: Eriaw, **9** ta'yr wà no: Nemuew, Nàtà, Àmiràw. (A'e 'ym mehe teko wexaek Nàtà Àmiràw rehe we wà. Uzàmàtyry'ym Moizez wà. Uzàmàtyry'ym Àràw wà no. Uzemono'og Kora hemiruze'eg wanehe we Tupàn Tuweharupi Wiko Ma'e iàmàtyry'ym mehe wà. **10** Ywy uzepupeka wamokon pà a'e. Umàno Kora rehe we hemiruze'eg wanehe we wà. Tata uzuka 250 awa wà. Teko wexak a'e ma'e izeapo mehe wà.

— Aze xiàmàtyry'ym Tupàn nehe, zanezuka putar nehe, i'i uzeupeupe wà. **11** Tupàn nuzuka kwaw Kora ta'yr wà.)

**12** Ximeàw izuapyapyr uzeànàm ma'e waner wà: Nemuew, Zamim, Zakim, **13** Zera, Xau. **14** Awa a'e teko wainuromo har wapapar mehe heta 22.200 wà.

**15** Kaz izuapyapyr uzeànàm ma'e waner wà: Zepon, Agui Xuni, **16** Ozini, Eri, **17** Aroz Areri. **18** Awa a'e teko wainuromo har wapapar mehe heta 40.000 wà.

**19-21** Zuta izuapyapyr uzeànàm ma'e waner wà: Xera, Perez, Zera, Ezerom, Amu. Mokoz Zuta ta'yr umàno Kànàa ywy rehe

wà. (Er, Onà waner wà.) **22** Awa a'e teko wainuromo har wapapar mehe heta 76.500 wà.

**23** Ixakar izuapyapyr uzeànàm ma'e wanu waner wà: Tora, Puwa, **24** Zazu, Xinirom.

**25** Awa a'e teko wainuromo har wapapar mehe heta 64.300 wà.

**26** Zemurom izuapyapyr uzeànàm ma'e wanu waner wà: Xerez, Erom, Zareew.

**27** Awa a'e teko wainuromo har wapapar mehe heta 60.500 wà.

**28** Manaxe a'e, Eparai a'e no, wiko Zuze ta'yr romo wà.

**29** Manaxe izuapyapyr uzeànàm ma'e wanu waner wà: Makir Manaxe ta'yr wiko Zireaz tu romo. Zireaz umuzàg 'aw uzeànàm ma'e wà: **30** Zezer, Erek, **31** Aziriew, Xikez, **32** Xemi, Eper. **33** Zeropeaz Eper ta'yr nata'yr kwaw. Xo tazyr zo heta izupe wà. Na'aw tazyr waner xe wà: Makira, Noa, Ogira, Miwka, Xiza. **34** Awa a'e teko wainuromo har wapapar mehe heta 52.700 wà.

**35** Eparai izuapyapyr uzeànàm ma'e wanu waner wà: Xutera, Meker, Tàà. **36** Erà izuapyapyr wiko Xutera izuapyapyr romo azeharomoete wà. **37** Awa a'e teko wainuromo har wapapar mehe heta 32.500 wà. Amume'u Zuze izuapyapyr uzeànàm ma'e wanu waner kwez xe ihe wà.

**38** Mezàmi izuapyapyr uzeànàm ma'e wanu waner wà: Mera, Azimew, Airàw, **39** Xupa, Upà. **40** Arize izuapyapyr wà, Nààmà izuapyapyr wà no, wiko Mera izuapyapyr romo azeharomoete wà. **41** Awa a'e teko wainuromo har wapapar mehe heta 45.600 wà.

**42** Nà izuapyapyr uzeànàm ma'e tu her: Xuàw. **43** Awa a'e teko wainuromo har wapapar mehe heta 64.400 wà.

**44** Azer izuapyapyr uzeànàm ma'e wanu waner wà: Imina, Izivi, Meri. **45** Emer izuapyapyr wà, Mawkiew izuapyapyr wà no, wiko Meri izuapyapyr romo azeharomoete wà. **46** Azer tazyr a'e, Xera her romo a'e.

**47** Awa a'e teko wainuromo har wapapar mehe heta 53.400 wà.

**48** Napitari izuapyapyr uzeànàm ma'e

wanu waner wà: Zazeew, Kuni, **49** Zezer, Xirez. **50** Awa a'e teko wainuromo har wapapar mehe heta 45.400 wà.

**51** Awa Izaew paw wainuromo har wapapar mehe heta 61.730 wà.

**52** Tupàn Tuweharupi Wiko Ma'e uze'eg Moizez pe.

**53** Emuza'aza'ak ywy nehe, ipegegwer wamono pà Zako ta'yr wazuapyapyr wanupe nehe. Aze heta tetea'u wà, emono ywy pehegwer uhua'u ma'e wanupe nehe.

**54-56** Emuza'aza'ak ywy ita'i ma'e ipapar haw hereko har momor haw pupe nehe. Ywy pehegwer uhu wera'u ma'e emono Zako ta'yr izuapyapyr heta tetea'u ma'e wanupe nehe. Ywy pehegwer pixik wera'i ma'e emono Zako ta'yr izuapyapyr heta wewer ma'e wanupe nehe.

### *Erewi wà kury*

**57** Erewi izuapyapyr uzeànàm ma'e wanu waner wà: Zeroxon, Koat, Merari. **58** Amo Àràw izuapyapyr uzeànàm ma'e wanu waner wà: Irimimi, Emerom, Mari, Muzi, Kora. Koat umuzàg Ànàràw. **59** Àriràw wereko Zokemez Erewi tazyr wemireko romo. Zokemez uzexak kar Ezit ywy rehe. Zokemez omono mokoz ta'yr Ànàràw pe wà: Àràw, Moizez waner romo wà. Umur pitài tazyr izupe no: Mirià her romo a'e. **60** Àràw umuzàg 4 wa'yr wà: Nanaw, Amiu, Ereazar, Itamar. **61** Nanaw a'e, Amiu a'e no, umàno tata iapo katu pyrer 'ym Tupàn Tuweharupi Wiko Ma'e pe imono mehe a'e wà. **62** Upapar awa Erewi izuapyapyr pitài zahy henataromo hereko har wà. Heta 23.000 wà. Nupapar kwaw amogwer Izaew izuapyapyr wainuromo wà. Ta'e Izaew waiwy imuza'aza'ak mehe nupyhyk kwaw ywy pehegwer wà xe.

**63** Moizez a'e, xaxeto Ereazar a'e no, upapar Izaew wà, ywyty heta 'ymaw Moaw ywy rehe har rehe wà, Zotàw yrykawhu izywyr Zeriko henataromo wà. **64** A'e 'ym mehe Xinaz ywyxiguhu rehe wiko mehe Moizez a'e, Àràw a'e no, upapar Izaew a'e wà. Wapapar haw pitài haw romo a'e. Upapar Izaew ywytyr heta 'ymaw Moaw ywy rehe

har rehe wà, Zotàw yrykawhu izywyr Zeriko henataromo wà. Wapapar haw mokoz haw romo a'e. Naheta kwaw teko pitài haw ipapar pyrer mokoz haw ipapar pyrer wainuinuromo wà. **65** — Paw rupi umàno putar ywyxiguhu rehe wà nehe, i'i Tupàn Tuweharupi Wiko Ma'e ipapar pyrer izypy mehe arer wanupe. Umàno azeharomoete wà. Karew Zepone ta'yir a'e, Zuzue Nun ta'yir a'e no, xo a'e zo numàno kwaw wà.

### **Zeropeaz tazyr wà**

**27** <sup>1</sup> Manaxe izuapyapyr wainuromo heta 5 ikypy'yr wà: Makira, Noa, Ogira, Miwka, Xiza. Zeropeaz tazyr romo wanekon wà. Wiko Zuze izuapyapyr romo wà: Zuze umuzàg Manaxe. Manaxe umuzàg Makir. Makir umuzàg Zireaz. Zireaz umuzàg Eper. Eper umuzàg a'e 5 wazyr wà. **2** A'e kuzà uze'eg oho Moizez pe Ereazar pe wà kury, teko paw wanupe tâpuzràn Tupàn pe imonokatu pyrer pe teixe haw pe wà kury. Uze'eg nezewé wà:

**3** Ureru umàno ywyxiguhu rehe a'e. Numuzàg kwaw awa. Nuiko kwaw Kora hemiruze'eg romo. Nuzàmàtyry'ym kwaw Tupàn Tuweharupi Wiko Ma'e. Umàno wemiaipo kwer ikatu 'ym ma'e hekuzaromo, wa'yr 'ym pà. **4** Numuzàg kwaw awa wà. Nezewé rehé we na'ikatu kwaw ureru her wànàm waner wanuwi ukàzym àwàm. Emur ywy pehegwer ureru iànàm wainuromo har urewe nehe. **5** Moizez uze'eg oho Tuweharupi Wiko Ma'e pe a'e kuzà wanehe. **6** Tuweharupi Wiko Ma'e uze'eg nezewé izupe.

**7** Zeropeaz tazyr wenoz ma'e imuàgy'ygatu àwàm a'e wà. Emono ywy pehegwer waner iànàm wainuromo har nehe, wanupe nehe. Tuwe upyhyk u izuapyapyr wanemipyhyk ràm wà nehe. **8** Emume'u ko heze'eg teko Izaew izuapyapyr wanupe nehe. — Aze awa umàno wa'yr 'ym nehe, tuwe tazyr upyhyk ima'e nehe. **9** Aze natazyr kwaw nehe, a'e mehe tywyr upyhyk putar ima'e wà nehe. **10** Aze natywyr kwaw nehe, pemono ima'e tu tywyr wanupe nehe. **11** Aze tu natywyr kwaw nehe, pemono ima'e iànàm a'e awa huwake

wera'i ma'e pe nehe. A'e iànàm wiko putar ima'e izar romo nehe. Izaew weruzar putar ko ze'eg wà nehe. Ta'e ihe Tupàn Tuweharupi Wiko Ma'e amono ko ze'eg newe ihe xe, Moizez.

### **Zuzue wiko teko waneruze'eg romo kury**

**12** Tupàn Tuweharupi Wiko Ma'e uze'eg Moizez pe. — Ezeupir ko ywy Amari her ma'e rehe nehe. Exak ywy Izaew wanupe heremimono ràm nehe. **13** Hexak ire eremàno putar neryky'yr Àràw ài nehe. **14** Ta'e pepytu'u hereruzar ire ywyxiguhu Zin her ma'e rehe peneko mehe xe. Teko paw uze'eg zemueteahy herehe Merima pe wà. A'e 'ar mehe napepurukwaw wer kwaw hepuner haw ikatuahy ma'e rehe a'e teko wanenataromo. (Heta 'zygwär Kanez pe Zim ywyxiguhu rehe. Merima her romo a'e.) **15** Na'e Moizez umume'u ko ma'e kury.

**16** O Tupàn Tuweharupi Wiko Ma'e teko paw wamuikuwe kar har. Exak kar amo awa ihewe teko waneruze'eg àràm romo nehe.

**17** Tuwe upuner wanuwiaw romo weko haw rehe zeàmàtyry'ymawhu pe nehe. Nezewé mehe neremiaihu nuiko kwaw àràpuhàràn izar 'ym ma'e ài wà nehe, i'i izupe.

**18** Uze'eg Tupàn Tuweharupi Wiko Ma'e Moizez pe kury. — Enoz Zuzue Nun ta'yir imuàm nehe. Awa ma'e iapo haw ikwaw katu har romo hekon a'e. Emono nepo hehe nehe.

**19-20** Nezewé mehe eremono putar tuwhiaw romo nerekawo haw ipehegwer izupe nehe. Nezewé mehe Izaew paw weruzar putar ize'eg a'e wà nehe. Emupu'àm kar xaxeto Ereazar henataromo nehe, teko paw wanenataromo nehe no. A'e pe iàm mehe eremume'u putar nerekuzaromo heko haw teko wanupe nehe. **21** Xaxeto Ereazar umume'u putar heremimutar Zuzue pe a'e nehe, Uri rehe ume'e pà Tumi rehe ume'e pà a'e nehe. Zuzue wekar putar heremimutar izupe uze'eg pà tuweharupi a'e nehe. Nezewé mehe tuweharupi Ereazar wexak kar putar heremiaipo putar haw Zuzue pe a'e nehe, teko Izaew paw wanupe a'e nehe no, i'i izupe.

**22** Weruzar Moizez Tupàn Tuweharupi Wiko Ma'e ize'eg a'e kury. Umupu'äm kar Zuzue xaxeto Ereazar henataromo kury, teko paw wanenataromo no. **23** Tupàn Tuweharupi Wiko Ma'e ze'eg rupi katete Moizez omono opo Zuzue iàkàg rehe kury, wekuzaromo har romo imuigo kar pà kury.

**'Ar nànàgatu ma'e imono pyr**

**28** <sup>1</sup>Uze'eg Tupàn Tuweharupi Wiko Ma'e Moizez pe kury.

**2** — Emume'u ko heze'eg Izaew wanupe nehe. Perur penemi'u ikurer Tupàn pe i'ar nànàn nehe. Temi'u imur pyr hyàkwegatu izupe, ere wanupe nehe.

**3** — Amume'u putar temi'u ihewe imur pyr xe kury. — Tuwe perur a'e ma'e Tupàn pe tuweharupi 'ar nànàn wà nehe: mokoz àràpuhàràñ hawitu ma'e awa pitài kwarahy hereko har ikatu 'ymaw hereko 'ymar wà. **4** Pezuka putar pitài ku'em mehe nehe. Pezuka putar inugwer karuk mehe nehe no. **5** Pitàitâigatu àràpuhàràñ rehe we pemur putar pitài kir arozràñ imuku'i pyrer ikatu wera'u ma'e uri kawer inuromo imupyràn pyrer nehe no. **6** Peapy putar pe wà nehe. Ukaz paw putar wà nehe. Pezapo nezewe haw 'ar nànàn nehe. Temi'u imur pyr a'e. Hyàkwegatu Tupàn Tuweharupi Wiko Ma'e pe. Peipy umur agwer ma'e Tupàn pe Xinaz wwytyruhu rehe izypy mehe. **7** Pitàitâigatu àràpuhàràñ rehe we pemur pitài zutahyky'a win nehe. Pezakook a'e win Tupàn henaw ikatu ma'e pupe Tupàn Tuweharupi Wiko Ma'e imuwete katu pà nehe. **8** Karuk mehe pezuka inugwer àràpuhàràñ nehe. Pemur arozràñ imuku'i pyrer uri kawer inuromo win inuromo a'e àràpuhàràñ rehe we nehe no, àràpuhàràñ ipy rehe arer zàwenugar nehe no. Temi'u Tupàn Tuweharupi Wiko Ma'e pe imur pyrer a'e. Hyàkwegatu izupe.

**'Ar mytu'u haw rehe imono pyr**

**9** Mytu'u haw 'ar mehe pemur mokoz àràpuhàràñ hawitu ma'e awa pitài kwarahy hereko har ikatu 'ymaw hereko 'ymar wà nehe. Pemur mokoz kir arozràñ imuku'i pyrer

ikatu wera'u ma'e uri kawer inuromo imupyràn pyrer nehe, arozràñ imur pyr romo nehe no. Pemur win nehe no. **10** Pemur putar ma'e tuweharupi nehe. Pemur agwer ukaz paw ma'e ràm mytu'u haw 'ar nànàn nehe no. Pemono a'e ma'e Tupàn pe win rehe we nehe.

**Zahy pyahu rehe ma'e imono pyr**

**11** Zahy izypyrogaw nànàn pemur ko ma'e hapy paw pyr Tupàn Tuweharupi Wiko Ma'e pe nehe: mokoz tapi'aka'yir awa wà, pitài àràpuhàràñ hawitu ma'e awa, **7** àràpuhàràna'yir hawitu ma'e awa pitài kwarahy hereko har wà. Paw rupi wiko putar ikatu 'ymaw hereko 'ymar romo wà nehe.

**12** Tapi'ak nànàn pemur na'iruz kir arozràñ imuku'i pyrer ikatu wera'u ma'e uri kawer inuromo imupyràn pyrer rehe we nehe. Àràpuhàràñ hawitu nànàn pemur mokoz kir arozràñ imuku'i pyrer uri kawer inuromo imupyràn pyrer rehe we nehe. **13** Pemur pitài kir àràpuhàràna'yir nànàn nehe no. Agwer imur pyr hapy paw pyr wiko temi'u Tupàn Tuweharupi Wiko Ma'e pe imur pyr romo wà. Hyàkwegatu izupe wà. **14** Pemur win nezewe nehe: mokoz zutahyky'a tapi'aka'yir nànàn nehe. Pitài zutahyky'a por iku'aw har àràpuhàràñ hawitu ma'e awa nànàn nehe. Pitài zutahyky'a àràpuhàràna'yir awa nànàn nehe no. Peapy a'e ma'e paw zahy nànàn 'ar ipy rehe nehe, kwarahy nànàn nehe. **15** Peapy a'e ma'e tuweharupi pe wà. Pemur win tuweharupi no. Pemono pitài àràpuhàrànete awa Tupàn Tuweharupi Wiko Ma'e pe nehe, teko wanemiapo kwer ikatu 'ym ma'e imunàñ kar pà izupe nehe.

**Zegar haw Izaew wana'yry  
ipy wazuka haw 'ym awer**

**16** Teko uzapo mynykawhu zaneipy wazuka 'ym awer her ma'e Tupàn Tuweharupi Wiko Ma'e imuwete pà 14 haw 'ar mehe pitài haw zahy rehe wà. **17** 15 haw 'ar mehe a'e zahy rehe heta putar mynykawhu nehe. Pemumaw putar 7 'ar typ'yak imuapiruru kar 'ym i'u pà nehe. **18** A'e mynykaw rehe 'ar pitài haw rehe ni amo numa'ereko kwaw wà nehe. Teko paw

uzemono'og putar Tupàn imuwe te pà wà nehe. **19** Pemono ma'e hapy paw pyrâm Tuweharupi Wiko Ma'e pe temi'u imono pyr romo nehe: mokoz tapi'aka'yr awa wà, pitâi àràpuhàràñ hawitu ma'e awa, **7** àràpuhàràñ'yr hawitu ma'e awa. Tuwe naheta kwaw ikatu 'ymaw wanehe upaw rupi. **20** Tapi'aka'yr nànàn pemono na'iruz kir arozràn imuku'i pyrer ikatu wera'u ma'e uri kawer inuromo imupyràñ pyrer nehe. Àràpuhàràñete awa nànàn pemono mokoz kir arozràn imuku'i pyrer uri kawer inuromo imupyràñ pyrer nehe. **21** Àràpuhàràñ'yr hawitu ma'e nànàn pemono pitâi kir nehe. **22** Pemono àràpuhàràñete awa Tupàn pe teko wanemaiapo kwer ikatu 'ym ma'e imunàñ kar haw romo nehe. **23** Pemur ma'e hapy paw pyrâm ku'em mehe 'ar nànàn. Pemur amogwer ma'e tuweharupi nehe no. **24** Nezewe mehe pemumaw putar **7** ar temi'u hyàkwegatu ma'e imur pà Tuweharupi Wiko Ma'e pe 'ar nànàn nehe. Pemur ma'e hapy pyrâm 'ar nànàn. Pemur win 'ar nànàn no. Pemur a'e temi'u imur pyrâm 'ar nànàn nehe no. **25** **7** haw 'ar mehe pezemono'og putar Tupàn imuwe te pà nehe. Ni amo num'aerek kwaw a'e 'ar mehe wà nehe.

### **Omono e tyàro ma'e zegar haw pe wà**

**26** Pezapo putar amo mynykawhu nehe. Arozràn ipo'o haw her romo a'e. Xemàn wà, her inugwer romo no. A'e mynykawhu mehe 'ar ipy mehe teko umur putar arozràn ipo'o pyrer ipy Tupàn Tuweharupi Wiko Ma'e pe wà nehe. A'e 'ar mehe pezemono'og putar imuwe te pà nehe. Ni amo num'aerek kwaw a'e 'ar mehe wà nehe. **27** Pemono ma'e hapy paw pyrâm Tuweharupi Wiko Ma'e pe nehe. Hyàkwegatu putar izupe nehe: mokoz tapi'aka'yr awa wà. Pitâi àràpuhàràñ hawitu ma'e awa, **7** àràpuhàràñ'yr hawitu ma'e awa wà. Paw rupi wiko putar ikatu 'ymaw hereko 'ymar romo wà nehe. **28** Tapi'aka'yr nànàn pemono na'iruz kir arozràn imuku'i pyrer ikatu wera'u ma'e uri kawer inuromo imupyràñ pyrer nehe. Àràpuhàràñ hawitu ma'e awa nànàn pemono mokoz kir arozràn

imuku'i pyrer uri kawer inuromo imupyràñ pyrer nehe. **29** Àràpuhàràñ'yr hawitu nànàn pemono pitâi kir nehe. **30** Pezuka àràpuhàràñete awa Tupàn henataromo teko wanemaiapo kwer ikatu 'ym ma'e imunàñ kar haw romo nehe. **31** Perur a'e ma'e wà nehe. Perur win Tupàn pe imono pyr romo. Perur hapy paw pyr romo nehe. Perur arozràn izupe. Perur a'e ma'e tuweharupi nehe no.

### **Kwarahy pyahu rehe ma'e imono e pyr zegar haw iapo kar pà**

**29** **1** Tupàn Tuweharupi Wiko Ma'e umume'u ko wemaiapo kar Moizez pe. — Ezapo kar ko ma'e Izaew wanupe nehe, i'i izupe. — **7** haw zahy rehe pitâi haw 'ar mehe pezemono'og Tupàn Tuweharupi Wiko Ma'e imuwe te pà nehe. Ni amo num'aerek kwaw a'e 'ar mehe wà nehe. Xaxeto upy putar xi'äm ma'e 'ak kwer iapo pyrer a'e 'ar mehe wà nehe. **2** Pemono ma'e hapy paw pyrâm Tupàn Tuweharupi Wiko Ma'e pe nehe. Hyàkwegatu putar izupe nehe: pitâi tapi'aka'yr awa. Pitâi àràpuhàràñ hawitu ma'e awa, **7** àràpuhàràñ'yr hawitu ma'e pitâi kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **3** Tapi'aka'yr awa nànàn pemono na'iruz kir arozràn imuku'i pyrer ikatu wera'u ma'e uri kawer inuromo imupyràñ pyrer nehe. Àràpuhàràñ hawitu ma'e awa nànàn pemono mokoz kir arozràn imuku'i pyrer nehe. **4** Àràpuhàràñ'yr hawitu ma'e nànàn pemono pitâi kir nehe. **5** Pemono àràpuhàràñete awa Tupàn pe teko wanemaiapo kwer ikatu 'ym ma'e imunàñ kar haw romo nehe. **6** Perur ma'e hapy paw pyr zahy i'ar ipy rehe. Perur arozràn no. Perur ma'e hapy pyr 'ar nànàn no. Perur arozràn no. Perur win no. Perur a'e ma'e paw nehe no. A'e ma'e temi'u imur pyr hyàkwegatu putar Tupàn Tuweharupi Wiko Ma'e pe nehe.

### **Ma'e imono e pyr 'ar zemukatu haw rehe har**

**7** haw zahy rehe **10** haw 'ar mehe pezemono'og putar Tupàn imuwe te pà nehe.

Pe'u zo ma'e a'e 'ar mehe nehe. Pemona'eko zo a'e 'ar mehe nehe. **8** Pemono izuka pyrām hapy paw pyrām Tupān Tuweharupi Wiko Ma'e pe nehe. Hyàkwegatu putar izupe nehe: pitai tapi'aka'yawawa, pitai àràpuhàràñ hawitu ma'e awa, 7 àràpuhàràñ'yr hawitu ma'e pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **9** Tapi'ak awa nàñanàñ pemono mokoz kir arozràn imuku'i pyrer ikatu wera'u ma'e uri kawer inuromo imupyran pyrer nehe. **10** Àràpuhàràñ'yr hawitu ma'e nàñanàñ pemono pitai kir nehe. **11** Pemono àràpuhàràñete awa Tupān pe teko wanemiapo kwer ikatu 'ym ma'e imunàñ kar haw romo nehe. Pemur a'e ma'e Tupān pe nehe, inugwer ma'e imur pyr wanehe we nehe: àràpuhàràñete awa teko wamukatu har, ma'e hapy pyr 'ar nàñanàñ, arozràn imono pyr, win a'e ma'e rehe we har.

### *Mynykawhu tåpuzràn her ma'e*

**12** 7 haw zahy rehe 15 haw 'ar mehe pezemono'og putar Tupān imuweste pà nehe. Tuwe pemumaw 7 'ar a'e mynykawhu iapo pà nehe. **13** 'Ar ipy mehe perur temi'u imur pyr Tupān pe nehe. Hyàkwegatu putar izupe nehe: Pezur putar ma'ea'yr izupe wà nehe. 13 tapi'aka'yawawa, mokoz àràpuhàràñ hawitu ma'e awa wà, 14 àràpuhàràñ'yr hawitu ma'e awa wà, 14 àràpuhàràñ'yr hawitu ma'e pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **14** Tapi'aka'yawawa, nàñanàñ pemono na'iruz kir arozràn imuku'i pyrer ikatu wera'u ma'e uri kawer inuromo imupyran pyrer nehe. Àràpuhàràñ hawitu ma'e awa nàñanàñ pemono na'iruz kir arozràn imuku'i pyrer uri kawer inuromo imupyran pyrer nehe. **15** Àràpuhàràñ'yr hawitu ma'e nàñanàñ perur pitai kir nehe. Perur win agwer imur pyr rehe we har nehe no. **16** Pemono pitai àràpuhàràñete awa Tupān pe teko wanemiapo kwer ikatu 'ym ma'e imunàñ kar haw romo nehe. Pemur ma'e hapy paw pyrām 'ar nàñanàñ. Perur arozràn tuweharupi. Perur win tuweharupi no. Perur a'e ma'ea'yr paw a'e ma'e imono pyr rehe we nehe no.

**17** 'Ar mokoz haw rehe perur 12 tapi'aka'yawawa,

mokoz àràpuhàràñ hawitu ma'e awa wà, 14 àràpuhàràñ'yr hawitu ma'e awa pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **18-19** Wanehe we perur ma'e 'ar ipy rehe har pe wà nehe no.

**20** Na'iruz haw 'ar mehe perur 11 tapi'aka'yawawa, mokoz àràpuhàràñ hawitu ma'e awa wà, 14 àràpuhàràñ'yr hawitu ma'e pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **21-22** Wanehe we perur ma'e 'ar ipy rehe har pe wà nehe no.

**23** 4 haw 'ar mehe perur 10 tapi'aka'yawawa, mokoz àràpuhàràñ hawitu ma'e awa wà, 14 àràpuhàràñ'yr hawitu ma'e pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **24-25** Wanehe we perur ma'e 'ar ipy rehe har pe wà nehe no.

**26** 5 haw 'ar mehe perur 9 tapi'aka'yawawa, mokoz àràpuhàràñ hawitu ma'e awa wà, 14 àràpuhàràñ'yr hawitu ma'e pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **27-28** Wanehe we perur ma'e 'ar ipy rehe har pe wà nehe no.

**29** 6 haw 'ar mehe perur 8 tapi'aka'yawawa, mokoz àràpuhàràñ hawitu ma'e awa wà, 14 àràpuhàràñ'yr hawitu ma'e pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **30-31** Wanehe we perur ma'e 'ar ipy rehe har pe wà nehe no.

**32** 7 haw 'ar mehe perur 7 tapi'aka'yawawa, mokoz àràpuhàràñ hawitu ma'e awa wà, 14 àràpuhàràñ'yr hawitu ma'e pitai kwarahy hereko har wà. Paw rupi wiko putar ikatu 'ymaw hereko 'ymar romo wà nehe. **33-34** Wanehe we perur ma'e 'ar ipy rehe har pe wà nehe no.

**35** 8 haw 'ar mehe pezemono'og putar Tupān imuweste pà nehe. Ni amo numa'ereko kwaw wà nehe. **36** Pemono ma'e hapy paw pyrām Tupān Tuweharupi Wiko Ma'e pe nehe, temi'u romo hyàkwegatu ma'e romo izupe nehe: pitai tapi'aka'yawawa, pitai

àràpuhàràñ hawitu ma'e awa, 7  
àràpuhàràñ'yr hawitu ma'e pitài kwarahy  
hereko har wà. Paw rupi wiko putar ikatu  
'ymaw hereko 'ymar romo wà nehe.  
**37-38** Wanehe we perur ma'e 'ar ipy rehe har  
pe wà nehe no.

**39** Amume'u Tupàn ze'eg ma'e izupe imono  
pyr rehe har kwez xe kury: ma'e happy paw  
pyr rehe har, arozräñ imono pyr rehe har,  
win imono pyr rehe har, ma'e Tupàn pe  
pezemuawye kar haw rehe har. Pemono a'e  
ma'e Tupàn Tuweharupi Wiko Ma'e pe 'ar  
mynykaw rehe har wanehe nehe. Pemono a'e  
ma'e Tupàn pe nehe. Aze pemume'u amo  
ma'e izupe imono pyràm, pemono a'e ma'e  
izupe a'e 'ar rehe nehe no. Aze peporomono e  
wer ma'e rehe izupe nehe, pemono a'e ma'e  
izupe a'e 'ar rehe nehe no.

**40** Moizez umume'u Tupàn Tuweharupi  
Wiko Ma'e hemiapo kar kwer Izaew wanupe  
kury.

### *Ma'e Tupàn pe imono haw imume'eahy haw*

**30** <sup>1</sup>Uze'eg Izaew ta'y'r izuapyapr  
wanuwiaw wanupe. — Tupàn  
Tuweharupi Wiko Ma'e uzapo kar ko ma'e  
peme a'e. **2** Aze amo umume'eahy ma'e  
Tupàn Tuweharupi Wiko Ma'e pe  
wemimono ràm nehe, aze ru'u umume'eahy  
wemiapo ràm nehe, aze ru'u umume'eahy  
wemiapo 'ym ràm nehe, tuwe uzapo  
wemimume'eahy kwer nehe. Tuwe uzapo  
umume'u pyrer paw rupi nehe.

**3** Kuzàwaza u hàpuz pupe wikuwe ma'e  
a'e, aze umume'eahy ma'e Tupàn  
Tuweharupi Wiko Ma'e pe wemimono ràm  
nehe, aze ru'u umume'eahy wemiapo ràm  
nehe, aze ru'u umume'eahy wemiapo 'ym  
ràm nehe, **4** aze tu ukwaw hemimume'u kwer  
nehe, aze nuze'eg kwaw hehe nehe, tuwe  
kuzàwaza uzapo wemimume'u kwer nehe.  
Tuwe uzapo imume'u pyrer paw rupi nehe.  
**5** Aze tu ukwaw hemimume'u kwer nehe,  
— Ezapo zo nehe, aze i'i wazyr pe nehe, a'e  
mehe tazyr nuzapo kwaw wemimume'u  
kwer nehe. Tupàn Tuweharupi Wiko Ma'e

umunàñ putar ikatu 'ymaw izuwi nehe. Ta'e  
tu nuzapo kar kwaw a'e ma'e izupe xe.

**6** Aze kuzà imen 'ym ma'e umume'eahy  
ma'e Tupàn Tuweharupi Wiko Ma'e pe  
wemimono ràm nehe, aze ukwaw wemiapo  
nehe, aze ru'u nukwaw kwaw wemiapo nehe,  
aze umume'eahy wemiapo ràm nehe, aze  
ru'u umume'eahy wemimume'u 'ym ràm  
nehe, **7** aze imen ukwaw a'e re nehe, aze  
imen nuze'eg kwaw hehe nehe, a'e mehe  
kuzà uzapo putar wemimume'u kwer nehe.  
Tuwe uzapo imume'u pyrer paw rupi nehe.  
**8** Aze imen ukwaw nehe, — Ezapo zo nehe,  
aze i'i na'arewahy nehe, a'e mehe kuzà  
nuzapo kwaw wemimume'u kwer nehe.  
Tupàn Tuweharupi Wiko Ma'e umunàñ  
putar ikatu 'ymaw izuwi nehe.

**9** Kuzà imen umàño ma'e kwer a'e, kuzà  
imen wi imunyryk pyrer no, tuwe omono  
ma'e wemimono ràm imume'eahy pyrer  
Tupàn Tuweharupi Wiko Ma'e pe nehe. Aze  
umume'eahy wemiapo ràm izupe, tuwe  
uzapo nehe. Aze umume'eahy wemiapo 'ym  
ràm, tuwe nuzapo kwaw nehe.

**10** Kuzà imen ma'e a'e, aze umume'eahy  
ma'e Tupàn Tuweharupi Wiko Ma'e pe  
wemimono ràm nehe, aze ru'u umume'eahy  
wemiapo ràm nehe, aze ru'u umume'eahy  
wemimume'u 'ym ràm nehe, **11** aze imen  
ukwaw nehe, aze nuze'eg kwaw hehe nehe,  
tuwe kuzà uzapo wemimume'u kwer nehe.  
Tuwe uzapo imume'u pyrer paw rupi nehe.  
**12** Aze imen ukwaw nehe, — Ezapo zo  
nehe, aze i'i izupe na'arewahy nehe, a'e  
mehe kuzà nuzapo kwaw wemimume'u  
kwer nehe. Tupàn Tuweharupi Wiko Ma'e  
umunàñ putar ikatu 'ymaw izuwi nehe. Ta'e  
imen nuzapo kar kwaw a'e ma'e izupe xe.

**13** Imen upuner hemimume'u kwer iapo kar  
haw rehe izupe nehe. Upuner iapo kar  
'ymaw rehe izupe nehe no. **14** Aze imen  
nuze'eg kwaw hehe a'e 'ar mehe nehe, a'e  
mehe kuzà uzapo putar wemimume'u kwer  
paw rupi nehe. Imen uzapo kar izupe a'e,  
ta'e nuze'eg kwaw hehe a'e 'ar mehe we a'e  
xe. **15** Aze amo 'ar mehe imen umunàñ  
hemimume'u kwer nehe, Tupàn uzepyk

putar awa rehe nehe. Nuzepyk kwaw hemireko rehe nehe.

**16** Amume'u Tupàn Tuweharupi Wiko Ma'e ze'eg ma'e imume'eahy pyr rehe har Moizez pe imono pyrer kwez xe ihe, aze kuzà imen 'ym ma'e umume'eahy wemiapo ràm wà, aze ru'u kuža imen ma'e umume'eahy wemiapo ràm wà.

### *Minìà izuapyapyr waàmàtyry'y'maw*

**31** <sup>1</sup>Tupàn Tuweharupi Wiko Ma'e uze'eg Moizez pe.

**2** — Minìà izuapyapyr uzapo ikatu 'ym ma'e Izaew wanupe wà. A'e rupi eze'eg nezewo Izaew wanupe nehe kury. — Pezepyk Minìà wanehe nehe, ere wanupe nehe. A'e re eremàno putar nehe, i'i Tupàn Moizez pe.

**3** Na'e Moizez uze'eg teko wanupe. — Pemuàgà'y'm awa zeàmàtyry'y'maw pe pe wà nehe. Pezàmàtyry'y'm Minìà peho pe wà nehe, wanehe pezepyk pà Tupàn Tuweharupi Wiko Ma'e pe ikatu 'ym ma'e wanemiapo kwer hekuzaromo pe wà nehe. **4** Izaew ta'yr izuapyapyr imono'og pyrer pitàitâigatu omono kar putar 1.000 zauxiapékwer a'e zeàmàtyry'y'maw pe wà nehe.

**5** Heta tetea'u Izaew wà. Pitàitâigatu ta'yr wazuapyapyr imono'og pyrer omono kar 1.000 zauxiapékwer puruzuka haw hereko har wà. Wazemono'og mehe heta 12.000 wà.

**6** Moizez omono kar a'e zauxiapékwer zeàmàtyry'y'maw pe wà. Umuigo kar Pinez xaxeto Ereazar ta'yr wanuwhaw romo. Oho mehe weraha ma'e Tupàn pe imonokatu pyrer uezupi wà no. Weraha xi'äm ma'e 'ak kwer iapo pyrer uezupi wà no. Nezewo mehe upuner wamumuranu haw rehe amogwer zauxiapékwer wanupe wà. **7** Uzàmàtyry'y'm Minìà Tupàn Tuweharupi Wiko Ma'e ze'eg Moizez pe imono pyrer rupi katete wà. Uzuka awa paw rupi wà. **8** Uzuka 5 Minìà wanuwhawete wà. Na'aw waner xe wà: Ewi, Hekem, Zur, Ur, Hema. Uzuka Màràaw Meor ta'yr takihepuku pupe wà no.

**9** Izaew weraha kuzà uezupi wemipyhyk kwer romo wà. Weraha kwarearer wà no, kuzàtâigwer wà no. Upyhyk waneimaw kwer

wà no: àràpuhàràn hawitu ma'e wà, àràpuhàrànete wà, tapi'ak wà. Weraha wama'e kwer paw wà no. **10** Umunyk tata tawhu Minìà waneko awer nànàn wà. Umunyk tata waker haw nànàn wà no. Wapy paw wà.

**11** Upyhyk ma'e Minìà wanuwi ipyro pyrer wà. Omono'og teko wemipyhyk kwer wà no. Omono'og ma'ea'yr wemipyhyk kwer wà no.

**12** Paw rupi weraha Moizez pe wà, xaxeto Ereazar pe wà, teko Izaew wanupe wà. Waker haw upyta Moaw ywy rehe ywytyr heta 'ymaw rehe yrykawhu Zòtaw huwake Zeriko tawhu henataromo.

### *Zauxiapékwer Izaew uzàmàtyry'y'm wà*

**13** Moizez, xaxeto Ereazar, teko wanuwhaw paw wà, uhem uker haw wi zauxiapékwer wanuwàxi pà wà kury.

**14** Moizez wikwahy tuwhaw zeàmàtyry'y'maw wi uzewyr ma'e kwer wanupe azeharomoete a'e. Wiko zauxiapékwer wanuwhaw romo wà. Heta zauxiapékwer imono'og pyrer pixikal'i ma'e wanuwhaw wà. Heta imono'og pyrer uhua'u ma'e wanuwhaw wà no. **15** Upuranu Moizez wanehe. — Màràzàwe tuwe napezuka kwaw kuzà pe wà. **16** Pema'enukwaw wanemiapo kwer rehe nehe. Weruzar Màràw ize'eg a'e wà. Umupuir kar Izaew Tupàn Tuweharupi Wiko Ma'e wi a'e wà. Umuwete kar Ma'aw-Peor wanupe wà. A'e rupi Tupàn umur ma'eahy haw teko wanupe a'e.

**17** Pezuka kwarer paw pe wà nehe. Pezuka kuzà awa puhe oho ma'e kwer paw pe wà nehe no. **18** Heta kuzàtai awa puhe oho pixik 'ym ma'e wà. Heta kuzàwaza awa puhe oho pixik 'ym ma'e wà no. Pezuka zo pe wà nehe. Peiko a'e kuzà wazar romo nehe. **19** Amo teko izuka arer paw wà, umàno ma'e kwer rehe opokok ma'e kwer paw wà no, umumaw putar 7 'ar katu pe teko waker haw wi upyta pà wà nehe. Na'iruz haw 'ar mehe nehe, 7 haw 'ar mehe nehe no, pe nehe, kuzà penemiraha kwer a'e wà nehe no, pezemukatu putar Tupàn henataromo nehe. **20** Pemukatu pema'e penemimunehew nehe no. Pemukatu ma'e ma'ea'yr pirer iapo pyrer nehe no. Pemukatu

ma'e àràpuhàrànete hawer iapo pyrer nehe no. Pemukatu ywyra iapo pyrer nehe no.

**21** Na'e xaxeto Ereakar uze'eg awa zeàmàtyry'ymaw wi uzewyr ma'e kwer wanupe kury. — Amume'u putar Tupàn Tuweharupi Wiko Ma'e ze'eg Moizez pe imur pyrer peme nehe kury. **22-23** Perur amo tåtà ma'e tata hemimumaw 'ym imuwa. A'e rupi pemukatu a'e ma'e paw tata pupe nehe: itazu or, itaxig parat, itazu morog, itaper, itaxig etåñ, itaun xum. Perur amo ma'e tata hemimumaw nehe no. Pemukatu a'e ma'e 'y pupe nehe. **24** 7 haw 'ar mehe pezemukatu nezewé nehe: pezuhez pema'e penemimunehew nehe. A'e re pepuner zaneker haw pupe peneixe haw rehé nehe.

### *Umuza'aza'ak Minia izuapyapyr wama'e kwer wà*

**25** Tupàn Tuweharupi Wiko Ma'e uze'eg Moizez pe.

**26** Ereakar nepytwà putar nehe. Teko wanuwihaw nepytwà putar wà nehe no. Pemuapyk ma'e zeàmàtyry'ymaw pe ipyhyk pyrer waner paw pape rehé nehe. Pemuapyk teko waner paw hehe nehe no. Pemuapyk ma'e 'y waner paw hehe nehe no. **27** Pemuza'aza'ak ma'e heraha pyrer paw mokoz pehegwer romo nehe. Pitái pehegwer zauxiapékwer upyhyk putar wà nehe. Inugwer teko upyhyk putar inugwer pehegwer wà nehe. **28** Pemono'og zauxiapékwer wanupe imono pyràm nehe. Na'e pepyro ikurer Tupàn Tuweharupi Wiko Ma'e pe imono pyràm nehe. Aze heta 500 teko heraha pyrer wà nehe, pemono pitái Tupàn pe nehe. Pezapo nezewegatete haw ma'e 'y wanupe nehe no: tapi'ak wanupe, zumeta'i wanupe, àràpuhàrànete wanupe. **29** Pepyhyk a'e ma'e imono pyrer xaxeto Ereakar pe imono pà Tupàn Tuweharupi Wiko Ma'e pe imono pyr romo nehe. **30** Pemono'og amogwer teko wanupe imono pyràm nehe. Na'e pepyro ikurer Tupàn Tuweharupi Wiko Ma'e pe imono pyràm nehe. Aze heta 50 teko heraha pyrer nehe, pemono pitái Tupàn pe

nehe. Pezapo nezewegatete haw ma'e 'y wanupe nehe no: tapi'ak wanupe, zumeta'i wanupe, àràpuhàrànete wanupe, wyzai ma'e 'y wanupe. Pemono a'e ma'e Erewi izuapyapyr tåpuzràn Tupàn Tuweharupi Wiko Ma'e pe imonokatu pyrer wanupe wà nehe.

**31** Moizez a'e, Ereakar a'e no, uzapo Tupàn hemiapo kar kwer a'e wà.

**32-35** Amume'u putar ma'e zauxiapékwer wanemiraha kwer xe kury. (Namume'u kwaw uzeupe wanemiraha kwer): 675.000 àràpuhàrànete wà, 72.000 tapi'ak wà, 61.000 zumeta'i wà, 32.000 kuzà awa puhe oho pixik 'ym ma'e wà. **36-40** Amume'u putar zauxiapékwer wanupe upyta ma'e kwer xe ihe wà kury. Heta 337.500 àràpuhàrànete wà. Omono 675 Tupàn Tuweharupi Wiko Ma'e pe izupe imono pyr romo wà. Heta 36.000 tapi'ak awa kuzà wanehe we zauxiapékwer wanupe wà. Omono 72 Tupàn Tuweharupi Wiko Ma'e pe izupe imono pyr romo wà. Heta 30.500 zumeta'i zauxiapékwer wanupe wà. Omono 61 Tupàn pe izupe imono pyr romo wà. Upyta 16.000 kuzà awa puhe oho 'ym ma'e kwer zauxiapékwer wanupe wà. Omono 32 Tupàn pe izupe imono pyr romo wà. **41** Moizez omono Tupàn pe imono pyrer Ereakar pe ma'e imono pyr ikuahy ma'e romo wà, Tuweharupi Wiko Ma'e ze'eg rupi katete wà.

**42-46** Teko wanemiraha kwer waneta haw nuzawy kwaw zauxiapékwer wanemiraha kwer waneta haw: 337.500 àràpuhàrànete wà, 36.000 tapi'ak wà, 30.500 zumeta'i wà, 16.000 kuzà awa puhe oho 'ym ma'e kwer wà.

**47** Tuweharupi Wiko Ma'e uzapo kar nezewé haw a'e: Moizez omono'og teko wanemiraha kwer wà. Aze heta 50 kuzà wà, umunyryk pitái Tupàn pe. Aze heta 50 ma'e 'y wà, umunyryk pitái Tupàn pe no. Omono Erewi izuapyapyr tåpuzràn Tupàn pe imonokatu pyrer rehé uzekaiw ma'e wanupe wà.

### *Tuwihaw wanemimono e wà*

**48** Zauxiapékwer wamono'og pyrer pixika'i ma'e wanuwihaw wà, wamono'og pyrer

uhua'u ma'e wanuwhiaw wà no, uze'eg oho Moizez pe wà kury. **49** Urupapar zauxiapekwer ureremiruze'eg ure wà. Paw rupi wiko xe wà. **50** Nezewe mehe urerur wanemipyhyk kwer paw wà: ma'e or iapo pyrer: kyhàhàm tâtà pixika'i ma'e azuromo har, poapyw har, kwà ku'aw har, nami por, azuromo har. Oromono Tupàn Tuweharupi Wiko Ma'e pe urerekohaw hekuzaromo urezuka 'ym awer hekuzaromo ure. Nezewe mehe urepyro putar nehe, i'i izupe wà.

**51** Moizez a'e, xaxeto Ereazar a'e no, upyhyk a'e ma'e or iapo pyrer a'e wà. **52** Wexak or Tupàn Tuweharupi Wiko Ma'e pe imunyryk pyrer imono pyrer paw wà. Heta 191 kir ipuhuz haw pe. **53** Tuwhiaw romo wiko 'ym ma'e upyhyk wàmàtyry'ymar wanuwi wemiraha kwer wà. **54** Nezewe mehe Moizez a'e, xaxeto Ereazar a'e no, upyhyk or tuwhiaw wanemirur kwer a'e wà kury. Weraha tâpuzràn Tupàn pe imonokatu pyrer pe wà, teko Izaew izuapyapyr wapyro kar pà Tupàn Tuweharupi Wiko Ma'e pe wà.

### *Amo Izaew upyta kwarahy ihemaw kutyr wà 'yrykaw Zotàw iwyr wà*

**32** <sup>1</sup>Humen izuapyapyr wà, Kaz izuapyapyr wà no, wereko tapi'ak tetea'u wà. Ume'e Zazer ywy rehewà. Ume'e Zireaz ywy rehewà no. — Ikatuahy a'e ywy tapi'ak imuzehu kar haw romo a'e, i'i izupe wà. <sup>2</sup>A'e rupi uze'eg oho Moizez pe xaxeto Ereazar pe teko wanuwhiaw pe wà kury.

**3-4** — Tupàn Tuweharupi Wiko Ma'e upyro ko ywy Izaew waneko àwàm romo a'e. Heta tawhu hehe wà: Atarot, Nimon, Zazer, Niniha, Ezemon, Ereaw, Xemà, Nemo, Meon. Ikatuahy tapi'ak imuzehu kar haw romo a'e. **5** Aze urekutu newe, emur ko ywy urewe nehe. Eahaw kar zo Zotàw yrykawhu urewe nehe, i'i wanupe wà.

**6** Na'e Moizez uze'eg Kaz izuapyapyr wanupe Humen izuapyapyr wanupe kury. — Pepyta wer xe peànàm zéamàtyry'ymawhu pe waho mehe. **7** Aipo pemuputa kar putar Izaew izuapyapyr xe wà nehe. Tupàn Tuweharupi Wiko Ma'e umur amo ywy

wanupe a'e. Na'ihò wer kwaw a'e pe wà nehe, aze pepyta xe nehe. **8** Penu uzapo penemiapo záwenugar wà. Amono kar Kenez-Maranez tawhu pe ihe wà. — Peme'egatu a'e ywy rehenehe, a'e wanupe. **9** Uhém Exekow ywyàpyznaw pe wà. Wexak ywy wà. Wazewyr mehe upyro teko Izaew wakàgaw wanuwi wà. — Peixe zo ywy Tupàn Tuweharupi Wiko Ma'e peme hemimur kwer rehenehe, i'i wànàm wanupe wà.

**10** Na'e Tuweharupi Wiko Ma'e wikwahy a'e 'ar mehe, wanupe uze'eg pà. **11** — Awa Ezit wi ur ma'e kwer 20 kwarahy henataromo hereko har wà, upytu'u herehe uzeruzar ire wà. A'e rupi nuexak kwaw ywy Àmàrààw pe Izak pe Zako pe heremimume'u kwer wà nehe, i'i wanupe. **12** Xo mokoz awa zo uzeruzar wiwi Tuweharupi Wiko Ma'e rehewà: Karew Zepone ta'y' Kene ywy reherarer, Zuzue Nun ta'y'. **13** Tuweharupi Wiko Ma'e wikwahy teko Izaew wanupe. A'e rupi umumaw kar 40 kwarahy wanupe ywyxiguhu rehewamuata kar pà. Umàno teko a'e 'ar mehe har paw rupi wà. Umàno teko Tupàn Tuweharupi Wiko Ma'e imuikwahy kar arer paw rupi wà. **14** Pe ikatu 'ym ma'e iapo har pe wà kury, peiko penu wanekuzaromo. Pemuhua'u wera'u Tupàn Tuweharupi Wiko Ma'e ikwahy haw peiko kury. Wikwahy wi putar teko Izaew wanupe nehe. **15** Aze napepurapo wer kwaw hemimutar rehenehe, weityk wi putar teko paw ywyxiguhu rehewà nehe. Uzuka putar paw rupi wà nehe, ta'e pezapo ikatu 'ym ma'e pe xe, i'i Moizez a'e teko wanupe.

**16** Teko Humen izuapyapyr wà, Kaz izuapyapyr wà no, uhém Moizez huwake izupe uze'eg pà wà kury. — Uruzapo putar pari xe urereimaw àràpùhàràn wanupe nehe, tapi'ak wanupe nehe no. Uruzapo putar tawhu ureànàm wanupe nehe no.

**17** A'e re uruhyk putar nehe. Uruata putar zéamàtyry'ymawhu pe amogwer Izaew wanenataromo ure nehe. Urupytyà putar waiwy ipyhyk mehe ure wà nehe. Ureànàm upyta putar xe tawhu pàrirogawtâtà hereko har pupe wà nehe. Nezewe mehe ko ywy

rehe har nuzapo kwaw ikatu 'ym ma'e wanupe wà nehe. **18** Nuruzewyr kwaw urerekohaw pe nehe. Aze Izaew paw upyhyk uiwy wà nehe, xo a'e re zo uruzewyr putar nehe. **19** Nurupyhyk kwaw ywy pehegwer waiwy myter pe har nehe, Zotàw ikupe kutyr har nehe. Ta'e uruphyk urewywy pehegwer xe ure xe, Zotàw izywyr har kwarahy ihmaw kutyr har ure xe.

**20** Na'e Moizez uwazar waze'eg wanupe. — Aze pezapo nezewehaw nehe, pezemùàgà'y'm zéàmàtyry'ymawhu rehe Tupàn Tuweharupi Wiko Ma'e henataromo nehe kury. **21** Tuwezauxiapekwer peinuromo har paw wahaw Zotàw yrykawhu Tuweharupi Wiko Ma'e ze'eg rupi katete wà nehe. Tuwe umuhem kar zaneàmàtyry'ymar zanerenatar wi wà nehe. Tuwe xipyhyk waiwy nehe. Xo a'e mehe zo uzewyr putar wà nehe. Ta'e a'e 'ar mehe peiko putar Tupàn Tuweharupi Wiko Ma'e pe Izaew wanupe penemimume'u kwer iapo arer romo nehe xe. **22** Tuweharupi Wiko Ma'e pemume'u putar ko ywy Zotàw izywyr har kwarahy ihmaw kutyr har izar romo a'e nehe. **23** Aze napezapo kwaw penemimume'u kwer nehe, ikatu 'ym ma'e pezapo putar Tupàn Tuweharupi Wiko Ma'e henataromo nehe. A'e mehe Tupàn uzepyk putar penehe penemiapo kwer ikatu 'ym ma'e hekuzaromo a'e nehe. **24** Pezapo tawhu peànàm wanupe nehe. Pezapo pari peneimaw wanupe nehe no: àràpuhàràn wanupe, tapi'ak wanupe. Pezapo penemimume'u kwer nehe, i'i Moizez wanupe.

**25** Awa Kaz izuapyapyr wà, awa Humen izuapyapyr wà no, umume'u ko ma'e Moizez pe wà. — Uruzapo putar neremiapo kar kwer nehe. **26** Urera'y'r wà, urerazyr wà, ureremireko wà, ureremimaw àràpuhàràn hawitu ma'e wà, ureremimaw àràpuhàrànete wà, ureremimaw tapi'ak paw wà, upyta putar tawhu Zireaz ywy rehe har wapupe wà nehe. **27** Ure paw uruhyk zéàmàtyry'ymawhu rehe ure kury. Tupàn Tuweharupi Wiko Ma'e wiko putar ureruwihaw romo. Uruahaw putar Zotàw yrykaw nehe.

Uruzàmàtyry'y'm putar tekohawnehe har neze'eg rupi katete nehe no.

**28** Na'e Moizez uze'eg xaxeto Ereazar pe Zuzue Nun ta'y'r pe Izaew uzeànàànàm ma'e imono'og pyrer wanuwihaw wanupe kury. Umume'u Humen izuapyapyr wanemiapo ràm wanupe. Umume'u Kaz izuapyapyr wanemiapo ràm wanupe no. **29** Nezewehaw uze'eg a'e. — Tupàn Tuweharupi Wiko Ma'e wiko putar wanuwihaw romo nehe. Kaz izuapyapyr wà nehe, Humen izuapyapyr wà nehe no, wahaw putar Zotàw yrykawhu oho penupi wà nehe. Pitàitìagatu weraha putar puruzuka haw uezupi wà nehe. Peityk putar ywy Zotàw ikupe kutyr har kwarahy heixe haw kutyr har pe wà nehe. A'e ywy ipyhyk mehe pemono Zireaz ywy wanupe nehe. Wiko putar izar romo wà nehe. **30** Aze nuzuhaw kwaw Zotàw yrykawhu utakihepuku heraha pà penupi wà nehe, a'e mehe upyhyk putar uiwy pehegwer Kànàà ywy rehe wà nehe, i'i wanupe.

**31** Awa Kaz izuapyapyr wà, awa Humen izuapyapyr wà no, uwazar ize'eg izupe wà kury. — Urezar, i'i izupe wà. — Uruzapo putar Tupàn Tuweharupi Wiko Ma'e hemiapo kar kwer nehe. **32** Ize'eg heruzar mehe xiahaw putar Zotàw yrykawhu urenakihepuku heraha pà nehe. Uruzàmàtyry'y'm putar Kànàà ywy rehe har ure wà nehe. Nezewehaw mehe uruiko putar ywy Zotàw xe kutyr har izar romo nehe.

**33** A'e rupi Moizez omono mokoz ywy pehegweruhu Kaz izuapyapyr wanupe, Humen izuapyapyr wanune, Manaxe Zuza ta'y'r izuapyapyr ipehegwer wanupe kury: Xeom Amohe ywy rehe har wanuwihawete iziwy pehegwer, Og Mâxà izuapyapyr wanuwihawete iziwy pehegwer. Omono tawhu a'e ywy pehegwer izywyr har wà no. Omono ywy a'e ywy pehegwer izywyr har wà no. **34-36** Awa Kaz izuapyapyr uzapo wi amo tawhu wà: Nimon, Atarot, Aroer, Atarot-Xopà, Zazer, Zogomea, Mete-Niniha, Mete-Àrà. Uzapò pàrirogawtâtà a'e tawhu waiwy wà no. Uzapò pari weimaw wanupe wà no. **37** Awa Humen izuapyapyr uzapo wi amo tawhu wà: Ezemon, Ereaw, Kiriataim,

**38** Nemo, Ma'aw-Meon (omono amo her uzeupe wà), Ximima. Omono amo her tawhu wemipa wi kwer wanupe wà.

**39** Makir Manaxe ta'yrr izuapyapr oho Zireaz ywy rehe wà. Weityk tekó a'e pe har wà, warmono kar pà a'e wi wà. **40** A'e rupi Moizez omono Zireaz Makir izuapyapr wanupe. A'e rupi wiko a'e pe wà. **41** Zair Manaxe izuapry uphyhk amo tawhu Amohe ywy rehe har wanuwi a'e wà. — Taw Zair ima'e wà, i'l wanupe. **42** Noma oho Kenat tawhu iphyhk pà. Upphyhk taw a'e tawhu izywyr har wà no. — Noma, i'l izupe. Uwer omono hehe.

### *Ezit wi te Moaw pe*

**33** <sup>1</sup>Amume'u Izaew waata awer xe ihe. Moizez a'e, Àràw a'e no, wiko wanuwhaw romo wata mehe a'e wà. Uzemono'og màràmàràn imono'ogaw pyrer romo Ezit ywy wi uehm pà wà. **2** Uhem amo taw wanuwi wà, u amo ywy pehegwer wanuwi wà. Pitàitàigatu Moizez umuapyk a'e taw waner pape rehe oho iko a'e wà. Amuapyk putar Izaew wata haw xe nehe kury, wappytu'u haw waner wamuapyk pà ko pape rehe nehe kury.

**3** Teko Izaew izuapyapr uehm Ezit ywy wi pitài haw zahy rehe **15** haw 'ar mehe wà. **14** haw 'ar mehe Tupàn heko haw pe har uzuka Ezit wana'yr ipy wà. Nuzuka kwaw Izaew wana'yr wà. Uhem Hamexe wi Ezit rehe har waneityk arer romo wà. Ezit ywy rehe har paw wexak wahem mehe wà. **4** Ezit uzutym wa'yr ipy Tuweharupi Wiko Ma'e hemizuka kwer waiko a'e 'ar mehe wà. Nezewe mehe Tuweharupi Wiko Ma'e wexak kar tupàn a'u'a Ezit wazar wanuwi upuner wera'u haw. **5** Hamexe wi uehm ire uzapo uker haw Xukot pe wà. **6** Uhem Xukot wi wà. Uzapo uker haw Età ywyxiguhi izywyr har pe wà. **7** Uhem Età wi wà. Uzewyr Pi-Airot Ma'aw-Zepon huwake har kwarahy heixe haw kutyr har pe wà. Uzapo uker haw Miginow huwake wà. **8** Uhem Pi-Airot wi wà. Wahaw Yryhupiràg oho wà. Na'e uehm ywyxiguhi Xur her ma'e pe wà. Uumuw na'iruz 'ar wata pà ywyxiguhi rehe wà.

Uzapo uker haw Mara pe wà. **9** A'e wi oho Erim pe wà. Uzapo uker haw a'e pe wà. Heta 12 'zygwar Erim pe wà. Heta 70 inàzàràn 'yw a'e pe wà no. **10** Uhem Erim wi wà. Uzapo uker haw Yryhupiràg huwake wà. **11** Uhem Yryhupiràg wi wà. Uzapo uker haw Xin ywyxiguhi rehe wà. **12** Oho a'e wi Nopika pe wà. Uzapo uker haw a'e pe wà. **13** Uhem Nopika wi wà. Uzapo uker haw Aruz pe wà. **14** Aruz wi uehm ire uzapo uker haw Hepinim pe wà. Nezewe rehe we naheta kwaw 'y tekó wanupe a'e pe.

**15-37** Hepinim wi Or ywytyr kutyr wata mehe uzapo màràmàràn uker haw wà: Xinaz ywyxiguhi rehe, Kimorot-Atawa pe, Azerot pe, Hixima pe, Himon-Perez pe, Irimina pe, Hixa pe, Keerat pe, Xeper ywytyr pe, Arana pe, Makerot pe, Taat pe, Ter pe, Mixika pe, Azimona pe, Mozerot pe, Mene-Zààkà pe, Or-Azinikane pe, Zoximata pe, Amirona pe, Eziom-Zemer pe, Zim ywyxiguhi rehe Kanez pe, Or ywytyr Enom ywy izywyr har rehe har rehe.

**38** Umumuw 40 kwarahy wata pà Ezit wi uehm ire wà. Na'e Tupàn Tuweharupi Wiko Ma'e umuzeupir kar xaxeto Àràw Or ywytyr rehe a'e. Umàno Àràw a'e pe 5 haw zahy rehe pitài haw 'ar mehe. **39** Àràw wereko 123 kwarahy umàno mehe.

**40** Kànàà wanuwhawete Araz her ma'e wiko Kànàà ywy rehe kwarahy ihemaw awyze har kutyr har rehe. — Izaew uehm waiko zaneywy kutyr wà, i'l amo izupe wà.

**41-49** Or ywytyr wi Moaw ywytyr heta 'ymaw wata mehe Izaew uzapo màràmàràn uker haw wà: Moaw ywytyr huwake har wà: Xawmona pe, Punom pe, Omot pe, Amari tawhu kwer pe, Nimon-Kaz pe, Awmon-Nimiratai pe, Amari ywytyr Nemo ywytyr huwake har pe, Moaw ywytyr heta 'ymaw Zotàw yrykawhu ikupe kutyr har rehe Zeriko tawhu henataromo Mete-Zezimot huwake ywyàpyznaw akaz tyw huwake.

### *Umuhem kar Tupàn Kànàà izuapyapr wà*

**50** Moaw ywytyr heta 'ymaw rehe Zotàw yrykawhu ikupe kutyr waneko mehe Tupàn

Tuweharupi Wiko Ma'e uze'eg Moizez pe. **51** — Emume'u ko heze'eg Izaew wanupe nehe, i'i izupe. — Zotàw yrykawhu hahaw mehe Kànàà ywy refe peixe mehe **52** pemono kar a'e ywy refe har paw a'e wi pe wà nehe. Pemumaw wazar tupàn a'u'a ita tâtâ iapo pyrer paw pe wà nehe. Pemumaw wazar tupàn a'u'a ita iapo pyrer paw pe wà nehe no. Pemumaw wamuwete haw paw nehe no. **53** Pepyhyk a'e ywy nehe, hehe peneko pà nehe. Ta'e amono a'e ywy peme ihe xe. **54** Pemuza'aza'ak a'e ywy ita'i ma'e papar haw hereko har imomor pà nehe. Pemono ipehegwer Izaew ta'y r wazuapyapr nànà wà nehe. Aze heta tetea'u teko wà nehe, pemono ipehegwer pixik wera'i ma'e wanupe nehe. **55** Aze napemono kar kwaw a'e ywy refe har a'e wi pe wà nehe, upyta ma'e kwer nuzawy kwaw xu peneha pe har wà nehe. Nuzawy kwaw xu itatâtâ iapo pyrer pekupe pe wà nehe. Umuaiw putar peneko haw a'e ywy refe wà nehe. **56** — Azapo putar ma'e wanupe nehe, a'e hezeupe. Azapo putar a'e ma'e paw peme ihe nehe no.

### *Ywy imuza'akaw*

**34** **1** — Emume'u ko heze'eg Izaew wanupe nehe, i'i Tupàn Tuweharupi Wiko Ma'e Moizez pe. **2** — Kànàà ywy refe peixe mehe ywy peme heremimono ràm refe peho mehe pexak putar a'e ywyzaw nehe.

**3** Ywyzaw kwarahy ihemaw awyze har kutyr har uzypyrog Zim ywyxiguhu pe. Oho putar iko Enom ywyzaw rupi nehe. Kwarahy ihemaw kutyr uzypyrog Yryhu Umàno Ma'e Kwer her ma'e iapyr kwarahy ihemaw awyze har kutyr har pe nehe. **4** A'e re uzewyr putar kwarahy ihemaw awyze har kutyr Akarami pe zeupir haw kutyr nehe. Ukwaw putar Zim huwake nehe. Uhem putar Kanez-Maranez pe nehe. A'e re ukwaw putar Wazar-Anar huwake nehe. Na'e uhem Azimon pe nehe. **5** Oho putar Azimon wi yrykaw Ezit ywyzaw pe har pe. Upaw putar Mezitehàñ yryhu pe nehe.

**6** Mezitehàñ yryhu uezapo putar ywyzaw kwarahy heixe haw kutyr har romo nehe.

**7** Ywyzaw kwarahy heixe haw awyze har kutyr har oho putar Mezitehàñ yryhu wi Or ywytyr pe nehe. **8** A'e wi oho putar Amat pe zeupir haw pe nehe. A'e re oho putar Zenaz pe nehe. **9** Zenaz wi oho putar Zipiro pe nehe. Upaw putar Azar-Enà pe nehe.

**10** Ywyzaw kwarahy ihemaw kutyr har oho putar Azar-Enà wi nehe. Oho putar Xepà pe nehe. **11** Xepà wi oho putar pe Himina pe nehe. Himina upyta Az huwake kwarahy ihemaw kutyr. A'e wi ywyzaw wezyw putar Karirez yryhu izywyr nehe. **12** Oho Zotàw yrykawhu rupi Yryhu Umàno Ma'e Kwer pe nehe. Nezewe mehe heta putar 4 peywyzaw wà nehe.

**13** Na'e Moizez umume'u ko ma'e Izaew wanupe kury. Ko ywy pemuza'aza'ak putar ita ma'e papar haw hereko har imomor pà nehe. Tupàn Tuweharupi Wiko Ma'e omono ko ywy inugwer Izaew ta'y r wazuapyapr wanupe. Heta 9 wà, heta iku'aw har wà no. **14-15** Na'aw inugwer Izaew ta'y r wazuapyapr waner xe wà: Mokoz wà, iku'aw har refe we wà no. Kaz, Humen, Manaxe iku'aw har. A'e 'ym mehe upyhyk uiwy Zotàw yrykawhu ikupe kutyr har Zeriko tawhu henataromo har wà.

### *Teko wanuwhaw ywy imuza'aza'akaw*

**16** Tupàn Tuweharupi Wiko Ma'e uze'eg Moizez pe.

**17** — Xaxeto Ereazar a'e, Zuzue Nun ta'y a'e no, umuza'aza'ak putar ywy wà nehe, ipegegwer wamono pà peme pitaitàigatu wà nehe. **18** Pexaxek pitài tuwihaw Izaew ta'y r wazuapyapr imono'og pyrer nànà pe wà nehe. A'e tuwihaw pepetywà putar imuza'aza'ak mehe a'e wà nehe.

**19-28** Penoz 'aw awa pe wà nehe:

#### *Izaew ta'y*

Zuta:	Karew Zepone ta'y
Ximeàw:	Xamuew Amiu ta'y
Mezàmi:	Erizaz Kiziro ta'y
Nà:	Muki Zogiri ta'y

#### *Tuwihaw*

(Zuze ta'yr) Manaxe:	Aniew Epoz ta'yr
Eparai:	Kemew Xipitâ ta'yr
Zemurom:	Erazapà Paranak ta'yr
Ixakar:	Pawxiew Àzà ta'yr
Azer:	Aiuz Xeromi ta'yr
Napitari:	Penae Amiu ta'yr

**29** Tupàn Tuweharupi Wiko Ma'e umuza'aza'ak kar Kànàà ywy a'e awa wanupe. A'e awa omono ywy pehegwer Izaew ta'yr izuapyapyr imono'og pyrer wanupe pitaitàgatu wà.

### *Taw Erewi waneko haw*

**35** <sup>1</sup> Moaw ywytyr heta 'ymaw rehe Zotàw yrykawhu huwake Zeriko tawhu henataromo Tupàn Tuweharupi Wiko Ma'e umume'u ko ma'e Moizez pe.

<sup>2</sup> Ezapo kar ko ma'e Izaew wanupe nehe. — Pepyhyk putar ywy pehegwer nehe. Pemono amo tawhu Erewi izuapyapyr wanupe waneko haw romo nehe. Pemono ywy ka'api'i heta haw a'e tawhu waiwyr har wanupe waneimaw wamai'u àwàm romo nehe no. <sup>3</sup> Erewi izuapyapyr wiko putar a'e tawhu wazar romo wa nehe. Wiko putar wapupe wà nehe. Waneimaw umai'u putar ywy a'e tawhu waiwyr har rehe wà nehe: tapi'ak wà, àràpuhàrànete wà, amogwer ma'ea'yr wà. <sup>4</sup> Ka'api'i umàmàn putar tawhu nànàñ nehe. Pezypyrog oho haw ipapar pà pàrirogawtâtà pe nehe. Tuwe umumaw 450 met iàñàmaw iho haw nehe. <sup>5</sup> Nezewe a'e ywy ka'api'i heta haw upyta putar nehe: Wahykaw paw uzuawyngatu putar wà nehe. Heta putar 900 met ipehegwer nànàñ nehe. Iho haw kwarahy ihemaw kutyr har nuzawy kwaw iho haw kwarahy heixe haw kutyr har nehe. Nuzawy kwaw kwarahy heixe haw awyze har kutyr har nehe. Nuzawy kwaw kwarahy ihemaw awyze har kutyr har nehe no. Tawhu upyta putar imyter pe nehe. Ka'api'i umàmàn putar izywyr nehe.

<sup>6</sup> Pemono 6 tawhu Erewi izuapyapyr wanupe nehe, uzàñ ma'e uzepyro haw romo nehe. Aze amo awa uzuka amo hehe

ipuruzuka wer 'ym pà nehe, aze ru'u izuka awer ikwaw 'ym pà nehe, upuner putar uzàñaw rehe agwer tawhu pe nehe. Pemono putar amo 42 tawhu Erewi izuapyapyr wanupe wà nehe no. <sup>7</sup> A'e rupi pemono putar 48 tawhu wanupe wà nehe, ka'api'i waiwyr har imono pà wanupe wà nehe no. <sup>8</sup> Izaew ta'yr izuapyapyr wexak putar weta haw wà nehe. Wexak putar uiwy uhu haw wà nehe no. Aze heta tetea'u wà nehe, aze uhu nehe, omono putar tawhu tetea'u Erewi wanupe wà nehe. Aze naheta tetea'u kwaw wà nehe, aze na'uhu kwaw waiwy nehe, omono putar màràmàràñ tawhu Erewi wanupe wà nehe.

### *Tawhu uzàñ ma'e ràm waneko haw*

<sup>9</sup> Tupàn Tuweharupi Wiko Ma'e umume'u kar ko uze'eg Izaew wanupe. <sup>10</sup> — Peahaw putar Zotàw yrykawhu Kànàà ywy rehe peho pà nehe. <sup>11</sup> Peho mehe pexaexak amo tawhu uzàñ ma'e ràm wanupe wazepyro àwàm romo pe wà nehe. Nezewe mehe aze amo awa uzuka amo hehe ipuruzuka wer 'ym pà nehe, aze ru'u izuka awer ikwaw 'ym pà nehe, upuner putar uzàñaw rehe agwer tawhu pe nehe. <sup>12</sup> A'e pe heko mehe uzepyro putar hemizuka kwer iàñàm wanawi nehe, aze iàñàm izepyk wer hehe wà nehe. Nezewe mehe numàno kwaw tåmuzgwer wanenataromo oho 'ym pà nehe. <sup>13</sup> Pexaexak 6 tawhu uzàñ ma'e ràm wanupe pe wà nehe. <sup>14</sup> Pexaexak na'iruz Zotàw yrykawhu wi xe kutyr har pe wà nehe. Pexaexak na'iruz Kànàà ywy rehe pe wà nehe. <sup>15</sup> A'e 6 tawhu upyta putar Izaew uzàñ ma'e wazepyro haw romo wà nehe. Upyta putar amo ywy rehe arer peinuinuromo wiko ma'e uzàñ ma'e wazepyro haw romo wà nehe no. Umumaw putar amo kwarahy nezewe haw romo wà nehe, aze ru'u upyta putar nezewe haw romo tuweharupi wà nehe. Aze amo uzuka amo hehe ipuruzuka wer 'ym pà nehe, aze ru'u izuka awer ikwaw 'ym pà nehe, upuner putar uzàñaw rehe agwer tawhu pe nehe.

<sup>16-18</sup> Aze amo awa ukutuk amo ma'e itaper iapo pyrer pupe nehe, aze ru'u ma'e ita iapo pyrer pupe nehe, aze ru'u ywyra pupe nehe,

aze ikutuk pyrer umàno ukutuk ire nehe, ikutuk arer wiko putar izuka arer romo nehe. Pezuka nehe. **19** Umàno ma'e kwer iànàm huwake wera'u ma'e a'e nehe, izuka arer hexak mehe nehe, tuwe uzuka nehe.

**20** Aze amo na'iakatuwawahy kwaw amo rehe nehe, aze a'e rupi uzapi tuwe amo ma'e pupe nehe, aze a'e re iapi pyrer umàno nehe, **21** aze ru'u amo awa ukwar wàmàtyry'ymar rehe nehe, aze iàmàtyry'ymar umàno nehe, pezuka hehe ukwar ma'e kwer nehe. Ta'e puruzuka ma'e romo hekon a'e xe. Umàno ma'e kwer iànàm huwake wera'u ma'e a'e nehe, izuka arer hexak mehe nehe, tuwe uzuka nehe.

**22** Aze ru'u amo umuàzàn putar amo hehe ipurumuzàg wer 'ym pà nehe (nuiko kwaw iàmàtyry'ymar romo), aze ru'u uzapi e putar hehe ipurapo wer 'ym pà nehe. **23** Aze ru'u amo omomor e putar ita ume'e 'ym pà nehe. Aze ru'u a'e ita u'ar amo rehe nehe. Aze ru'u umàno putar nehe. Nuiko kwaw uzeàmàtyry'ym ma'e romo wà. Izuka arer na'ipuruzuka wer kwaw hehe. **24** Agwer ma'e izeapo mehe teko umume'u putar hehe ipuruzuka wer 'ymaw wà nehe. Nuzuka kar kwaw izuka e arer wà nehe, iànàm hehe uzepyk ma'e ràm pe wà nehe. **25** Teko upyro putar ipuruzuka wer 'ym ma'e kwer wà nehe. Nuzuka kar kwaw umàno ma'e kwer iànàm pe wà nehe. Teko umuzewyr kar putar tawhu uzepyro haw pe wà nehe. Izuka arer upyta putar a'e pe nehe. Xo Xaxeto wanuwhawete imàno re zo uhem putar a'e wi nehe. (Xaxeto uzakook uri kawer ikatu ma'e amo xaxeto rehe uwihawete romo imuigo kar pà wà.) **26** Aze izuka arer uhem putar tawhu uzepyro haw wi amo 'ar mehe nehe, **27** aze hehe uzepyk ma'e ràm wexak nehe, upuner izuka haw rehe nehe. Nuiko kwaw puruzuka ma'e romo teko wanenataromo aze uzuka nehe. **28** A'e izuka arer tawhu pupe uzepyro ma'e kwer upyta putar tawhu purupyro haw pupe nehe. Xo Xaxeto wanuwhawete imàno re zo uhem putar a'e wi nehe. A'e mehe upuner putar weko haw pe uzewyr haw rehe nehe. **29** Pezuapyapyr weruzar putar ko ze'eg

tuweharupi wà nehe, wyzài ywy rehe wiko mehe wà nehe.

**30** Aze amo uzuka amo nehe, aze heta mokoz izuka awer hexak arer wà nehe, a'e mehe pepuner izuka arer izuka haw rehe nehe. Aze xo pitài zo wexak izuka awer nehe, nuhyk kwaw izuka àwàm imume'u haw pe nehe. **31** Aze tåmuzgwer umume'u amo ikatu 'ym ma'e imàno àwàm wà nehe, ni amo nupuner kwaw heko àwàm imekuzar haw rehe wà nehe. Pezuka putar nehe. **32** Aze amo uzàn tawhu purupyro haw pe nehe, aze izewyr wer weko haw pe xaxeto wanuwhawete imàno 'ym mehe we nehe, pephyk zo temetarer izewyr àwàm hekuzaromo nehe. Nuzewyr kwaw nehe.

**33** Pemuaiw zo peywy peneko haw puruzuka haw pupe nehe. Puruzuka ma'e umuaw uiwy wà. Xo pitài ma'e iapo haw zo umukatu putar ywy teko izuka awer nehe. Pezuka izuka arer ywy imukatu pà nehe. **34** Pemuaiw zo ywy peneko àwàm herenataromo nehe. Ta'e aiko inuromo ihe no xe. Ihe Tupàn Tuweharupi Wiko Ma'e aiko Izaew wainuiuromo ihe.

### Kuzà imen umàno ma'e kwer wenoz ywy tuwhaw wanupe wà

**36** <sup>1</sup>'Aw teko uze'eg oho Moizez pe Izaew wanuwhaw wanupe wà kury: Zireaz ywy rehe har uzeànànàm ma'e wà, Makir izuapyapyr azeharomoete har wà, Manaxe izuapyapyr azeharomoete har wà, Zuze izuapyapyr azeharomoete har wà.

— Tupàn Tuweharupi Wiko Ma'e umuza'aza'ak ywy peme ipegegwer wamono pà teko wanupe ita'i imomor kar pà peme a'e.

— Pemono peànàm Zeropeaz ima'e nehe, tazyr wanupe nehe, i'l zanewe no. **3** Aze wereko awa amo ae Izaew ta'yir izuapyr umen romo wà nehe, waiwy uhem putar urepo wi nehe. Imen wiko putar a'e ywy izar romo wà nehe. Nezewe mehe mewe katu urewyw pehegwer ipixipixika'i putar oho iko urewi nehe. **4** Kwarahy purumuhem kar haw ihm mehe nehe, waiwy oho putar wamen waànàm wapo pe azeharomoete nehe. Nuruiko kwaw izar romo nehe, i'l izupe wà.

5 Tupàn Tuweharupi Wiko Ma'e umuze'eg kar Moizez Izaew wanupe kury. — Awa Zuze izuapyapyr umume'u ze'eg azeharomoete har wà. Tuweharupi Wiko Ma'e uze'eg nezewe Zeropeaz tazyr wanehe. 6 Kuzà upuner awa wemimutar hereko haw rehe umen romo nehe, aze a'e awa wiko tu iànam romo nehe. 7 Nezewe mehe Izaew waiwy noho kwaw pitài Izaew ta'yrs izuapyapyr wapo wi amo pe nehe. Tuwe Izaew ta'yrs wazuapyapyr upyta u iziwy rehe wà nehe. 8 Kuzà ywy Izaew ta'yrs izuapyapyr waiwy pehegwer hereko har wereko putar awa u iànam umen romo wà nehe. 9 Nezewe mehe Izaew upyhyk putar uwipy ywy

pítàitáigatu wà nehe. Noho kwaw amo ae Izaew ta'yrs izuapyr ipo pe nehe. Ta'yrs wazuapyr upyta putar uiwy rehe pítàitáigatu wà nehe.

10-11 Na'e Zeropeaz tazyr Makira, Xiza, Ogira, Miwka, Noa weruzar Moizez ze'eg wà. Wéreko ututry wa'yrs wà umen romo wà.

12 Wereko Manaxe Zuze ta'yrs izuapyr umen romo wà. Waiwy upyta u iànam wapo pe nehe.

13 Tupàn Tuweharupi Wiko Ma'e omono ko ze'eg teko Izaew izuapyapyr wanupe Moaw ywytyr heta 'ymaw rehe Zotàw yrykawhu huwake Zeriko henataromo wanekon mehe. Umume'u Moizez pe. Moizez umume'u teko wanupe.

## IMUME'U WI HAW

### MOIZEZ IZE'EGAW PITÀI HAR

1:1—4:43

#### *Uzypyrog Moizez mitài haw rupi uze'eg haw rehe teko wanupe*

1<sup>1</sup> Moizez uze'eg teko Izaew izuapyapyr wanupe ywyxiguhi Zotàw yrykawhu ikupe kutyr har kwarahy ihmaw kutyr har rehe waneko mehe a'e. Umuapyk uze'eg ko pape rehe. Izaew wiko ywyapyznaw Zotàw yrykawhu ivyrykaw rehe Xupe tawhu huwake wà. Pàrà tawhu upyta wapehegwer rehe. Amo tawhu upyta inugwer wapehegwer rehe wà: Topew, Iràmà, Azerot, Ni-Zaw. 2 Aze amo oho Xinaz ywytyr wi Kanez-Maranez pe nehe, aze oho pe Enom ywy ahaw paw rupi ywytyruhu heta haw rupi nehe, umumaw putar 11 'ar wata pà nehe.

3 Teko Izaew izuapyapyr uhem Ezit ywy wi wà. Na'e umumaw 40 kwarahy ywyxiguhi rehe wata e pà wiko e pà wà. Tupàn Tuweharupi Wiko Ma'e umume'u amo uze'eg Moizez pe. — Emume'u Izaew wanupe nehe, i'i izupe. 11 haw zahy rehe pitài haw 'ar mehe Moizez umume'u Tupàn ze'eg paw rupi Izaew wanupe kury. 4 Moizez uzapo amo ma'e a'e 'ar henune a'e: Weityk Xeom Amohe

wanuhawet Ezemon tawhu pe har, weityk Og Mâxà wanuhawet Atarot tawhu pe har Enerez pe har no. 5 Izaew Moaw ywy rehe Zotàw yrykawhu ikupe kutyr kwarahy ihmaw kutyr waneko mehe Moizez uzypyrog Tupàn ze'eg teko wanupe imume'u pà kury.

6 — Xinaz ywytyr ipy pe zanereko mehe Tupàn Zanezar uze'eg nezewe zanewe a'e. — Pemumaw 'ar tetea'u xe. 7 Pehem peho xe wi Amohe waiwy ywytyruhu hereko har kutyr nehe. Peho amogwer ywypehegwer ywyapyznaw Zotàw yrykawhu ivyrykaw rehe har wakutyr nehe no. Peho ywytyruhu kutyr nehe. Peho ywytyr heta 'ymaw Zuta ywy rehe har kutyr nehe no. Peho ywypehegwer kwarahy ihmaw awyze har kutyr har kutyr nehe no. Peho Mezitehàñ yryhu kutyr nehe no. Peipyhyk Kànàà ywy paw rupi nehe, ywytyr Irimano ywy rehe har pe, kwarahy heixe haw awyze har kutyr peho pà nehe, yrykawhu uhua'u ma'e Ewparat her ma'e kwarahy ihmaw kutyr peho pà nehe no. 8 Pexak ywy peme heremimono ràm pe pe kury. Ihe Tupàn Tuweharupi Wiko Ma'e amume'u a'e ywy Àmàràw pe, Izak pe no, Zako pe no. Peipy romo wanekon wà. — Amono putar ko ywy